

ASO LUA, 15 TESEMA 2020

Na nofoia le Nofoa e le Fofoga Fetalai i le itula e 9:35 i le taeao e tusa ai ma le Polokalame o Fonotaga a le Palemene 2020/2021.

Tatalo.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofaitulafono.

MALELEGA MAI LE AO O LE MALO

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofaitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.1) 2020/2021.

TUUINA ATU i lou nei Lima i lenei aso 14 o Tesema 2020.

Sainia: Tuimalealiifano Vaaletoa Sualauvi II
O LE AO O LE MALO.

ISI FAASILASILAGA A LE FOFOGA FETALAI

FOFOGA FETALAI: Ua nofoilo le mamalu o le Palemene aemaise o le tapuaiga a Samoa i le taunuuga o le iloiloga a le Faamasinoga e faatatau i le talosaga a sui usufono mo Salega Sasae, le fetalaiga ia Olo Fiti Vaai ma le sui usufono mo le itumalo o Nofoa Tu Taulaga i Sisifo le Afioga ia Faumuina Wayne.

Ou te manatu e tusa ai ma faiga faavae i le va nonofo ai o itutino le faatauagai o le tatou Malo, ou te talitonu e faitau eseese Tutuila ma Ape e pei o le upu e fai i le la usoga i se matau mai a le Faamasinoga ma le lagona o le Fofoga Fetalai. Sa manatu lava i tulaga taualoa aua lava le tausisia o le mamalu o le Palemene e tusa ai ma ana Tulafono Tumau o lo o limataitaiina ai lo tatou valaauina, peitai ua le ogatasi le futia ma le umele e pei ona taoto i ai iloiloga a le Faamasinoga. Ae ui i lea, ua na o le Atua e i ai Lana amiotonu.

Ua manatu foi le Nofoa e pei lava o le tatou sauniga i le taeao nei, ua tatou aulia mai le vaitau lenei o le tausaga tatou te feofofoai ai ma tatou maua le agaga o le fefaamagaloi. E faapena foi se agaga i le Fofoga Fetalai, ia tatou maua le agaga o le fanau mai o le Pepe o le Kerisimasi.

O le faasilasilaga lea a le Fofoga Fetalai ma le naunautaiga, tatou alo i luma lo tatou sa, o lea ua toe o se aga ona tatou tau lea i le tatou faamoemoe aua le faamaeaina o lenei Paeaiga. Ou te talosaga atu foi ma le agaga faaloalo i sui usufono mamalu uma o lenei Palemene, ina ia aua ne i toe afea i se saunoaga lenei mataupu.

TUUIINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2020/2021 Nu.80, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le Tulafono Tau Faaofi o le Ulufale Mai o Tagata 2020.
2. P.P.2020/2021 Nu.82, Lipoti a le Komiti o Tupe Maua ma Tupe Totogi i le P.P.2020/2021 Nu.54, Faamatalaga o Sini Autu a le Falemeli o Samoa 2021-2024.
3. P.P.2020/2021 Nu.83, Lipoti a le Komiti o Tupe Maua ma Tupe Totogi i le P.P.2020/2021 Nu.58, Faamatalaga o Sini Autu a le Pulega o Faailoga ma Tusi Pasi Taualoa a Samoa 2021-2024.
4. P.P.2020/2021 Nu.84, Lipoti a le Komiti o le Vaega tau le Va Fealoai i le P.P.2019/2020 Nu.162, Lipoti Faaletausaga a le Komisi o le Toefuataiga o Tulafono a Samoa 2018/2019.

5. P.P.2020/2021 Nu.85, Lipoti a le Komiti o le Vaega tau le Va Fealoai i le P.P.2019/2020 Nu.167, Lipoti Faaletausaga a le Matagaluega o Tina ma Tamaitai, Nu ma Afioga ma Agafesootai 2018/2019.
6. P.P.2020/2021 Nu.86, Lipoti a le Komiti o le Vaega tau le Va Fealoai i le P.P.2019/2020 Nu.215, Lipoti Faaletausaga a le Matagaluega o Leoleo 2018/2019.
7. P.P.2020/2021 Nu.87, Lipoti a le Komiti o le Vaega tau le Va Fealoai i le P.P.2020/2021 Nu.2, Lipoti Faaletausaga a le Auaunaga o Falepuipui ma le Toefuataiga 2018/2019.
8. P.P.2020/2021 Nu.88, Lipoti a le Komiti o le Vaega tau le Va Fealoai i le P.P.2020/2021 Nu.30, Lipoti Faaletausaga a le Faalapotopotoga o Tau mo Faalavelave Tutupu Faafuasei 2019.
9. P.P.2020/2021 Nu.89, Lipoti a le Komiti o le Vaega tau le Va Fealoai i le S.R.2020/3, Tulafono o Faiaoga 2020 – Faasilasilaga o le Amata Faamamaluina.
10. P.P.2020/2021 Nu.90, Lipoti a le Komiti o le Vaega o Atinae Eseese i le P.P.2019/2020 Nu.155, Lipoti Faaletausaga a le Faalapotopotoga o le Malosi Faaletise 2018/2019.
11. P.P.2020/2021 Nu.91, Lipoti a le Komiti o le Vaega o Atinae Eseese i le P.P.2019/2020 Nu.156, Lipoti Faaletausaga a le Pulega o Felauaiga i le Laueleele 2018/2019.
12. P.P.2020/2021 Nu.92, Lipoti a le Komiti o le Vaega o Atinae Eseese i le P.P.2019/2020 Nu.204, Lipoti Faaletausaga a le Pulega o le Suavai 2018/2019.
13. P.P.2020/2021 Nu.24, Lipoti a le Komiti Faapitoa a le Palemene i le Tulafono Tau Faaofi o Teuteuga o le Faavae 2020.
14. P.P.2020/2021 Nu.25, Lipoti a le Komiti Faapitoa a le Palemene i le Tulafono Tau Faaofi o le Faamasinoga o Soligatulafono 2020.
15. P.P.2020/2021 Nu.26, Lipoti a le Komiti Faapitoa a le Palemene i le Tulafono Tau Faaofi o Fanua ma Suafa 2020.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2020/2021 – faitauga muamua**

FOFOGA FETALAI: Ou te tapa lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopopo (Nu.1) 2020/2021 i lona faitauga muamua.*

Faaluaina e le Minisita mo Aoga, Taaloga ma Aganuu ma le Minisita mo Tupe Maua.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.1) 2020/2021 i lona faitauga muamua.

**TALA FAATATAU O TUPE FAAOPOOPO (NU.1) 2020/2021 –
faataatia i luga o le Laulau a Fono**

FOFOGA FETALAI: Ou te tapa ma le faaaloalo lau Afioga i le Minisita o Tupe.

Na faataatia i luga o le Laulau a Fono e le Minisita o Tupe, Afioga Hon Sili Epa Tuioti le Tala Faatatau o Tupe Faaopoopo (Nu.1) 2020/2021.

**TULAFONO TAU FAAOFI O LE FAATATAUINA O TUPE
FAAOPPOPO (NU.1) 2020/2021 – lafo mo le faitauga faalua**

FOFOGA FETALAI: Se i toe tulai mai lau Afioga.

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2020/2021 i lona faitauga faalua.*

Faaluaina e le Minisita mo Tupe Maua ma le Minisita mo Aoga, Taaloga ma Aganuu.

FOFOGA FETALAI: Tulai maia lau Afioga i le Minisita o Tupe mo lau saunoaga.

**SAUNOAGA O LE TALA FAATATAU FAAOPO'OPO MUAMUA O
LE TUPE 2020/2021**

Lau Afioga i le Fofoga Fetalai ma Sui mamalu o le Palemene,

Ou te tulai atu ma le agaga faaaloalo, e tuuina atu i luma o le Laulau a Fono a le Palemene le Tala Faatatau Faaopo'opo Muamua o le Tausaga Faaletupe 2020/2021 o lo'o faagasolo nei.

Lau Afioga i le Fofoga Fetalai,

O lea ua mavae atu lena atu vasa o la tatou folauga o le 12 masina o lenei tausaga ma ua tatou taunuu ai i le siui o galuega faatino sa fuafuaina mai i le amataga o lenei tausaga.

Ua faafofoga Samoa ma le lalolagi atoa i le maemaea o le faama'i pipisi o le Koviti 19 lea ua aafia ai Itulagi uma o le lalolagi ma faamauina ai le faitau miliona o soifua ua ma'umau. O se tausaga aupito sili ona matautia e pei ona lōfia ai tamaoaiga a atunuu uma o le lalolagi i lenei faama'i lea ua tapunia ai tuaoi femalaga'i; soloia esea ai galuega o le faitau miliona o tagata faigaluega; tapunia kamupani tetele faavaomalo; faaititia ai oloa gaosi o lo'o faamoemoe iai le toatele; aemaise o le sasapalaina o tamaoaiga a atunuu tetele o lo'o faamalumu iai gaioiga uma e toe siitia ma faafoisia vave ai le tamaoaiga o le lalolagi i le tulaga sa iai muamua.

Lau Afioga i le Fofoga Fetalai,

O le masina o Me o le Tausaga nei, sa folasia ai i le Palemene le Tala Faatatau Autu o Tupe a le Malo mo le Tausaga 2020/2021 ma o lo'o faagasolo pea galuega faaauau seia maea masina o lo o totoe o lenei tausaga. Ae o le agaga o le talosaga mo vaegatupe faaopoopo, o le fia faatinoina lea o galuega moomia e toe faataamilo ai le tamaoaiga o le atunuu, faatasi ai ma atinae ma fuafuaga mamao o lo'o lagolagosua ile lalagaina o se tamaoaiga malosi ma mausali. O nei gaioiga uma, o lo'o faatinoina foi e le toatele o atunu'u o le lalolagi, o lo o taulamua ai o latou Malo e toe fetuuna'i atina'e ma vaegatupe moomia e sapaapaia ai atina'e o lo'o faamoemoe iai le tamaoaiga.

Lau Afioga i le Fofoga Fetalai,

O le tausaga faaletupe na te'a nei 2019/2020, sa iai le faamoemoe o le a avea ma tausaga e aupito i maualuga ai le siitia o le tamaoaiga ona o atina'e sa faatinoina ai faatasi ma le talimalo o Samoa i Taaloga a le Pasefika faapea isi Fonotaga Faavaomalo. Ae peitai, e le i taunuu le faamoemoe ina ua aafia Samoa i le Misela ma le Korona Vairasi i le faaiuga o le 2019, ma le amataga o le 2020. Ina ua faai'uina le Tausaga Faaletupe ia Iuni 2020, e 3.5% sa faaititia ai le tamaoaiga o Samoa. A faatusa i le toatele o atunuu tetele faapea le Pasefika, e laitiiti le aafiaga o lo tatou tamaoaiga pe a faatusa i le 5% le maualalo faamauina mo le toatele ae o nisi ua oo atu le maualuga i le 21.7% le pau maualalo o le tulaga i le tamaoaiga.

O lo'o iai pea le talitonuga lau Afioga, o lo'o lelei faafoeina taumafaiga uma a lo tatou Malo e faatino lana pitolaau e ala i le toe fetuunaiga o ana tupe maua aua polokalame moomia e toe unaia ma faataavale ai le tulaga tau tupe i totonu o le atunuu. E pei ona silafia, e lua ni Faamama avega po'o Stimulus Package Assistance i lona tuuaotelega e tusa ma le \$150 miliona tala, sa folasia ma taliaina i totonu o le Palemene ia Aperila ma Me o le

tausaga nei. Ua maea le tele o nei fesoasoani faamama avega ma o lo o faagasolo pea nisi fesoasoani tuusao i le taimi nei.

E le nā ma le laina, le tulaga mafatia o lo o feagai nei ma atunuu uma o le lalolagi, ma e le o alofia foi e Samoa nei luitau uma. A’o tatou tālia ai le aso e toe tatalaina ai femalagaiga faavaomalo lea e faamoemoe iai le Atina’e o Turisi o lo’o avega ma se tasi o ivitū o lo tatou tamaoaiga, e tolu ni vaega autu o lo o faalagolago iai taumafaiga a le Malo e auala atu i le Matagaluega o Tupe ina ia toe faaleleia vave ma siitia ai le tamaoaiga o Samoa. O nei tapenaga e aofia ai le:

- 1) Faatinoina o polokalame uma i lalo o fesoasoani faamama avega e lua, lea e \$150 miliona tala lona tau atoa ma saofagā ai tagatanu’u uma taitoatasi; pisinisi tumaoti o lo o faalagolago iai le tamaoaiga; faamalosia ai le puipuiga o le atunu’u mai faamai pipisi; tapena ma faamautuina ai meataumafa ia lava mo tagata uma; faapea ia fesoasoani i Vaega Maoti ma auunaga eseese a le Malo;
- 2) Siitia fesoasoani tu’usao (Budget Support) a Paaga i lo tatou Malo e faatino ai auunaga ma atinae o lo o ave iai le faamuamua a le Malo. O lo o faatinoina pea i le taimi nei fesoataiga ma Paaga ma o Samoa o se tasi o atunu’u o lo’o iai le faatuatuga a Paaga ona o le lelei faatino o ana polokalame i tausaga taitasi. Ua matauina le faatupulaia pea o nei fesoasoani i tausaga taitasi ma e tele lona sao taua i le atinaeina o si o tatou tamaoaiga.
- 3) O se tasi o vaega tele o lo o lagolagosua i lo tatou tamaoaiga i lenei vaiata, o le faaauuina lea o atinae tetele o lo’o faatupeina i fesoasoani mai fafo. O lo o avatu pea la tatou tuualalo i paaga ina ia fa’auau pea nei poloketi e le gata ina maua ai galuega a le toatele, ae fesoasoani fo’i ile una’ia o le siosiomaga tau pisinisi o lo’o faamoemoe i nei atina’e o lo’o faatinoina e lo tatou Malo. Ou te fiafia e faailoa atu, o lea ua ma’ea feutanaiga ma Faletupe o lo’o tatou faipaaga mo nisi o atina’e tetele ua le o toe mamao ona amata faatino lea ma e aofia ai le:
 - Faaleleia o le Auala Kolosi mai Tanugamanono i Siumu (Cross Island Road) i le amataga o le Tausaga Fou;
 - Fa’auuina o le auala i le Itu i Sisifo o Upolu (West Coast Road) i le amataga fo’i o le tausaga fou;
 - Amata tapenaga o le Poloketi tele i Alaoa (Alaoa Multipurpose Dam) i se vaiata o le tausaga fou;
 - Faapea le amata fausiaina o nisi o poloketi tetele o lo’o taofia ona o tapu ma vavao i femalagaiga ua le mafai ai ona amata ai nei galuega.

Lau Afioa, o le agaga ma le faamoemoe mauuluga o le Faigamalo o lo’o tula’i i le sa o Samoa i le taimi nei, ia ave le faamuamua i atina’e ma polokalame ua mautinoa e una’ia mauuluga ai le tamaoaiga mo se manuia o

tagata uma. O se avanoa lelei lenei ou te molimoli atu ai le agaga faafetai i le atunu'u mo lana tapuaiga a'o alo faiva le Malo ma lana aufaigaluega i Tiute ma Faiva o le na 12 masina ua tuana'i atu. Ou te fia faaleoina fo'i le faafetai i a tatou Paaga mo la latou fesoasoani ia Samoa i so'o se taimi, aemaise lenei vaitau a'o feagai fo'i o latou Malo ma luitau ona o aafiaga o le Faama'i Pipisi o le Koviti 19.

Lau Afioga i le Fofoga Fetalai,

O nisi nei o taiala autu o lo o tapenaina ai lenei Tala Faaopoopo Muamua o le Tupe, ou te faailoa atu faapenei:

- 1) Fa'auau ma faamalosia le puipuiga o Samoa mai faama'i pipisi ma faalavelave matuia, faapea le saogalemu lautele;
- 2) Siitia o le tulaga tau aoaoga mo Fanau a Samoa;
- 3) Faatupeina o atinae ma polokalame faaauau o lo'o lagolagosua i le atinae o Samoa;
- 4) Faaleleia ma faamalosia atinae tetele aua le tali atu i suiga o le tau;
- 5) Faaopoopoina o avanoa faigaluega e le gata ina siitia ai auunaga a le Malo ae maua ai galuega a i latou o lo o saili galuega i le taimi nei;
- 6) Faaauauina o le sootaga vavalalata a Samoa ma ana paaga e ala i atinae o lo o faatupe mai fafo;

Tala Faatatau Faaopo'opo Muamua o le Tupe:

Lau Afioga i le Fofoga Fetalai,

O se oototoga lenei o vaega autu o lenei Tala Faatatau Faaopo'opo Muamua o le Tupe mo le tausaga faaletupe 2020/2021.

O le aotelega o tupe alu faaopoopo i lalo o le Tala Faaopoopo Muamua o le Tupe e tusa ma le **\$42.21 miliona tala** ma e faatupeina mai i vaega nei:

Muamua, o Tupe Maua Masani Faaopo'opo e \$4,497,508 tala: O i latou sa fai sao i ai I lenei tupe maua:-

1. Matagaluega o Tupe – (\$10,000)

O se meaalofa tupe e fesoasoani i polokalame laveai mo le Misela sa tuuina mai e le Ekalesia EFKS i Vaitele i le Masina o Iuni 2020.

2. Matagaluega o Faalapotopotoga a le Malo - (\$4,528,009)

O le a faaopoopoina le tului mai faasiliga o tupe maua i tupe alu mai nisi o Faalapotopotoga a le Malo, e aofia ai ma se vaegatupe ua faamatuuina mai e le Faletupe Tutotonu o Samoa e \$2,089,020, e fesoasoani ile faatupeina o lenei Tala Faatatau Faaopo'opo Muamua o Tupe a le Malo.

3. Matagaluega o Aoga, Taaloga ma Aganu'u – faaitiitia o tupe maua i le \$40,501

O le a toe fetu'una'i tupe maua masani a le Matagaluega ona o nisi o tulaga le maalofia e aofia ai suiga i vavao a le Malo ua faaitiitia ai le soona tumutumu i nofoaga faitele ma faamalosi ai le faaoga o fesootaiga faaneionapo mo aoga a le fanau.

Lua, Tupe Faameaalofa faaopo'opo mai i Paaga a le Malo mo Atina'e tetele fou ma atina'e fa'aauau o le a ootoina atu i le Vaega o Tupe Alu – \$6,259,615 tala:

Tolu, Toe Fetu'una'i o Tupe Alu a Matagaluega – \$31,448,017 tala ma e aofia ai vaega nei:

1. Tupe Alu Faa-le-Tulafono - \$24,511,518

E tusa ai ma maliega a atunuu malolosi e 20 (G20) o le lalolagi, ua latou faapafalaina ai le totogiina atu o aitalafu o atunu'u tau atia'e ma o Samoa leisi atunu'u ua aofia i lenei fesoasoani mo le 12 masina o le tausaga faaletupe o lo'o faagasolo nei ma o nonogatupe i Paaga ua ta'ua i lalo o lo'o aofia i lenei polokalame fesoasoani:

- Malo o Saina \$21,906,085
- Malo o Iapani \$2,592,393
- Faalapotopotoga mo le Atina'e o Europa \$13,039

2. Matagaluega o Fa'ato'aga ma Faiga Faiva - \$1,564,215

O vaegatupe ua toe fetuuna'i a le Matagaluega ona o Fonotaga Faavaomalo ua le faataunuaina, faatasi ai ma le toe fetuuna'i o matafaioi i totonu o le Vaega Maoti o Faatoaga faapea vaegatupe faasao mai faigamalaga ua le mafai ona faataunuaina ona o le faama'i ole Koviti 19.

3. Matagaluega o Tupe - \$539,988

Ua iai vaegatupe faasao a le Matagaluega o Tupe ina ua toe fetuuna'i matafaioi mo le vaaia o le Maota ole Malo ole TATTE lea ua toe fo'i mai ile Matagaluega lona tausiga ma le puipuiga, e pei ona faatino e konekarate mai tua ile tele o tausaga. O lo'o faaopoopo iai ma vaegatupe faasao a le Matagaluega mai faigamalaga i atunuu mamao.

4. Matagaluega o Fa'amasinoga - \$335,422

O nei vaegatupe ua mafai ona faasaoina ile taofia o faigamalaga faatasi ai ma isi galuega faakonesale a le Matagaluega ua ma'ea faatino ma le toe moomia ai nei vaegatupe.

5. Ofisa o le Fono Aoaio Faitulafono - \$200,000

O leni vaegatupe sa faaagaga mo vaega fa'aupufai o lo'o aloaia ile Palemene o Samoa ae ua toe faafoi'ina mai e le Vaega Faaupufai o le HRPP leni vaegatupe e fesoasoani ile faatupeina o leni Tala Faaopoopo o le Tupe a le Malo aemaise galuega faatino mo le puipuia o le atunu'u mai le faama'i pipisi ole Koviti 19.

6. Pulega o Felauaiga i le Lauelele - \$1,025,967

O nei vaegatupe sa faaagaaga mo auaunaga tau ile puleaina ma le va'ava'aia o ta'avale afi lea ua fa'ase'e atu nei ile Matagaluega o Leoleo ma Falepuipui e latou te tauaveina.

7. Ofisa o le Komisi o Tagata Faigaluega a le Malo - \$89,574

O nei vaegatupe faasao sa faamatuuina atu mo fonotaga faavaomalo ua le faataunuuna faatasi ai ma isi auaunaga ua le mafai ona faatinoina i totonu o leni tausaga.

8. Matagaluega a le Palemia ma le Kapeneta - \$417,039

E iai fetuunaiga o le aufaigaluega sa faatino i totonu o le lotoifale a le Matagaluega faatasi ai ma tupe faasao mai faigamalaga ua toe tuuina mai e fesoasoani ile faatupega o le Tala Faaopoopo Muamua o le Tupe.

9. Matagaluega o Aoga, Taaloga ma Aganuu - \$187,954

O tupe fa'asao a le Matagaluega ua tu'uina mai e aofia ai Taaloga sa fuafuaina i Samoa nei ae ua le faataunuuna faapea tupe faasao mai faigamalaga ma isi auaunaga ua le faatinoina.

E tuuina atu ma vaegatupe faasao mai faigamalaga ua le faataunuuna mo Matagaluega nei a le Malo:

- Ofisa o le Suetusi Sili -
\$199,642
- Ofisa o Numera Fa'amauina -
\$36,653
- Matagaluega o Pisinisi, Alamanuia ma Leipa -
\$153,065
- Matagaluega o Feso'ota'iga -
\$91,362

| | |
|---|---|
| • Matagaluega o le Va-i-fafo \$744,532 | - |
| • Matagaluega o le Soifua Maloloina \$332,357 | - |
| • Komisi o le Toefuataiga o Tulafono \$12,351 | - |
| • Matagaluega o Punaoa Faanatura \$259,970 | - |
| • Ofisa o le Komesina o Sulufa'iga \$22,080 | - |
| • Vaega o Falepuipui \$58,714 | - |
| • Matagaluega mo Fa'alapotopotoga a le Malo \$83,148 | - |
| • Matagaluega o Leoleo \$91,023 | - |
| • Matagaluega o Tupe Maua \$261,050 | - |
| • Matagaluega o Galuega ma Atina'e Tetele \$92,369 | - |
| • Matagaluega o Tina ma Tamaitai \$138,024 | - |

Lau Afioga i le Fofoga Fetalai, o le a ou otootoina atu loa Tupe Alu Faaopo'opo e **\$42,205,140 tala** (e aofia ai ma lafoga faatasi ai ma poloketi e faatupe i tupe faameaalofa mai Paaga) ma e aofia ai vaega nei:

1) Matagaluega o Faatoaga ma Faiga Faiva - \$849,090

O lea vaegatupe faaopoopo e toe faatotogaina masini ma meafaigaluega moomia mo nisi o vaega o le Matagaluega mo le siitia o le auaunaga ile atunu'u. O se vaegatupe tele o le a fa'aagaga mo polokalame tau faatoaga e saga una'ia ai atina'e tau faatoaga i lenei vaitau.

2) Matagaluega o Pisinisi, Alamanuia ma Leipa - \$63,798

O le talosaga a le Matagaluega o le fa'avaeina lea o totogi mo nisi o tagata faigaluega fou ua mae'a fa'amaonia e le Komisi o Tagata Faigaluega a le Malo fa'atasi ai ma le Kapeneta ae mo'omia le toe fetu'una'iga o tupe alu e fa'atupe ai.

3) Matagaluega o Aoga, Taaloga ma Aganuu - \$2,784,092

Ua toe faaopoopoina le aufaigaluega, o avanoa mo Faaoga fou a le Matagaluega ma ua tuuina atu iai le lagolago a le Malo e faatupeina ai

avanoa moomia faatasi ai ma isi avanoa moomia e lagolagosua i polokalame faatino a le Matagaluega. E \$1 miliona tala ua faamatuuina atu fo'i e fesoasoani ai mo le toe faaleleia o faleaoga o nisi o Itumalo ua ma'ea tapena ma tuuina mai a latou talosaga.

4) Matagaluega o le Soifua Maloloina - \$3,000,000

O lenei vaegatupe ua faamatuuina atu mo ovataimi a le aufaigaluega a'o feagai ai ma le tautuaina o le atunu'u i lenei vaitau mo le puipuiga ma le saogalemu o Samoa mai faama'i pipisi.

5) Matagaluega o Fa'amasinoga - \$389,795

O le talosaga lenei e patino i galuega toe faaleleia o ea malulu o le Maota Faamasino i Mulinuu faatasi ai ma meafaigaluega ua moomia mo le aufaigaluega.

6) Matagaluega o Leoleo ma Falepuipui - \$2,734,137

Ua faaopoopoina avanoa faigaluega fou ile Vaega o le Pulega mo le siitia o auunaga a le Matagaluega. Ua aofia i le toe faatulagaina o le auivi a le Matagaluega se Avanoa Sui Komesina (Deputy Commissioner) mo le Motu tele i Salafai faapea se Sui Komesina mo le Auunaga o Falepuipui. O le a faaopoopoina fo'i vaegatupe mo auunaga o Taavale Afi lea ua siitia i lona nofoaga tutotonu fou i Fagalii. O lea ua fa'aagaga fo'i se vaegatupe e amata tapena ai le Ofisa Tutotonu Fou a le Matagaluega i le Taulaga i Salelologa e tautuaina le Motu tele i Salafai.

7) Ofisa o le Komisi mo Tagata Faigaluega a le Malo - \$71,468

O lenei talosaga e aofia ai se avanoa sinia e fesoasoani i galuega fa'atino a le Komisi fa'atasi ai ma talosaga mo faamanuiaga o auunaga umi (long service benefits) ua tataua ona totogi i le taimi nei.

8) Ofisa o le Komesina o Sulufaiga - \$56,291

O le a faaopoopoina se avanoa faigaluega fou mo le tausiga o le Ofisa i lona nofoaga tutotonu fou fa'atasi ai ma se vaegatupe fa'aopo'opo mo le totogiina atoa o le lisi i le NPF Plaza.

9) Matagaluega a le Palemia ma le Kapeneta - \$110,248

O lenei vaegatupe faaopo'opo e patino lea i ni avanoa faigaluega sinia e 3 o lo'o mo'omia aua auunaga faaopo'opo e tusa o le toe fetuunaiga o le auivi a le Matagaluega ua ma'ea taliaina e le Ofisa o le Komisi.

10) Matagaluega o Tupe - \$13,337,461

O nisi o galuega ua moomia ai vaegatupe faaopoopo mo le Matagaluega e aofia ai le: 1) Faaopo'opoina o le aufaigaluega faapea leoleopo mo le Maota

o le TATTE lea ua toe fo'i mai lona va'aiga ile Matagaluega mai konekarate tumaoti ona o le taugata tele o a latou auauaunaga. O se avanoa lelei fo'i lenei e faatuina ai avanoa faigaluega fou mo a tatou tagata o lo'o saili galuega i le taimi nei mo le tausiga o aiga. 2) Vaegatupe faaopo'opo e \$6 miliona tala mo le siitia o puipuiga o Samoa mai le faamai o le Koviti 19; 3) tau'i o elelee mo poloketi tetele a le Malo e aofia ai le Poloketi o le Green Climate Fund (GCF), Auala Kolosi o le Cross Island Road, ma le fa'auauina o nisi o atina'e faatino a lo tatou Malo.

11) Matagaluega o Faalapotopotoga a le Malo - 51,700

O lenei vaegatupe e totogi ai se konesale e fesoasoani i galuega fa'atino a le Matagaluega mo le fa'amatu'uina atu o le Falemeli e avea ma pisinisi tuma'oti i le tausaga fou, 2021.

12) Matagaluega o Galuega, Felauaiga, Atinae Tetele - \$84,247

O le a faamatuuina atu se vaegatupe mo le fa'atupeina o le avanoa faapitoa mo le mataituina ma le faafoeina o le Poloketi e Atia'e ai le talafatai o Apia (Apia Waterfront Development).

13) Fa'alapotopotoga Suesuega Faasaienisi a Samoa - \$680,797

Ua ma'ea tuufaatasia nei le vaega o laau toto a le Matagaluega o Faatoaga ma le Vaega o Suesuega o Laau a le Faalapotopotoga o Sueusega ma o lenei talosaga e patino i totogi a le aufaigaluega, faatotogina o le Ofisa fou faatasi ai ma meafaigaluega moomia mo lenei suiga tele.

14) Pulega o Fale ma Malae Taalo - \$103,910

O lenei vaegatupe e fa'atupe ai le toe fesiitai o le masini eletise (transformer) mo malae taalo i le Apia Park lea o lo'o iai nei i le fanua ua faamatuu atu e fausiaina ai malae soka fou mo taaloga faavaomalo. O lenei malae taalo e faatupeina atoa e le Faalapotopotoga o le FIFA, ma e aoga tele mo le atina'eina ai o le lumana'i o fanau a Samoa i lenei fa'agatama.

15) Pulega o Fela'ua'iga ile Laueleele - \$5,876,999

O le talosaga a le Pulega o Felauaiga e patino i se vaegatupe faaopo'opo mo le atina'e tele o lo'o faaauauina nei o le toe faaleleia o le auala i Vaiaata e agai atu i Patamea; vaegatupe moomia mo se auala fou e agai atu i le Maketi fou ua faatulaga nei i Sogi; faatasi ai ma le faaauauina o le Poloketi o le toe faaigoaina o auala ma tuatusi i totonu o le 2 kilomita mai le Taulaga.

16) Pulega o Suavai - \$4,000,000

O lenei vaegatupe e fesoasoani ile fa'a'o'oina atu o le suavai i nisi o afioaga o lo'o mo'omia lenei puna'oa fa'atasi ai ma nisi o galuega fa'aleleia.

17) Iunivesite Aoa o Samoa - \$1,751,492

O se talosaga mo avanoa faigaluega e le'i fa'atupeina ile Tala Fa'atatau Autu o le Tupe ae ua iai tagata faigaluega fa'atasi ai ma se vaegatupe mo galuega fa'atino ona o le fa'aitiitia o tupe maua a le Iunivesite e tusa o le latou faamama avega i pili aoga a le Fanau ona o aafiaga tau seleni o le Koviti19.

Lau Afioga i le Fofoga Fetalai, e ese mai Tupe alu faaopoopo mo Matagaluega ma Faalapotopotoga a le Malo ua ta'ua i luga, o lo'o aofia fo'i i lenei Tala Faaopoopo Muamua o Tupe, polokalame ma poloketi o lo'o faatupeina mai tupe faameaalofa a o tatou Paaga:

Poloketi e faatupe i Tupe Faameaalofa mai Paaga - \$6,259,615 mo vaega nei;

- 1) Atina'e mo agafesootai ma faigapaaga ma faalapotopotoga i tua atu o le Malo:
 - Aoaoga e tali atu i le faama'i Pipisi o le Misela - \$130,886
 - Poloketi e faaautu i taumafaiga e tali atu i le Koviti - \$160,875
 - Fesoasoani a le Faalapotopotoga WHO mo le Koviti - \$129,150
 - Tapenapena fesootaiga vavalalata ma faigapaaga - \$150,300
- 2) Fesoasoani mo le Vaega Maoti o Aoaoga:
 - Sauniuniga moomia mo le Koviti 19 - \$210,725
 - Atia'e ma tapena vaega moomia mo aoaoga - \$53,835
- 3) Vaega Maoti mo le Siitia o le Saogalemu o Nu'u ma Afioaga:
 - Polokalame e unaia malosi ai taunuuga moomia - \$45,772
- 4) Vaega Maoti o Faatoaga ma Faiga Faiva:
 - Feagaiga ma le Malo o Amerika mo Faigafaiva i le Pasefika - \$846,564
 - Fesoasoani faamama avega mo Atina'e Faifaiva - \$231,266
- 5) Vaega Maoti mo Fesootaiga Faaneionapo:
 - Poloketi mo le siitia o auunaga faatekonolosi - \$138,003
 - Unaia atina'e tau fesootaiga faaitulagi - \$16,300
 - Faalauaitele malamalamaaga tau fesootaiga i Samoa nei - \$55,401
- 6) Vaega Maoti o le Siosiomaga;

- Polokalame a le Pasefika e tapena ai mo Suiga o le Tau – 183,576

7) Vaega Maoti o Tupe;

- Poloketi e Tali atu ai i a’afiaga o le Faama’i o le Koviti 19 - \$3,906,962

Upu Faaiu:

Lau Afioga i le Fofoga Fetalai ma le Mamalu o le Fono.

O lenei Tala Faaopopo Muamua o le Tupe ua faia ma le talitonuga maumaututu, ua lelei tapena ma ua talafeagai mo lenei vaitau e lagolagoina ai le sini autu “Ia tatou lalagaina faatasi se lumana’i manuia ma mausali mo Samoa”. Ua maua le tala fiafia ua manuia taumafaiga a saienetisi suesue faapitoa mo se vaifofo o le faama’i pipisi o le Koviti 19. O lona uiga ua le o toe mamao ona oo mai lea o le faasoia i lo tatou itulagi ma vave faafoisia le soifuaga i uiga masani sa iai muamua. Mo lo tatou Malo, o lo’o faataua pea lana vaai mamao i le lumana’i, ina ia tatou tapena mo aso uma. Ou te fiafia fo’i e faailoa atu, e le o iai se siitaga i le faasiliga o tupe alu i tupe maua e fua i le tamaoia i lona faatulagana masani. O le tausisia o lea alafua e mautinoa ai le maua pea e Samoa o le avanoa i le lumana’i e toe fetuuna’i ai ana tupe pe a tula’i mai ni mala faalenatura po o ni faamai pipisi e moomia vave ai gaoiga talafeagai mo le pui puiga ma le saogalemu o tagatanu’u Samoa uma.

Lau Afioga i le Fofoga Fetalai, faapea Sui Usufono o le Palemene,

Avea a’u e fai ma Sui o le Malo, e momoli atu ai alofa’aga ma faamanuiaga i lau Afioga i le Fofoga Fetalai, le mamalu o le Palemene nei aemaise le tapua’iga a Samoa, ia maua se Kirisimasi fiafia ma se Tausaga fou manuia. Soifua.

FOFOGA FETALAI: Malo saunoa. E tusa ai ma Tulafono Tumau, o le a tuuina atu le Tala Faatatau o Tupe Faaopopo (Nu 1) 2020/2021 i le Komiti o Tupe Maua ma Tupe Totogi mo le iloiloaina, e le itiiti ifo i le 14 aso, ona toe lipoti mai lea i le Fono Aoa o le Fonotaga o lumanai.

**TULAFONO TAU FAAOFI O LE TEUTEUGA O LE FAAVAE 2020
– iloiloaga auiliili**

FOFOGA FETALAI: E tapa lau Afioga i le Minisita e faasino i ai lenei Tulafono.

Afioga Hon FAAOLESA KATOPAU T. AINUU (Minisita mo le Matagaluega o Faamasinoga ma Pulega Tau Faamasinoga): Lau Afioga i le Fofoga Fetalai, ona o le taua tele o lenei Tulafono faatasi ai ma Tulafono e 2 o lo o sosoo mai. Ou te tatalo atu ai mo se faatagana e tuuina atu ai se saunoaga faa-Minisita, i le mataupu e tusa ai ma le Vaega 63 o le Tulafono Tumau.

FOFOGA FETALAI: Saunoa lau Afioga.

SAUNOAGA FAA-MINISITA AFIOGA I LEMINISITA O FAAMASINOAGA MA PULEGA TAU FAAMASINOAGA

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga): Lau Afioga i le Fofoga Fetalai, faafetai mo lou avanoa. Ou te talitonu ua ta liu le sa o le tautai matapalapala. A ua fana foi le u i le vateatea i talosaga molia a lau Afioga i le Fofoga Fetalai, sa tomua ai lo tatou taeao. Ae ou te faatalofa ma ofo alofa atu i le paia faatafafa o le Maota. I le afio o lau Afioga i le Fofoga o le Fono, afio le Taitai o le Maota le Afioga i le Palemia, le Kapeneta ma Minisita Lagolago. Faatalofa atu foi i lena itu o le Maota, i Taitai Komiti, alii ma tamaitai faipule o le Palemene o Samoa. Ou te faatalofa atu i le tapuaiga a Le Ao mamalu o le Malo, faapea le Sui Tofia faapea le Faamasino sili ma le mamalu o le faamasinoga. E le galo foi le nofo tatalo mai a le aufaigaluega tofofi a le Atua i fata faitaulaga e fia, o lo o nonomanu aua se manuia o Samoa. O paia faale-aganuu, o lena ua i aao o usoga a Tumua ma Pule, ma le la tausii vaatele. Avea foi lenei avanoa e faatalofa atu ai i Ofisa o Pulega o Matagaluega ma Faalapotopotoga Tumaoti a lo tatou Malo ua mafai ona tatou faatasi i lenei taeao. Faamalo le tauatai, faamalo le onosai.

E faapitoa lau fa'amalo i le tapuaiga a si ou itumalo, Vaimauga le Sugauga, i le afio o Alosina ia Seumanutafa ma Toomalatai faapea le fuafua o Salevalasi ia Tamaseu ma Faualo. Afifio usoolii tainane le afifio o matua ma aiga sa Malietoa, faapea le fetalaiga a le faletolu ma le Vaigalelepa, ma upu ia te oe Tuisamau. Tainane le loaloa o le paia ma le mamalu o Samoa o lo o papa-aao i lo tatou itumalo.

Lau Afioga i le Fofoga Fetalai, e muamua ona ou momoli le faafetai i le Taitaifono ma le sui Taitaifono ma le Komiti mamalu a le Palemene, ma le galuega maeaea lea ua folasia i lumamea nei. Malo le onosai, malo le faafoefoe, i le faataunuuina o lenei galuega taua, sa outou fitaituga ai. Ia faamanuia le Atua i la outou Komiti.

O le galuega sa feagai ma le Komiti, e le o se galuega na faatoa amata ananafi, e leai. O le galuega lenei sa fuafua mai i le tele o tausaga.

A o tapena ma sauni si o tatou atunuu mo le avea ai ma Malo saoloto tutoatasi, o lona uiga, sa fuafua mai i lenei galuega, a o le i tutoatasi Samoa i le 1962. Ma o le miti sa silasila mamao i ai o tatou tuua sa asaina le gasu o le taeao, e i ai se taeao e tulai mai ai ni toa o Samoa, e i ai le tofa loloto ma le tofa mamao, latou te mafai ona faafoeina lelei le sa o Samoa. Ia atagia ai le pulea atoatoa e Samoa o ana measina e faavae i tu, agaifanua ma le aganuu.

Fai mai ia faamaumauga o le Fono Faavae 1960, sa faatuina e le sui o Palauli le tofa ia Toluono Lama le lafo, ina ia maoti le Pulega a Alii ma Faipule i totonu o le Faavae. Na mamafa saunoaga a sui usufono uma o le Fono Faavae, e lagolagoina le lafo faatu peitai sa tali le alii polofesa o Davidson Maidment, o ni alii loia faufautua mai Niu Sila e faapea, e lelei pe a tuu le mataupu lea se i i ai se taimi talafeagai i le lumanai e fai ai, pe a finagalo i ai le Palemene o Samoa. E talu ai e faigata tele ona talia e le Malo Afaatasi i ana aiiaiga, UN Charter i se faavae e foliga mai e i ai se faaituau i ana pulega, e tusa ma talitonuga faatemokarasi a le Malo Afaatasi ma e ono le talia ai le Faavae ina ia tutoatasi Samoa. Sa faapea mai le alii polofesa, e le malamalama laua i fangalo o sui usufono, i le taua o tu ma aganuu faapea ma le pulega a Alii ma Faipule, peitai e le malamalama latou o le a faia le faaiuga, pe tutoatasi Samoa pe leai, ona o le lavelave tele o le mataupu.

I taualumaga o felafolafoaiga o le Fono Faavae 1960 Vaega 3 lautusi 1283, sa tatalo ai ma faaoololomaa le Afioga ia Fiame Mataafa Faumuina Mulinuu II, ma le Afioga ia Tupua Tamasese Meaole i sui usufono o le Fono Faavae, ia alofagia ma lagolagoina le fautuaga a polofesa. E faataatia lenei mataupu mo le lumanai, ona o le popolega ma le atugaluga i vaemanua le tutoatasi o Samoa. Ae lelei ona faataatia le mataupu se i talia muamua le Faavae, ina ia maua le tutoatasi o Samoa. O le a silafia lava e Samoa le taimi talafegai i le lumanai, e toe faatulagaina ai lenei mataupu taua i totonu o le Faavae. Ina ia atagia ai ma maoti le finagalo o Samoa e pei ona mamafa i fiangalo o sui usufono.

Lau Afioga i le Fofoga Fetalai ma sui mamalu uma o le Maota nei, ua agai i le 60 tausaga le matua o Samoa i Faigamalo Tutoatasi. O le 2016 na faamaonia ai e le Palemene le Komiti suesue, e silasila i le anoanoai o mataupu na lagalaga i fiangalo o le atunuu, e faasino i le faafoeina o galuega ma faaiuga a le Faamasinoga o Fanua ma Suafa. I faamaumauga o lea suesuega, e latalata i le 100% nuu ma alalafaga sa faamauina o latou finagalo i le mataupu sa tagofia e lenei Komiti. O le sailiiliga o lenei mataupu, na atagia mai ai le taua o le faamalosi ma aloaia o Pulega a Alii ma Faipule i totonu o le Faavae. Ona mafai lea ona faaofi ni Tulafono e toomaga i ai atugaluga eseese, e pei ona faasoa mai ai le atunuu i lea Komiti. Faataitaiga o le Tulafono o Fono a Nu'u 1990 o i ai nei Village Act 1990. O lo o aloaia ai le Pulega a Alii ma Faipule, ae le o manino le Vaega o le Faavae e taula i ai. O lona uiga la, po o le a lava se Tulafono e taumafai e aloaia le Pulega a

Alii ma Faipule, e le atoatoa le malosiaga o lenei Tulafono pe a leai se Vaega o le Faavae e taula i ai. O le tulaga tonu lava lea ua teuteu ai le Faavae ina ia i ai se Vaega maoti e faamalosia ai ma faamautu atu i ai lenei Tulafono.

Lau Afioga i le Fofoga Fetalai, pe le o le taimi tonu lenei ua tataua ona faatauaina la tatou aganuu? Le Pulega a Alii ma Faipule ma tatou faia ai loa se tali ma se toomaga mautu, o le mataupu sa moemiti i ai o tatou tuua ua lagomau mai tiasa. E le gata i lea, a ia tali atu ai i luitau, o mataupu sa lagalaga i le lipoti a le Komiti Faapitoa faa-Palemene i le 2016. O le agaga tonu lea o Tulafono Tau Faaofi nei e 3 ua aumai i lona faitauga faatolu.

E momoli atu le faafetai i le Sosaiete a loia faapea faamasino o le Faamasinoga Maualuga, mo lo latou sogasoga ma le lagalagamea i mea lelei. E auala mai ai o latou finagalo e faatatau i nei Tulafono Tau Faaofi e 3. Ua lausilafia e le atunuu, o lo o faasalalau i luga o le ea ma nusipepa lo outou finagalo tetee i nei Tulafono, i luga o lo outou talitonuga e ono faatulai mai ai ni faafitauli, e faavae i luga o ni mafuaaga ua maea ona outou faailo. Faamalo le finafinau ona o le fia saili o ni tulaga silisili atu ona lelei mo Samoa. O le agaga lava lea e tasi tatou te naunau uma i ai, e eseese uma taofi o tagata taitoatasi o lo o naunau uma i se mea lelei. Ou te talitonu foi, e leai lava se tagata Samoa e manao e fai se mea e faaletonu ai lona aiga, nuu, itumalo aemaise le atunuu. E leai foi se Malo, e na te faamafuaina se Tulafono leaga ma le piopio, dishonest and immoral, ina ia tauvalea ai lona Malo e pei ona faasalauina e nusipepa e nisi o sui o le Maota lenei. E faali ai lo latou tetee i lenei Tulafono. Ou te matua ofo lava i nei lafoga. O le fesili e tulai mai, o lona uiga ea, e le faamaoni ma le amiotonu le mea sa miti i ai o tatou tuua. Sa talitonu latou e tulai mai tupulaga o Samoa i se taimi o le lumanai, faataunuu lo latou faamoemoe. Ae talofa e, ua faamuamua le Tulafono mai Peretania tele, Rule of Law, o lo o faavae i luga o le Tulafono lautele, Common Law and Equity ae faatuatua ai i tu ma aga a Samoa. Ou te siitia mai le saunoaga malamalama a le Polofesa Maidment i le Fono Faavae 1960, ma ua faapea mai. Ou te faamoemoe, e tele ni Tulafono o le a pasia e faaoga e Samoa e aunoa ma le tapa o Tulafono a Egelani, o lea saunoaga o lo o maua i tualumaga o le Fono Faavae 1960 Vaega 3 lautusi 1253. O lona uiga sa i ai le faamoemoe o faufautua o le Faavae o alii papalagi, e sau se taimi maua se laolao pe a tusa ai ma le finagalo o le Palemene o Samoa. O le a le toe aapa ai Samoa i Tulafono a Peretania, ae faaoga Tulafono ua mafai ona pasia e le Palemene o Samoa mo le agai i luma.

Lau Afioga i le Fofoga Fetalai, ua matua Samoa, ma e tasi lenei Tulafono e talitonu le Malo e maua ai le nofo lelei ma le saogalemu ona o le amanaia o Pulega a Alii ma Faipule i le Faavae o Samoa. Silasila la outou i le faatauaina e le Malo o finagalo ma manatu eseese o le atunuu i nei Tulafono. O lea sa toe tatala le avanoa e le Malo e auala atu i le Komiti faa-Palemene, e toe savalia ai le atunuu, itumalo atoa o Samoa, mo so latou finagalo i nei

Tulafono. E le o se mea e masani ai, o se taimi muamua leni i le talafaasolopito i galuega a se Komiti faa-Palemene ua agai ai le Komiti faa-Palemene i tua, i tua atu o ana faiga faavae e faataamilo i alalafaga ma afioaga taitasi, i le faatalatalanoaga o nei Tulafono Tau Faaofi. O le agaga, ina ia matua saausi le faatalanoaga o finagalo o Samoa i nei Tulafono. O lea la ua maea ona tali Samoa aoao, i le usoga a Tumua ma Pule, Ituau ma Alataua, Aiga i le Tai ma le Vaa o Fonoti. O tama ma o latou aiga, Aiga o nofo Aiga o tupu, Aiga o papa, Aiga Tafa'ifa.

O le fua faatatau e pei ona fofogaina e le Taitaifono o le Komiti faa-Palemene, i le maea ai o le faatalanoaga i le atunuu atoa. E tusa ma le 84% o le atunuu, latou te lagolagoina ma fausia malosi nei Tulafono, faatasi ai ma latou tuualalo i teuteuga mo le faaleleia atili. Ua talafeagai ai lou faapea atu, ua fulisia le atunuu e lagolagoina leni Tulafono. E 3% e le o mautu ma atoatoa so latou finagalo, ae o lo o i ai a latou tuualalo i vaega e tataua ona faia e faaleleia ai le Tulafono, ma e mafuli lava lo latou le mautinoa i le mataupu e faatatau i le 5 matai sao o aiga, e faatagaina i lalo o le Tulafono. Ae o le 13% e tetee i nei Tulafono, e na o finagalo lava e faaleaogaina nei Tulafono Tau Faaofi. Ae leai se toomaga, pe ofo mai foi se laasaga mo le agai i luma, option e tali atu ai i manaoga o le atunuu, e faatatau i le le amanaia o le Pulega a Alii ma Faipule i totonu o le Faavae o Samoa. Mo le faatauaina o le 13% lea e tetee i le Tulafono, i le aotelega e mafai ona ou vaevaeina i ni vaega se 4, le mafuaaga o le latou tetee.

1. O le latou popolega i le aveeseina o aiatatau a tagata taitoatasi e pei ona i ai i le Faavae o Samoa.
2. Fai mai latou o le a le toe Tafatolu le Faigamalo a Samoa, ae o le a Tafafa. O le a 2 taitai o le vaega o le Faamasinoga, o le Faamasino sili ma le Peresetene.
3. O le popolega i le tuuina atu o le faatagana e toe iloilo ai faamasinoga apili ua uma ona fai.
4. O le aafia ma puleesea o fanua faale-aganuu a Samoa, ona o nei Tulafono.

Ma ou te faamanino atu e faapea, 1. Lau Afioga i le Fofoga Fetalai, e leai, leai lava se fuafuaga o Tulafono nei e 3, e suia pe aveesea aiatatau taitoatasi e pei ona i ai i le Faavae o Samoa. O aia faale-Faavae, po o aia taitoatasi fundamental rights. O le tasi lea mafuaaga sa taliaina ai e le Malo Aufaatasi United Nations o tatou Faavae 1960, na mafai ai ona tutoatasi Samoa. E le tataua la ona aveesea e se Malo aiatatau nei o lo o i totonu o le Faavae o Samoa. E tasi lava le sini autu o nei Teuteuga, ia faaofi atu ma aloaia Pulega a Alii ma Faipule, ona e le o i ai i le Faavae o Samoa i le taimi nei. A o le ute ma le ogatotonugalemu o tu ma aga a Samoa i ana measina, ma le puipuiga o lona siomaga, e le o afaina ai aiatatau. E le o suia foi, replace e le Pulega a Alii ma Faipule le aiatatau taitoatasi. O lona uiga a fai se iloiloga a le Faamasinoga o Fanua ma Suafa, o le a le toe faa-pitotasi le silasila a le Faamasinoga, na o le aiatatau a le tagata e toatasi, e pei ona i ai nei. Ae o le

a faavae le iloiloga ina ua maea ona silasila lelei i itu uma e lua. 2. O le aiatatau a le tagata e toatasi, faapea le Pulega a Alii ma Faipule. Ua silafia uma e le Maota nei e le o mafai atoatoa e le malosiaga o leoleo po o malu o le Malo, ona gafatia atoatoa le puipuiga o Samoa, e tele le latou faalagolago i fesoasoani a alii ma faipule i le faatinoga o galuega.

O le atugaluga e faatatau i le Tafatolu o Faigamalo, e faamanino atu o lo o tumau pea le Tafatolu o Faigamalo. Ae talu ai ua faamaioio le Pulega o Faamasinoga Mauuluga ma le Faamasinoga o Fanua ma Suafa, e foliga mai e pei e 2. Ae leai, o lea lava e tasi le Faauluuluga o le Faamasinoga, o le faamasino sili.

O le atugaluga e faatatau i le toe faatagaina o le toe iloiloaina e le Faamasinoga o Fanua ma Suafa ia mataupu ua taoto ona faaiuga, tau ina ou faapea atu, e le faigofie lea laasaga, ona e faigata ona ausia ma faamalieina aiaiga e ono talia ai, se toe iloiloaina o se talosaga, judicial review.

O le mataupu mulimuli e faatatau i le puleesea o fanua tau Samoa. E toe faamanino atu, e leai se vaega o le Tulafono o taua ai po o aafia ai fanua tau Samoa. Ma e le o maoti foi a latou tetee, ni faataitaiga ma ni mea na tutupu ua puleesea ai fanua tau Samoa. E faavae o latou talitonuga i masalosaloga. O lea foi sa faamalamalama manino e le loia sili, faapea le sa avea ma faamasino sili tau ai lenei mataupu. O le tali atu lea i atugaluga e pei ona aumai, i latou o lo o tetee i nei Tulafono.

I le maea ai o le galuega fita a le Komiti faa-Palemene, o lea la na toe tuuina atu e le Malo i le Komiti Tutoatasi faapitoa i Tulafono, Independent Legal Panel, se i toe silasila i Tulafono e 3, faatasi ai ma finagalo faaalua o le atunuu e pei ona faamaopoopo mai e le Komiti faa-Palemene, ina ia mafai ona atagia lelei fautuaga ma tuualalo a le atunuu, mo le faaleleia o lenei Tulafono.

O le Komiti Tutoatasi Faapitoa mo Tulafono, sa Taitaifono ai le tamalii sa avea ma Faamasino Sili o Samoa talu ai nei, faapea se tasi o loia sinia sa avea ma Peresetene o le Sosaiete a Loia i tausaga e tele ua mavae, faapea se alo o Samoa, sa faauluulu i ai le vaega o Tulafono, Faalapotopotoga o Malo o le Taupulega, former Director of Legal Division Commonwealth Secretariat.

I le iloiloga a le Komiti Tutoatasi Faapitoa mo Tulafono, sa latou matauina ai le felafolafoaiga i le Fono Faavae 1960, le lavelave o le faaofi atu o Pulega a Alii ma Faipule i totonu o le Faavae. Talu ai ona e le o taoto lelei i le agatonu le ituaiga faatemokarasi e tusa o tu ma aganuu faa-Samoa, ma le faatemokarasi o lo o talia i aiaiga o Malo Afaatasi le United Nations. O le mafuaaga tonu foi lea sa atugaluga ai alii polofesa faufautua o Davidson Maidment i le taimi o le Fono Faavae 1960, ina ne i avea le lavelave lea, e toe tolopo ai le saolotoga ma le tutoatasi o Samoa i le 1962. O lea na toomaga ai loa le Fono Faavae, e tau lava o se malosiaga a le Palemene o Samoa ia mafai ona faatulaga le Faamasinoga o Fanua ma Suafa e pei ona i ai nei i le

Vaega 9 o le Faavae o Samoa. O leni faiga ua faia ina ia faamalieina ai aiaiga a Malo Afaatasi ma le tutoatasi o Samoa.

Ae o le a silasila mamao, o le a silafia e le Palemene o Samoa le taimi talafeagai e faamautu ai Pulega mamalu a Alii ma Faipule, i totonu o le Faavae o Samoa. Lau Afioga i le Fofoga Fetalai, e taua le oototoga e pei ona fofola atu i luga, i le amataga o leni mataupu. O le taimi tonu leni e faatino ai loa le miti, e tali ai finagalo o tatou tuua, e tusa ma latou fesili lea e faasino i Pulega a Alii ma Faipule. O lo o taoto i paga i luma o le Palemene mai tausaga e tele ua mavae. Lau Afioga i le Fofoga Fetalai, o le mafuaaga tonu lea ua tuuina mai ai Teuteuga nei o le Faavae, Constitutional Amendment Bill 2020, faatasi ma le Tulafono o Fanua ma Suafa 2020. Aua o lo o mafai ona fai leni teuteuga i lalo o le Faavae o Samoa. Lau Afioga i le Fofoga Fetalai, e le mafai ona tatou faamaonia ni masalosologa ma tuuaiga ogaoga o lo o agai mai i le Malo, e faatatau i leni Tulafono, seiloga lava e pasi leni Tulafono pe implement. O i ina faatoa silafia ai le mea moni, pe faamaonia nei atugaluga, masalosologa ma mafaufauga tetee o i ai nei.

Ae o le taimi nei, o le aoga o nei finagalo tetee, o le avea lea ma faatupu manatu mo le lumanai. E le o se mea fou i so o se Malo ni finagalo tetee o tagatanuu i Tulafono Tau Faaofi. Ae le tuua ai lava e le Malo lona tiute o le faatulai mai o Tulafono e manuia ai le atunuu, e tusa ma lana silasila mamao. O se faataitaiga o le tau faaofiina o le Tulafono e sui ai le itu e feoai ai taavale i le alatele. Sa tele na solo tetee, ma ni tusitusiga faapea ni faasea ogaogga agai i le Malo. O lea tatou te silafia lava le iuga o lena mataupu. Ina ua faatino le Tulafono ma ua sologa lelei ma manuia o tatou tagata.

Lau Afioga i le Fofoga o le Fono, talosia o faamalieina le faafogafoga a le Maota leni aemaise le tapuaiga a Samoa, i se manatu e fesoasoani ai i le faamalamalamaina o sini autu o nei Tulafono e 3.

Afai foi e le tau lelei la outou faafogafoga i se vaega o leni folasaga. E potu lava le tautai ae le atoa ia i liu o lona sa. Ae talitonu o le a vaatele i lou finagalo se vaivaiga, aua o le sa o Samoa e fautele.

Avea foi leni avanoa e momoli atu ai moomooga alofa i lau Afioga ma le paia o le Maota, faapea le faafogafoga tapuai a Samoa. Ua tatou tulata nei i le faamanatuina o le soifua mai o lo tatou Alii Faaola. E momoli atu ai faamanuiaga mo se Kerisimasi fiafia ma se Tausaga Fou manuia. Ia manuia le Fono Usu a Samoa. Soifua.

FOFOGA FETALAI: Malo faafetai. Malo saunoa i lau Afioga i le Minisita e fitoitonu i ai leni Tulafono.

Tulai mai le sui usufono mo... lau Afioga Fiafame...

Afioga Hon FAUMUINA TIATIA FAAOLATANE LIUGA (Palauli le Falefa): Lau Afioga i le Fofoga Fetalai, a o le i saunoa le Sao Faapito, ou

te faatu le lafo. *E tuuina i le Laulau a Fono le saunoaga a le Afioga i le Minisita.*

Ma lou faaaloalo.

Faaluaina e le sui usufono mo Anoamaa Sisifo.

Na faamaonia le lafo ma tulai ai le Saunoa Faa-Minista a le Afioga i le Minisita ua faataatia i luga o le Laulau a Fono.

FOFOGA FETALAI: Ia, ona o le tatou galuega o lo o fia faagasolo, ou te tapa ma le faaaloalo ne i te i foi ua tuuaina le Nofoa i le le tuuina atu o se avanoa.

Tulai mai Fiamē po o le a se mea...

Afioga Hon Fiamē Naomi Mataafa (Lotofaga): Ioe, faafetai tele i le avanoa i lau Afioga i le Fofoga Fetalai. E faatalofa atu foi i le Maota i lenei taeao fou.

O le tulaga lea o le tulai atu o le faagasologa o le tatou galuega. O lo o tau matau atu aemaise le faatulai mai o Tulafono nei e 3 faatasi ai ma le Lipoti a le Komiti. E matauina lau Afioga i le Pepa o Galuega o lo o aumai ai le Lipoti a le Komiti ae le o faanumeraina. Ia, pei e tulaga ese foi lea mai a tatou faiga masani. Ae ou te fia tuliloa ma talosagaina se finagalo faaalua o lau Afioga i le Nofoa, aua o lea faatoa tufa mai nei e le tatou Ofisa le Lipoti a le Komiti sa nafa ma le iloiloa o tatou Tulafono nei e 3. E matau atu i le faagasologa o le galuega o lo o i ai le faamoemoe o le a laa atu loa pe a vaai atu i le tatou Pepa o Galuega i le iloiloa auiliili ma le faitauina faatolu.

E tusa ai ma Tulafono Tumau lau Afioga i le Fofoga Fetalai, e talosaga atu i se avanoa e mafai ona faitau lelei ai i le Lipoti a le Komiti, tainane foi lea faatoa fai le Saunoaga Faa-Minisita e tusa ai foi ma nei Tulafono, ma e matauina pe 4 foi Saunoaga Faa-Minisita a le Afioga i le Palemia i Tulafono lava nei. O lea la e saili atu ai se avanoa i lau Afioga i le Fofoga Fetalai e tusa ai ma tatou Tulafono Tumau i le avanoa e mafai ona faitau ma malamalama ai sui usufono i Lipoti o lea faatoa faataatia i luga o le Laulau a Fono.

FOFOGA FETALAI: Malo. Faafetai ua maua atu le saunoaga a lau Afioga i le Sao Faapito, ma ou te manatu, ua loa foi aso o tatou galulue i le galuega a le Palemene, ae le gata i lea a o le taimi foi sa tulai mai ai i le mamalu foi o tofiga o le Kapeneta, ma e le fou foi lea tulaga i le faagasologa o galuega ma le tuuina mai o pepa aua le faatinoga o le tatou galuega. Ia, e pei e faapena se lagona e le fou le tulaga o le faagasologa o le auaunaga a le Ofisa o le Fono. O tulaga masani ia, toeitiiti lava tupu i fonotaga uma ma ua ou manatu, o lea lava e maua avanoa, ma o lea foi o le a faamanino, e le gata

i le Saunoaga Faa-Minisita, a o lea foi masalo pe tulai mai foi le Taitaifono ia pe faatu mai foi e fia saunoa e faamalamalama nisi o mea, ina ia faapena ona manino atili ai le Maota.

O le mea la lea, o le a faataatia ese galuega a le Fono Aoa mo le tatou malologa ona toe taliu mai lea ona faagasolo lea o le tatou galuega. Ou te faasilasila atu ua faataatia ese Galuega a le Fono Aoa mo lana malologa masani.

Ma ou te faasilasila atu ma le faaaloalo, ua tapenaina nei le Maota o Tofilau Alesana mo le taumafaga ti i le taeao ona ua tulaga faaletonu a tatou faleie e pei ona tapenaina ona o le malosi o le louloua o le tau. Ma lou faaaloalo. Faafetai.

Na faataatia ese Galuega a le Fono Aoa mo lana malologa masani i le itula e 10:58 i le taeao ma toe faaauau i le itula e 11:40 i le taeao.

FOFOGA FETALAI: Ou te faasilasila atu ua toe amatalia tualumaga ma galuega a le Fono Aoa, ma ua manatu ua maua foi le faaopoopoga o le malosi e ala i le taliga o le sua ma le taumafataga i le itula ua sola ma o le a faaauau le tatou galuega.

E tusa ai ma le Tulafono Tumau e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona faatoa sagai atu ai loa lea i le iloiloga auiliili.

Ma ou te tapa ma le faaaloalo le Taitaifono o le Komiti Faapitoa a le Palemene mo lena Tulafono e tulai mai.

Afioga Hon GATOLOAIFAANA AMATAGA ALESANA GIDLOW (Taitaifono o le Komiti Faapitoa a le Palemene): Faafetai i lau Afioga i le Fofoga Fetalai mo sou avanoa. E talosaga atu mo sina... ae le i faatuina le lafo, o sina upu lava e tau ina fono faapipii i le saunoaga matagofie a le Afioga i le Minisita ma ootoo atu ai foi galuega sa faafeagai ma le Komiti lea i masina e tele ua tuanai.

FOFOGA FETALAI: Malo. Saunoa lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai. Ia, lau Afioga i le Fofoga Fetalai ma le maualuga o lena Maota, ae a le afifio o sui usufono mamalu o le Maota o le Fonousu a Samoa ma le faafofoga mai a Samoa i ona paepaesa ma maota tapuai, o le fisaga agi o lo o puea ai pea le la o le sa folau o lena Palemene i le latou faanonogamanu ma le tatalo e le aunoa.

Maota i ni auala e faaleleia ma siitia ai le Faamasinoga o Fanua ma Suafa, ma e matauina fautuaga tele nei a le Komiti Suesue na mafua ai nisi o faatulagaga o aiaia i totonu o Tulafono Tau Faaofi nei.

O le Fautuaga 1, ia faatulaga le Faamasinoga o Fanua ma Suafa, ia tutusa le faataua ma le aloaia e pei o le Faamasinoga o Soligatulafono.

Fautuaga 15, ia i ai i le Peresetene le malosiaga e toe iloilo ai ni faaiuga ua faaletonu errors and omissions pe a talosagaina. O le tali a le Faamasinoga i nei fautuaga i le latou tusi sa saina toalua mai ai le Faamasino Sili ma le Peresetene.

Mo le Fautuaga 1, o le tali e faapea; e taua tele fautuaga, ae ao ona silasila totoa i se faatulagaga e ausia ai faamoemoega o le fautuaga.

Mo le Fautuaga 15, o le tali, e taua mafuaaga o le fautuaga mo le toe iloiloina o ni faaiuga ua faaletonu. Peitai, e tatau ona silasila totoa i se faatulagaga talafeagai e faatino ai e pei ona faavasega i ituaiga o faaletonu e agavaa ai.

Lau Afioga i le Fofoga Fetalai ma lenei Maota, o le tali lena a le Faamasinoga i nei fautuaga e lua taua a le Komiti Suesue, lea ua faatino i nisi o faatulagaga i nei Tulafono Tau Faaofi na iloilo e le Komiti Faapitua. O nei la Tulafono Tau Faaofi, o le taunuuga o le galuega a le Komisi Suesue ma lenei Maota, i le 2016. Mo le faaleleia ma le siitia o le Faamasinoga o Fanua ma Suafa e ala i la outou fautuaga na pasia e lenei Maota. Ae o le talaaga lena o lenei galuega e afua i le tausaga muamua o lenei Paeiga o lea ua tauaoina e le Maota lona taunuuga i le tausaga mulimuli o lenei Paeiga i lenei taeao.

Ua logo faa-Tutuila mafuaaga o le afua lalaga o le Malo ona o le anoanoai o faitioga i le Faamasinoga o Fanua ma Suafa na faatoai i le Malo ae noatia ona o le va vavae o itutino fefaatauaiga o le Malo ae ua le tasi foi pe lua ni saunoaga a le Taitai o le Malo i lenei Maota i mafuaaga ia e naunau ai le Malo e tulituliloa le faaleleia o le Faamasinoga o Fanua ma Suafa, aemaise o le matuia ma le ogaoga o taunuuga ma aafiaga o iuga i measina a aiga pe a sese faaiuga. Ae manino ma malamalama ia tulaga ia i tatou, sui usufono o lenei Maota o agai i le faamasinoga, ae tainane le mamalu o le atunuu.

Lau Afioga i le Fofoga Fetalai ma sui usufono mamalu o lenei Maota, e ui foi i finagalo lagalaga o nisi o le atunuu i nei Tulafono Tau Faaofi, e taofi le Komiti, o le faaalua o finagalo o tatou tagata i nei Tulafono Tau Faaofi, o se ata lelei e molimau ma atagia ai faigamalo temokarasi maloloina, i avanoa ma le naunau o tagatanuu e faaali o latou finagalo i mataupu e talanoaina e lo latou Palemene ma fai ai ni o latou sao i tonufai o le atunuu mo le manuia alualu i luma o lo tatou atunuu.

Ae o se vaaiga aoao i nei Tulafono Tau Faaofi, e ao lava ina manatua itu taua nei e 2;

(1) e i ai mafuaaga na afua lalaga ai nei Tulafono Tau Faaofi.

(2) e i ai faamoemoega lelei o nei Tulafono Tau Faaofi.

Mo mafuaaga e molimauina faafitauli o feagai ma le atunuu e autovaa i le faamasinoga ae faapea foi luitau i le lotoifale o le auaunaga.

O le io ma le atoatoa o faamoemoega o Tulafono Tau Faaofi, e fesootai i mafuaaga ua faia ai, o le manino lea o faafitauli faapea ma le manino o le fofo ua taumafai nei Tulafono Tau Faaofi. A o le faataua o tu ma aganuu faapea le faamalosia ma le amanaia o a tatou pulega faaleaganuu o lo o i aao o alii ma faipule o afioaga ma alaalafaga. E tusa o le fatu o nei Tulafono Tau Faaofi e fesootai lelei ma le faaleleia ma le siitia o le tatou Faamasinoga o Fanua ma Suafa. O le soofau lea o mafuaaga ma faataua ua mafua ai nei Tulafono. O nei foi faataua, o faamoemoega lelei o lo o ogatotonu i suiga i le tatou Faamasinoga o Fanua ma Suafa. O le aotelega o Tulafono Tau Faaofi, o le alafua lea ua faataoto e le Malo e foia ai faafitauli o fetaiaia ma mafatia ai o tatou tagata e agai i le Faamasinoga o Fanua ma Suafa.

O le faamalosia ma le amanaia o pulega a alii ma faipule, o se mataupu o lo o faamauina manino e pei foi ona saunoa ma agai i ai se faamatalaga a le Afioga i le Minisita, i le lipoti o felafolafogaiga a le Fono Faavae i le 1960. Sa iloga ma lagolagoina. O lona uiga, e le o se manatu faatoa tupu ae nei i Taitai o Samoa i lenei vaiata, ae sa taoto mai ai. O se taimi i le lumanai e pei ona manino i upu a le alii faufautua ia Dr. James Davidson Maidment o lo o avanoa pea le pulega a le Malo e fai ai lava fuafuaga e ono manaomia i le faagasolo i le lumanai. Ma e talu ai la i le tele naua o faalavelave ma le tele o gaosa e pei ona faafeagai ai nei ma le tele o le Malo i lenei vaiata, e le taumate o le ala lea ua le mafai ai ona aiaia faatasi ai lenei lava mataupu e pei ona laga mai e le Tofa ia Toluono i totonu o lenei Faavae. Ua i o tatou agaga uma lava lea mafaufauga e tasi, ma ona o vaiata nei ma mea o lo o tatou faafeagai ai, mata o le pogai lea ua ala ai ona le aiaia ia itu i totonu o le tatou Faavae, o ia itu, o le tatou faamatai ma le tatou tu ma le tatou aganuu.

Na saunoa foi le afioga i le Taitaifono, le Afioga i le Tamaaiga ia Tupua Tamasese e faapea; e faatau atu i le mamalu o le Fono po o le a so outou finagalo ina ia tusia fautuaga ia i le Fono Faitulafono ina ia sauniunia i se taimi e vave ai le faatinoina o le pule a alii ma faipule i se Tulafono na faapea ona lagolago e le alii faufautua ia Collin Campbell Aikman faapea, afai e i ai se finagalo o lenei Fono i le pulega lea ina ia aloaia faaletulafono, e ao ona faia se fautuaga e fautuaina ai le Fono Aoaio Faitulafono ina ia faatulafonoina le pule a alii ma faipule ona mafai lea ona faaofi i totonu o le Faavae.

O nai mau maumaututu na e pei ona taumafai atu ai, o le agaga o le Tulafono ma faamoemoega nei, e le i faia faafuasei, mai lava i le amataga i le 1960 i le fuafuaina o le tatou Faavae toe lalaga i le 2016, lea ua tatou taumafai ai nei ina ia mafai ona faatino lea faamoemoega.

I le lipoti o le faitauaofai o tagata i le 2016, e 64% o aiga e alaala i fanua faaleaganuu, ae 28% e alaala i fanua umia saoloto. O le taua o lea numera, e iloa ai le toatele o le tatou atunuu o lo o soifua i aso uma i lalo o pulega a

alii ma faipule. O le toatele foi lea o tatou tagata o lo o soifua i aso uma i a tatou tu ma aganuu i nuu ma alaafaga i lalo o pulega a alii ma faipule. O le taua tele lea o le faamautu ma le aloaia o le tulaga faa-pulega o alii ma faipule, ona o le pulega lea e faamoemoe i ai le Malo mo le atiaeina o nuu, le atunuu aemaise le tausiga o le filemu.

Mo Tulafono Tau Faaofi nei pe a pasia, e avanoa le Faamasinoga e silasila tutusa i ni finauga e tulai mai i le va o tagata taitoatasi faapea alii ma faipule i totonu o afioaga ma alaafaga i lalo o le pulega a le Faamasinoga o Fanua ma Suafa, ona o le taimi nei, e tainane le mauaa ma le faavaea lelei o se faaiuga a alii ma faipule mo le atinae ma le nofo lelei o se nuu, afai ae faatautee ma aiatatau ma saolotoga taitoatasi o aiaia i le Faavae, e tafea le tofa a alii ma faipule. Ae le faapea foi e pasia nei Tulafono ona sao ai lea i taimi uma le pulega a alii ma faipule. E leai. Ae o le avanoa e silasila tutusa ai le Faamasinoga i aia toatasi ma aia toatele, ae faamuamua mafuaaga tatau ma talafeagai e faapea e nofo lelei ma le manuia lautele i afioaga. O le fai fuafua nei o aiatatau ma saolotoga o so o se tagata i aiatatau ma saolotoga o isi foi tagata, e tatau ona i ai.

E i ai le mataupu na leotele ai, ou te fia aumaia nisi o mataupu na laga a o matou faia le iloiloga o nei Tulafono lau Afioga i le Fofoga Fetalai, o nisi o finagalo o lenei Tulafono Tau Faaofi mai le taimi na faaofi ai nei Tulafono Tau Faaofi i le Maota, na lagona foi a o faatino le galuega e le Komiti e taua ai ona tuuina atu se taofi o le Komiti.

O le mea muamua, sui soo o le Faavae. E i ai nisi o finagalo sa agiga i le sui soo o le Faavae, e pei ona i ai le Tulafono Tau Faaofi o Teuteuga o le Faavae 2020. Ae ou te fia faitauina se vaega o le Saunoaga Faa-Minisita a le Taitai o le Malo i le aso 27 o Iuni 2016, na ia saunoa ai e faapea; o le mafuaaga lea tatou te suia ai le Faavae, aua e le o se Faavae na aumai e o outou tuua ma o matou matua e teu i se pusa tioata ma leoleo i tago i ai se isi. O le Faavae na aumai e taiala ai lo tatou atunuu ma tagatanuu. O lona uiga, e tatau ona fuafua lelei ina ia talafeagai lenei Faavae ma suiga o le tatou soifuaga. E leai se mea e sili atu ona leaga i lo le tatou puipui i se mea ua le fetau ma i tatou peiseai o le olaga o lo o agai i luma, ae limataitaiina tatou i ni taiala ua sola aso e fetau i ai, po ua expire, ua tofafa mai foi i tiasa tuua sa latou faafeagai ma ia faafitauli. O le sa o Samoa e faamoemoe i le Atua, ma o le tofa potu e foai mai i ona Taitai e fuafua lelei ai, e le gata ina ia aua ne i lelea ma lafoaia, ae ia faaoga le au ma le savili ma o tatou malosiaga e folau ai ina ia taunuu manuia le malaga. O le uiga lea o le soifuaga fuafua lelei, a lava tapena le lotoifale, e mauaa ma faigata ona osofia e se fili mai fafo, le saunoaga lea a le Afioga i le Palemia po o le Taitai o le Maota ia Iuni 2016. Ae a silasila foi lau Afioga i le Fofoga Fetalai ma sui usufono mamalu o lenei Maota, e 4 Tulafono o le Teuteuga o le Faavae i le Paeaiga Lona XII i le 1996-2001. E tasi le Paeaiga Lona XIII i le 2001-2006, 3 le Paeaiga Lona XIV i le 2006-2011, e 4 le Paeaiga Lona XV – le 2011-2016, ae 5 le Paeaiga

Lona XVI o lea ua tatou i ai i le 2016-2021. O le tofa poto lea a Taitai ma lenei Maota, o lo o faapea ona teuteu ai le tatou Faavae mai lea taimi i lea taimi, fai fuafua i manaoga ma talafeagai o vaitau.

O le isi vaega lenei na lagalaga ai finagalo o le tatou atunuu o le tuumavaevae o le Faamasinoga ma le faatutoatasiina o le Faamasinoga o Fanua ma Suafa. E i ai finagalo na fesiligia le mafuaaga na tuumavaevae ai Faamasinoga ma le faatutoatasiina o le Faamasinoga o Fanua ma Suafa. Ae talitonu le Komiti, e eseese lava le Faamasinoga o Soligatulafono ma le Faamasinoga o Fanua ma Suafa mai lava i le amataga, mai le taimi na faatuina ai le Faamasinoga o Fanua ma Suafa i pulega a Siamani, sosoo mai ai ma pulega a Niu Sila, e ese lava le Faamasinoga o Soligatulafono, ese foi le Faamasinoga o Fanua ma Suafa e oo mai nei lava.

O le pine o lea mau lau Afioga i le Fofoga Fetalai, o le Tulafono Faamalumu o Fanua ma Suafa 1934, na faia e le Malo o Niu Sila, na aiaia ai le pulega faapitoa o le Faamasinoga o Fanua ma Suafa i fanua ma suafa faaleaganuu, e le aiaina e se isi lava faamasinoga. O lea Tulafono 1934, e 47 tausaga mai le 1934 i le 1981 o faatautaia ai le tatou Faamasinoga o Fanua ma Suafa seia oo ina soloia i le 1981, ae le i le va foi ona tasi le Matagaluega e tautuaina le Faamasinoga lea, ae silia i le 100 tausaga o eseese ofisa sa tautuaina faamasinoga nei e 2. E pau le sootaga sa i ai, o le Faamasinoga Sili, o le tofi Peresetene lava lea, ae o gafatia i lenei vaitau. Ae na suia ina ua teuteu le Tulafono 2004, ua le gafatia e le Faamasino Sili ona tauave ma le tofi Peresetene ma tuu eseese ai loa nei tofiga. O le mafuaaga lea o le fautuaga malosia a le Komiti i lana lipoti ina ia tuuina se Matagaluega fou e patino i ai le tautuaina o le Faamasinoga o Fanua ma Suafa ina ia atoatoa le vaevaeina o le Faamasinoga o Fanua ma Suafa ma faapea ona atoatoa auaunaga e tuuina atu i le Faamasinoga o Fanua ma Suafa aemaise le tatou atunuu o lo o autovaa i ai. O upu a le Tusi, e le mafai ona 2 ni matai e auauna i ai se tasi, aua e alofa ai i le isi ae ita i le isi. O le atoaga lea o le tuueseeseina o le Faamasinoga o Fanua ma Suafa ma atili faaleleia ai lea faamasinoga aua lava le faamautuina o measina a tagata Samoa.

O le isi vaega o fanua faaleaganuu lea foi sa pai i ai le Afioga i le Minisita, ma ou te talitonu o le a lava lea, o le a le oo i ai se faamatalaga, ua lava le saunoaga a le Afioga a le Minisita a le vaega lea o fanua faale-aganuu. E leai ma se afaina o lea vaega i totonu o Tulafono nei e 3. O le vaeluaina o le faamasinoga, lea e faapea ai ua 2 faauluuluga. E i ai foi finagalo e faapea, o le a tafa-fa le Malo. O lea foi na saunoa i ai le Afioga a le Minisita. Lau Afioga i le Fofoga Fetalai ma sui mamalu o lenei Maota, e tasi lava le itutino o le Faamasinoga, pe 2 pe 3 pe 10 foi ni faamasinoga ae tasi lava, e i lalo uma lava o le faamalu o le itutino o le Faamasinoga. E pei foi o le Palemene lenei, e ese le Fono Aoao Faitulafono, lau Afioga i le Fofoga Fetalai, o matou o sui o le Palemene, ese foi le Palemene e aofia ai Le Ao o le Malo ma le Fono Aoao, a e i lalo uma o le itutino e tasi o le Palemene, e leai se eseese.

O le faamasinoga a Niu Sila, e i ai le faamasino sili o le Faamasinoga sili, e i ai foi le faamasino sili o le Faamasinoga faa-itumalo, e ese foi le faauluuluga o le Faamasinoga a Maori ia, e ese foi le faamasino o le Faamasinoga o Talosaga. Ae tasi lava le sifi, o le faamasino sili o le Faamasinoga sili lea. E palefeagai ma le Palemia o le Pulega ma faatonu ma le Fofoga Fetalai o le Palemene. O tumutumu ia o Tafa-tolu fefaatauagai, o le le faavaea lea o le mau o le a tafa-fa le Malo.

Avanoa faaopoopo o Faamasinoga o Talosaga ma Iloiloga, ua i ai foi le manatu o le a le mea ua ala ai ona toe faatu mai le isi vaega lea o le Faamasinoga o Talosaga ma Iloiloga. Ae talitonu atoatoa le Komiti, o lea ua taoto i le agatonu le Faamasinoga o Fanua ma Suafa. Ma o itu taua e 2, aua lava ne i galo ia te i tatou, o le taua o measina a aiga ma lona 2, o le faavavau o faaiuga a le Faamasinoga o Fanua ma Suafa e noatia ai tupulaga e le i soifua mai. O oo'ooga na, e matua talafeagai ai avanoa ua faatulaga ai nei, e mafai ai ona toe asia se faaiuga po o sao atoatoa, faapea ai ma le avanoa fou o le Faamasinoga o Talosaga ma Iloiloga.

Ua i ai foi nisi manatu faapea lau Afioga i le Fofoga Fetalai, ua aiaina e le Malo ia le faamasinoga. O lenei Tulafono Tau Faaofi, e leai lava se aiaiga faapea o i ai. O tofiga uma o faamasino o le Faamasinoga o Fanua ma Suafa, e tofi e Le Ao o le Malo o Samoa i lalo o le fautuaga a le Komisi o le Faamasinoga o Fanua ma Suafa. E le tofia e le Malo, e tofi lava e le Komisi o le Faamasinoga o Fanua ma Suafa, ma o lo o malupuipua lava le tutoatasi o le faamasinoga, i le faiga o ana faaiuga e aunoa ma le aia atu i ai o le Malo po o le Palemene.

Ia o le isi vaega lea o le faatulagaina o matai lau Afioga i le Fofoga Fetalai. O lenei lava mataupu sa mafuli i ai le tele o finagalo, ina ia saoloto pea aiga e filifili pe tai fia matai sao o latou aiga. Ae malamalama lelei le finagalo o le Malo na faatulaga mai ai, ona o faafitauli o lo o matau i le toatele o matai sao. E noatia ai atinae o aiga o lo o fai e matai sao o lo o nonofo i totonu o aiga. Ae i ai foi le tiute o le Faamasinoga o Fanua ma Suafa, e puipui le malu o nei measina a lo tatou atunuu, ina ia aua ai ne i soona faia, aua o le tele o..... o le leai foi lea o se taua. O le tele o matai o le faaitiitia foi lea o le taua o le tatou tu ma le aganuu lea faamatai, lea tatou te sapi ai. Ua mafua ai le fetuunaiga ma le teuteuga a le Komiti i lea fuaiupu.

Lau Afioga i le Fofoga Fetalai, o ni teuteuga, o ni fautuaga, ua fofoga i ai le Maota i iloiloga a le Komiti faapitoa, o le ta aofaiga lena o finagalo faaalia tuufofoga ma finagalo tusitusia. E le gata i faatalatalanoaga ma le mamalu o le atunuu, a o ni tuuga e pei ona faamauina le tapenapenaina o le tatou Faavae 1960, faapea foi le Komisi suesue lea na tulai mai i le 2016. O ia uma faamoemoega, ua liliu faalaaumamafa i ai le tofa a le Komiti, faapea foi le faufautua a le afaigaluega a le Malo, Tamaitai loia ma Ofisa o Pulega o Matagaluega sa matou galulue faatasi, ma taunuu ai i ni teuteuga ma ni fautuaga e pei ona tuuina atu.

Lau Afioga i le Fofoga Fetalai, o le a tau faaiu se tala a le Komiti, ona fai lea o le matou faafetai. E le faigofie lenei galuega na faaee mai e le Malo. Ae na mafai i le alofa o le Atua na taitai, puipui ma musuia le vaivai, o le faafetai lea i le Matai.

E faafetaia foi le mamalu o le atunuu sa autovaa mai i Tiafau, ma tatou feiloai ma togiaso i lenei galuega. Faapea le atunuu lautele na tali valaau i le sosopo atu o le Komiti i afioaga ma alalafaga. O le matau a le Komiti, e na ona tatou faitau eseese lava, ae tasi lava le faamoemoe ia malu a tatou measina, lelei le tatou Faamasinoga ma manuia o tatou tagata. O a foi ni lagona, tatou lafoai ae tuli i luma so tatou ai, aua Samoa o lo o tapuai mai.

Foi mai i lenei Maota, faafetai tele i lau Afioga i le Fofoga Fetalai ma sui uma o lenei Maota mo la outou tapuaiga. Faafetai atu foi i lau Afioga i le Taitai o le Maota, mo le faamaite mea lelei, mo le manuia o Samoa, faapea le faatuatuaga o lenei Maota na faaee mai ai lenei galuega taua i o matou tagata.

E faafetaia foi e le Komiti auaunaga eseese, sa lagolago ma tua i ai le Komiti, mai le amataga seia oo mai i le taunuuga o lenei galuega. Aemaise le Ofisa o le Loia sili, Ofisa o le Toefuataiga o Tulafono, Matagaluega o Faamasinoga, ae tainane lau susuga i le Failautusi ma le afaigaluega a le Ofisa o le Fono Aoao Faitulafono. E le i faigofie la outou galuega, ae sa outou le faalogologotiga, ae sa outou fesoasoani mai pea ma lagolago mai i se galuega vaivai a le tatou Komiti.

Ona fai lea o si au faafetai i sui o le Komiti. Lau Afioga i le sui Taitaifono, faapea sui mamalu uma o le tatou Komiti. Faamalo le onosai ma le faapalepale, e le i soona filifilia outou e lenei Maota. Aua e iloa lava le tama i le papa. Lau Afioga i le Fofoga Fetalai o lenei Maota, o le i'o lena o se taumafaiga a le Komiti na outou filifilia. Ae tatou o ia e sapa, o a nisi tulaga e toe matauina, o ai lava ua toe foi mai, ia silasila ane i ai ina ia toe faaatoaatoa ma atili faalelei a tatou Tulafono nei.

Lau Afioga i le Fofoga Fetalai, ou te tulai atu e faatu se lafo, *Ina ia faamaonia e le Fono Aoao le lipoti a le Komiti, o lo o fautuaina ai, ina ia faagasolo le Tulafono Tau Faaofi o Teuteuga o le Faavae 2020 faatasi ma Teuteuga.*

Faaluaina e le sui usufono mo Aleipata Itupa i Lalo ma le sui usufono mo Falealili.

Afioga Hon Fiamē Naomi Mataafa (Lotofaga): Lau Afioga i le Fofoga Fetalai, se avanoa faamolemole.

FOFOGA FETALAI: Se i faagasolo le tatou galuega e tusa ai o tulaga masani faamolemole lau Afioga.

Afioga Hon FIAME NAOMI MATAAFA: Lau Afioga e tusa ai ma le Tulafono Faatonu a tatou, Standing Orders, 107 i lona (3). Ou te tulai atu ma le faaaloalo e fia teuteuina le lafo a le Afioga i le Taitaifono a le Komiti. I le faaopoopo i ai i le lafo, upu ia o lo o i lalo i le Vaega 3 o le 107, i le noatia ma le fai fuafua, i le iloiloga o le lipoti e le Fono Aoa. O lona uiga lau Afioga e talosagaina le fia talanoaina le lipoti a le Komiti e tusa ai ma le tatou Tulafono Tumau 107 (3). Faafetai.

FOFOGA FETALAI: Ua ou manatu e le o faatalosagaina e le Komiti se isi teuteuga o le lafo. Ina ia faamaonia e le Fono Aoa le lipoti a le Komiti. O le tulaga lena, malie le sui usufono, o le a ou foi atu i lou finagalo, pe a maea ona tuuina atu le fesili.

Afioga Hon Fiamé Naomi Mataafa: Lau Afioga....

Afioga Hon Fiamé Naomi Mataafa: Lau Afioga.....

FOFOGA FETALAI: Ae ou te toe foi atu Fiamé i lou finagalo.

Afioga Hon Fiamé Naomi Mataafa: A faapea e te toe foi mai i lou taofi, ae o lea e te le i talia lau teuteuga. O fea le mea e nofo ai le teuteuga faamolemole?

FOFOGA FETALAI: Leaga o le lafo e tatau ona auala mai i le Komiti.

Afioga Hon Fiamé Naomi Mataafa: Ioe, o le lafo o le Komiti, faamolemole le Fofoga Fetalai,

FOFOGA FETALAI: Se i tulai mai le Taitaifono o le Komiti.

Afioga Hon Fiamé Naomi Mataafa: Faamolemole lau Afioga i le Fofoga Fetalai, se i e silasila ane i le 107.

AFIOGA Hon GATOLOAIFAANA AMATAGA ALESANA GIDLOW: O le lafo ua tuuina atu o le lafo atoatoa lava lena. Ma lou faaaloalo lava.

FOFOGA FETALAI: Ia o lena..

Afioga Hon Fiamé Naomi Mataafa: Faamolemole lau Afioga....

FOFOGA FETALAI: Malie le sui usufono, o le tatou Tulafono Tumau, a fai se tala a le Fofoga Fetalai, malie le sui usufono e.... E mamalu foi le

Nofoa o lo outou lagolago mai. O le mea la lea ou te faamalulu atu i lau Afioga, e lelei ona se i faagasolo le tatou galuega ona ou toe foi atu lea i lou finagalo.

Afioga Hon Fiamē Naomi Mataafa: Lau Afioga faamolemole, e fia faamauina pea, aua o lea e pei e foliga mai e le mafai ona teuteuina le lafo a le Komiti. Ae i lalo o le 107, e mafai ona tulai atu le faipule, e toe teuteu le lafo a le Komiti, o le mea lena o lea e talosaga atu ai i lau Afioga. O le pasia po o le le pasiaina o le teuteuga, o le finagalo lena o le Maota.

FOFOGA FETALAI: Malie o le faaiuga lena a le Nofoa. Malie lau Afioga o lea ua fai atu le lau faaiuga.

Afioga Hon Fiamē Naomi Mataafa: Ua lelei ua ou talia lou finagalo, ae faamolemole faamauina ane i tatou faamaumauga.

Faamaonia le lafo.

Faamaonia le lipoti a le Komiti.

FOFOGA FETALAI: O lea ua faamaonia e le Fono Aoa o le lipoti a le Komiti ma o le a sagai atu loa i le iloiloga auiliili o le Tulafono Tau Faaofi. Ma ou te faamanatu atu, o lo o maua avanoa. Lau Afioga i le sao faapito, o lo o maua avanoa e tulai mai ai e faaali outou finagalo. Ae ua ou manatu, o lou lava lea finagalo i le faauigaina o le Tulafono, a o le manatu lena o le Nofoa. O le mea la lea, o le a sagai atu...

Afioga Hon Fiamē Naomi Mataafa: Lau Afioga na e saunoa mai, e maea le lafo ona e toe foi mai lea i lau mataupu. O lau saunoaga lena.

FOFOGA FETALAI: Ae talu ai e te le o fausia ia lau fautuaga, o lea ua ou fai atu, o le a fai le faaiuga a le Fofoga Fetalai.

Afioga Hon Fiamē Naomi Mataafa: O lau faaiuga lau Afioga, e leai se avanoa e faatalanoaina ai le lipoti a le Komiti e ese mai le auiliiliga. O le uiga lea o lou finagalo?

FOFOGA FETALAI: A lea ua fai atu le...o le lipoti a le Komiti, o lea e fautua mai ai, o lea foi e auiliili, i ana fautuaga. O mea uma lava ia e auiliili o le lipoti a le Komiti. O le mea lea ou te faamalulu atu ai, o lou lava lea finagalo. Ae mafai ona faagasolo a tatou galuega ma au ai i luma lou finagalo

ina ia faapena ona faamanino. Aua o le a tatou o i mea taitasi, ona e tulai mai lea. E lua avanoa i mea taitasi.

Afioga Hon Fiame Naomi Mataafa: Faamolemole lava lau Afioga, o le tulaga la lea, o le le mafai ona faatalanoaina le lipoti a le Komiti. Ia o le lipoti lea a le Komiti, i le Tulafono lea i le suiga o le Faavae. O lea o lo o i ai vaega ua faamaumauina ma tatou faitau uma i ai, a o le tele foi ia o le saunoaga a le Taitaifono a le Komiti, e le o i ai i totonu i i. E faafefea la ona fai le mataupu lena?

FOFOGA FETALAI: Malie lau Afioga, e pei ona ou fai atu, e tagofia faatasi i le auiliiliga ia le tulaga lea. Aua o le lipoti o lo o faapena ona aumai ai iuga ma fautuaga e pei ona tuuina mai.

O le mea la lea, se i faagasolo pea le tatou galuega i tulaga masani.

O le a sagai atu le Fono Aoa o le Iloiloga Auiliili o le Teuteuga o le Tulafono o le Teuteuga o le Faavae.

E tusa ai ma Tulafono Tumau, e amata le Iloiloga Auiliili i le Fuaiupu e 2.

FUAIUPU 2: Ua teuteuina le Mataupu 4.

FOFOGA FETALAI: O lo o i ai le Teuteuga a le Komiti i le Fuaiupu 2. Tulai mai le Taitaifono o le Komiti, e saunoa i le Teuteuga.

Afioga Hon GATOLOAIFAANA AMATAGA ALESANA -GIDLOW: Faafetai i lau Afioga i le Fofoga Fetalai, ou te faatu le teuteuga i le Fuaiupu 2 e faapea;

“TEUTEUGA:

Ia suia upu o lo o i le amataga “i le noatia ai” i upu “Se i vagana ai.”

Afioga Hon FIAME NAOMI MATAAFA: Lau Afioga i le Fofoga Fetalai, ou te fia faaogaina lena avanoa e momoli atu ai le faafetai, o lea ua taatia ma ua pasia foi le lipoti a le Komiti faapitoa, sa nafa ma le tatou Tulafono lena. Faamalo lava i le Afioga i le Taitaifono, faapea foi ia sui mamalu o e sa tauaveina lena galuega. Ma o lea lava ua tatou matauina, e moni lava le saunoaga a le Taitaifono. E le o se galuega faatauvaa, o se galuega foi e vave. Aemaise i le itu, o lea o lo o aumai i le lipoti lena, e 244 nuu na oo i ai le faagasologa o le faatalanoaga. Ae i le fuaiupu lava lea, ona o lea ua tatou oo atu i le tulaga e talanoa auiliili i fuaiupu taitasi. O lea e aumai ia le mafuaaga o le suiga lena. Ona e faapea ua faia lena suiga, ina ia manino ma tali atu ai i atugaluga sese e faapea. E noatia se aiatatau taitoatasi. Lau Afioga i le Fofoga Fetalai, o lo o ou vaai i le lipoti a le Komiti.

FOFOGA FETALAI: Malie le sui usufono o lo o saunoa, tulai mai le Taitaifono o le Komiti.

Afioga Hon GATOLOAIFAANA AMATAGA ALESANA – GIDLOW: Lau Afioga i le Fofoga Fetalai, o lea ou te tulai atu, o le Teuteuga lea e faatalatalanoaina nei, o le Fuaiupu 2 faaofi, i le faaiuga o le Fuaiupu 2, seia vagana ai. O lea ua saunoa mai le Afioga ia Fiamē e agai i le Fuaiupu 2 i lalo ifo. Ae o le mafuaaga o lea Teuteuga, e faailoa ai le aso amata ma faamamaluina o le Tulafono ma le Fuaiupu 3. O lea la e le i oo atu tonu lava i le mafuaaga lea e pei ona saunoa ai le Afioga i le sui usufono mamalu, o lalo ifo o le fuaiupu 2 na o lo o i ai le mafuaaga lena.

Afioga Hon FIAME NAOMI MATAAFA: Lau Afioga i le Fofoga Fetalai. Faatonu mai e lau Afioga, sa ou faapea lava au ua tatou oo atu i le fuaiupu 2, o le fuaiupu 2 la lena, i le toe teuteuga o lo o aumai ai, o lena o lo o aumai ai le mafuaaga ua faia, ina ia manino ma tali atu ai i atugaluga sese, e faapea: E noatia se aiatatau taitoatasi.

Lau Afioga i le Fofoga Fetalai ma le mamalu o le Moata, o lea foi e faaali mai i le lipoti ma le saunoga a le Taitaifono o le Komiti. E le o i ai se aiatatau taitoatasi o aveesea. I le vaega lava o le Faavae o lo o faapena ona faatulaga mai ai. Ae paga lau Afioga, o le fesootaiga o le puipuia o le aiatatau a le tagata e toatasi i le faagaioioiga, o le faamasinoga fou lea o Fanua ma Suafa ua faatulai mai. O lena tonu o lo o i ai le popolega, i le i ai o se vaaiiga, i le aiatatau a tagata taitoatasi. Aua o le mea moni, a faapea o le auga o le suiga uma atoa lenei. O le faataua lea o aiatatau faitele, po o aiatatau a faalapotopotoga. O fea la e nofo ai le aiatatau a le tagata e toatasi.

I le ma lenei, lau Afioga i le Fofoga Fetalai, i le faagasolo o mataupu i le Faamasinoga o Fanua ma Suafa i le taimi lenei. O lo o i ai le avanoa o le tagata Samoa e avatu ai lana mataupu i le Faamasinoga mauualuga, ina ua aafia sona aiatatau taitoatasi. O le suiga lea ua i ai i le tatou Tulafono lenei, ua le toe i ai le avanoa, ona o lea ua faapea mai, o lea o le a i ai le isi fata lona 3, o le Appeal Court lea o le Faamasinoga o Fanua ma Suafa. O le a faatino e le faamasinoga lena le galuega sa masani ona fai e le Faamasinoga mauualuga, i le iloiloga o mataupu tau aiatatau a tagata taitoatasi.

O le fesili la lau Afioga e fia tuu atu i le tatou Komiti. Ua faapea mai ia le Tulafono Faavae. O le Faamasinoga Mauualuga o le faamasinoga lea na te tausia le Tulafono Faavae. Na te faauigaina le Tulafono Faavae. O le fesili la lena i lau Afioga, a ese se finagalo o le Faamasinoga o Apili o Faamasinoga o Fanua ma Suafa, ma se finagalo o le Faamasinoga mauualuga, o lana matafaioi o le faamatalaina o le Tulafono Faavae, aemaise tulaga tau aiatatau. Le felautoa’i la o ulu ia e 2, pe le o i e ono tulai mai ai. O le mea muamua lena lau Afioga. Lau Afioga e 15 foi minute le taimi?

FOFOGA FETALAI: I mea taitasi.

Afioga Hon FIAME NAOMI MATAAFA: Mea taitasi. O le tulaga la lena lau Afioga, e faapea e leai se afaina o aiatatau a tagata e le o aveesea. E moni, a o le fesootaiga o le faagaioiga o le tatou faamasinoga fou lea, ma le faamamafa ua ave i ai, e vaai le aiatatau faitele. O fea la e mautinoa ai e le tagata Samoa, o lea o le a agai atu i le Faamasinoga o Fanua ma Suafa, e i ai sona avanoa i lona aiatatau, o ia o le tagata e toatasi e faafeagai ma le aiatatau a faalapotopotoga. E pei o le mataupu lena e fia lagaina atu i le Fuaiupu lea.

FOFOGA FETALAI: Malo faafetai. Se i tulai mai le Taitaifono.

Tofa OLO FITI AFOA VAAI: Lau Afioga i le Fofoga Fetalai, ae le i tali mai le Taitaifono. E puupuu foi lava se manatu.

Afioga Hon GATOLOAIFAANA AMATAGA ALESANA – GIDLOW: Lau Afioga i le Fofoga Fetalai, pe mafai ona ou tali ina ia manino ai le vaega lea.

FOFOGA FETALAI: Se i onosai le sui usufono, aua sa ou faapea e te le fia saunoa, aua o lea ua leva ona afio i lalo Fiamē, a o lea faatoa e tulai mai. Tulai mai le Taitaifono.

Afioga Hon GATOLOAIFAANA AMATAGA ALESANA – GIDLOW: Faafetai i lau Afioga i le Fofoga Fetalai, e faafetai tele i le sui mamalu mo le faafesili. E taua ia te au le faafesili lea, ona e sao atu ai se faamaninoga ma se faamalamalamaga. O le fesili, o fea o to'a i ai le aiatatau a tagata taitoatasi? O la e to'a i le Vaega e 4 o le Faavae o Samoa. E le mafai ona aveesea se tagata, o le uiga o le teuteuga lea vagana ai, E silafia e lau Afioga i le Fofoga Fetalai, o lea o le a faatu toatasi le tatou Faamasinoga o Fanua ma Suafa. O mea uma lava la tau Fanua ma Suafa, o lea o le a aumai i i. O isi au aia e fia ma fia, aua e 10 aiatatau a le tagata toatasi o lo o i totonu o le Faavae. O la lava e te alu oe i le Faamasinoga o Soligatulafono, e maua ai lou avanoa. O la lava e saofai, e le o aveesea vagana la, ua i ai se aia faalefanua o Fanua ma Suafa a Samoa, o lea o le a lotea uma i lalo o le tatou Faamasinoga o Fanua ma Suafa. O isi uma au aia, e malupuipua i lalo o le Vaega 4 o le tatou Faavae. O la lava o lo o saofai mai le tatou Faamasinoga o Soligatulafaono, e agai i ai. Faafetai.

Afioga Hon FIAME NAOMI MATAAFA: Lau Afioga o lou avanoa lona 2. E tuliloa ai le finagalo ua faaalua ma le tali mai o le Afioga i le Taitaifono o le Komiti. A faapea e sao lau faalogo i le saunoa mai ma le tali

mai a le Taitaifono, e pei e foliga mai. I totonu o le Faamasinoga o Fanua ma Suafa, ona o mataupu tau fanua ma suafa e leai ni aiatatau a tagata taitoatasi o i ai i totonu o mea na. Lau Afioga i le Fofoga Fetalai, ia talofa, pe o sao lau faalogo o le tali lea a le Afioga i le Taitaifono.

Afioga Hon GATOLOAIFAANA AMATAGA ALESANA – GIDLOW: Lau Afioga se i toe faasao faamolemole. O au aia uma tau fanua ma suafa, a au lea. O au aia tau fanua ma suafa tau Samoa, o le a ou alu i le Faamasinoga o Fanua ma Suafa, a o nisi au aia i tua atu o aia ia, o le Supreme Court o lo o faatali mai mo au. Faafetai.

Afioga Hon FIAME NAOMI MATAAFA: Lau Afioga ona ua tulai mai le Afioga i le Taitaifono e le i uma atu lau mataupu.

FOFOGA FETALAI: E le i malie lou finagalo Fiamé?

Afioga Hon FIAME NAOMI MATAAFA: E leai. O lea ou te fai atu, o le mea lea, e sao lea mea i totonu o le Faamasinoga o Fanua ma Suafa, o le a leai se vaaiga i aiatatau a tagata taitoatasi? Aua o le mea lena o lea e saunoa mai ai le Taitaifono a le Komiti.

FOFOGA FETALAI: O le popolega lea e i le Nofoa, o le a tatou faia se faafinauga, e pei e foliga o tatou o faamasino. E faaali lava lou finagalo i le mea e te silafia e oe ia. Ae le faapea o le a e tapa se finagalo o i, pe fetai ma...pe sao pe sese. I lou talitonuga o lona uiga la faatoa uma i le vaiaso lea o apipa le tatou Fono. Se i tulou le faafofoga o Samoa. O lea ou te iloa le uiga o lo outou finagalo ia toso le tatou Fono. Ae malilie, se o le tofa i le faletele. Lau Afioga i le Sao Faapito, o oe le isi faletele, e tofa i ai le Palemene. Faafofoga Samoa e faapena, o lo outou lea finagalo, ae ese foi le finagalo o le Taitaifono. E anoano ma toatele i latou foi, sa veloaso i ai i le Tulafono ma lona teuteuga. Afai nei tatou te o e saili po o fea le sao a o fea tonu lava e i ai le mata o le peni tulou. O lona uiga e le gata i le Palemene, a ua fale faamasino. Ae tasi lava na o le Atua, o le tiute o le Atua o le faamasino o tatou. A o le tiute o le tagata i le tagata o le fautua. O le fautua, aumai le fautuaga ona taoto mai lea. ua leva foi ona...o oe le isi Palemia e sosoo pe ana e le see atu i ina. Ae malie lau Afioga, faamama le tatou galuega. Alofa mai foi i le Fofoga Fetalai.

Afioga Hon FIAME NAOMI MATAAFA: Lau Afioga i le Fofoga Fetalai, e lelei lava le tatou o pea i luga o le laina. Malie lou finagalo, e matou te le o i ai se agaga faapea e toso le tatou Fono. O lea ua leai se avanoa matou te talanoa ai i se tulaga lautele i le lipoti a le Komiti. O lea la o le a fai le mea lena i i le mea lea, ona pau lea o le matou avanoa.

E tasi ae foi i lou finagalo, ia lena foi tulaga ua e saunoa mai ai, i lou Palemia. Ailoga i se a o le a ta talanoa ai fua i lena mea, aemaise o lea o le a malolo lau Afioga.

FOFOGA FETALAI: Malo faafetai. E faapena ona fai ma vavae foe ma faamanatu atu. Leaga e i ai le upu foi lea. E nofo magalafu e iloga malala ola. Se e iloga lava tofa i totonu o le Palemene. E iloga lava le tofa i totonu o le Palemene. O ai le isi tofa? Ae nofo magalafu e iloga malala ola. Se e iloga lava tofa i totonu o le Palemene. Ioe. E iloga lava le tofa i totonu o le Palemene. O ai le isi tofa? O lau Afioga i le Sao Faapito. O le isi tofa lea e faamoemoe i ai le Palemia ma le Kapeneta ma le Palemene, aemaise lava o au o le Fofoga Fetalai. O le mea la lea, ia, se i tu mai Olo se i fai po o le a se... aua ua ou matau atu e tofu lava outou ma le... e le mafai ona misi mea taitasi ma le tulai mai. Se i tulai mai pea, tatou o ai pea i le tulaga lea se i...

Tofa OLO FITI AFOA VAAI (Salega Sasae): Ia, e faatalofa atu i lau Afioga, faatalofa atu foi i le paia maualuga o le tatou Palemene. Ia, ai e faapea o le a fai sau lauga faa-taupou i mea taitasi ia aua o lea ua... Lau Afioga i le Fofoga Fetalai, e ui lava i se lagona i le tulaga o tatou Tulafono Tumau 108, i le le mafai ai lea ona talanoaina se Lipoti a se Komiti i le taimi ma le aso e aumai ai, ia ae ona o lou finagalo, o le a faapupuu ai lava matou tala, e leai foi se agaga e tau toso le tatou fonotaga, e ava tele. Ae o lea la ua manino le tulaga lea sa ou fia fesili atu ai i mea ia o aiatatau a lo tatou atunuu i mea ia tau suafa ma mea tau fanua Samoa ma mea uma ia, o lea la ua le oo i luga i le Supreme Court e tusa ai ma le Vaega 4 o le Faavae. Ae o lea la ua gata i lalo i i, o lona uiga, uiga, ua le usitai la lalo i i i luga i o.

Lau Afioga i le Fofoga Fetalai, o le isi au fesili ou te fia malamalama ai, po o fea lea e faavae ai le communal rights lea e i lalo o le Tulafono Faavae lea o le Tulafono lea o Fanua ma Suafa. Po o gafea o le Faavae o lo o faatonu mai ai e ao ona i ai ni communal rights i totonu o le tatou atunuu. O le fesili lena ma le agaga faaaloalo.

Susuga Hon LAAULI POLATAIVAO LEUATEA: Lau Afioga i le Fofoga Fetalai e fia maua sina avanoa faamolemole.

FOFOGA FETALAI: Se i tuu atu le avanoa i le Taitai o le Maota.

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai o le mea e fia faasao. O le mea lea e fia faasao, ua uma ona... umi lava o sausaunoa i le tatou Tulafono Tau Faaofi, Tulafono uma ae le i avea i o i le Komiti. O lea la ua foi mai le Lipoti a le Komiti lea ua taoto i le tatou fonotaga lea ua faagasolo,

lea foi faatoa tatou... e tutusa uma lava le taimi na tatou tilotilo ai i Lipoti nei. O lea ua sausaunoa auiliili, o au ou te tau fiu ou te fia malamalama po o le a le eseese o le auiliili ma le talatalanoaga. O lea tatou te talanoa i le Tulafono, ma e sili atu le talanoa auiliili faatatau i le Tulafono i lo mea ia e tau vaai atu e tau aumai. Tatou te le o talanoa e a, o lea tatou te talanoa ma auiliili le Tulafono.

O le tulaga foi i mea ia o aia, e alu atu le Tulafono tuaoi. Afai lava o le Tulafono lea ua alu atu e pasia e le Tulafono e lote e lea court ma lea vaega, o le tulaga lena. E vaevae atu ai e le Tulafono i inei, e faatonutonu atu ai galuega a le Faamasinoga o Soligatulafono ma Faamasinoga o Fanua ma Suafa. E faigofie, a o lenei lava e tau fesili po o fea ae pe faapefea. O i i Tulafono e pasia atu e le Maota lea, e alu atu ai tuaoi o le mea e tago i ai le isi faamasinoga ma le mea e tago i ai le isi faamasinoga.

FOFOGA FETALAI: Malo faafetai.

Susuga Hon LAAULI POLATAIVAO LEUATEA: Lau Afioga e fia maua se avanoa faamolemole.

FOFOGA FETALAI: Ia, se i faaiila atu le tulaga lea ua matauina ma ua faapena ona logoina le Nofoa o lo o faapena ona tau i ai se va feteenai i sui o le Palemene ona o le tulaga i le sui usufono mamalu ia Faumuina Way faapea foi le sui usufono mo le Vaimauga Sasae.

E i ai le manatu ua ou faatonuina ina ia sui atu i ina le nofoa o le sui usufono mo le Nuu Tu Taulaga i Sisifo ina ia sologa lelei le tatou galuega, leaga o lea e i ai lava le tulaga lea. Se o mea ia e le tatau ona aliali mai, tulou le faafofoga Samoa. Samoa o faafofoga mai i le mea lea ua tupu i le Palemene? Ioe. O lea ua te i lava ua va le fogavaa i le isi ma le isi, ae talu ai se i tatou o e fai lea mea pe mata e a. O lea foi na saunoa le Minisita taua ai le vevesi i le taavale. Leaga o le vaitaimi tonu lea o ou Minisita o Leoleo, vevesi, fai mai o le a feoti Samoa. Ioe. Ua a nei? Ua le iloa faatafa i le mea o le taavale e faimeaalofa mai ai Samoa ma Niu Sila. Ae fai mai Samoa, ia o le a lau outou, e uma pusa e le uma, e feoti. Ia ua a nei? Se o le mea lena ou te fai atu ai lau fautuaga faa-sui ua leva i le Maota, o lena e silafia e Fiamē leaga o matou ua leva i le Maota. Tatou o e fai ia mea, e le o se mea e leaga ai le atunuu. Tatou o e fai ia lelei, ia lelei ona faatino, ae le o se mea leaga. O le mea la lea, se i tuu atu le avanoa ia Laauli.

Tulai mai lau Susuga Laauli.

Susuga Hon LAAULI POLATAIVAO LEUATEA: Faafetai i lau Afioga i le Fofoga Fetalai ua maua foi se avanoa o se vaivaiga o lenei itumalo. O le a ou le toe falooa le afalooa o lea ua mavae atu vasa o le tatou siigataulaga i le Atua i le taeao, ua tatou faafeiloai foi le Maota i lenei vaega

o le aso. Faafetai i lau Afioga i le Minisita mo le tuleiga ma le saunoaga i le Tulafono, faafetai foi i lau Afioga i le Taitaifono ma la outou Komiti ona o la outou Lipoti. Na pau lava lea o nai atugaluga lau Afioga i le Fofoga Fetalai lea sa tau piipiiama atu ai i le taimi ua sola, ona o le Tulafono o lea faatoa lua, tolu itula na oo i ai ou mata, tulou le faafofoga a le atunuu. O lea faatoa ta vaai i le galuega na fauao faupo a le Komiti ma le Taitaifono ua 6, 7 masina o galulue ma aumai ai le latou lipoti i le Maota. A ou matau i le tulaga tau faatopetope lea e tau faatelevave ai lou mafaufau, e 100 ma ona tupu teuteuga. Ae tailo i ai ne i te i ua sasi lau vaai, ae ona o le tulaga faateleteleai, o lea e fai atu ai sou lagona lau Afioga i le Fofoga Fetalai.

O lea e faamalie atu foi i lo matou tutulai atu, aua toe pau lea o so matou avanoa ua maua e fesiligia ai mataupu ia ua saunoa i ai le Taitaifono ma lana Komiti, o le tofa lea a Samoa lea ua aumai i le Tulafono lenei. Ae a e silasila lau Afioga i le mea lea e tupu, ou te le fai atu, o lea foi tou te silasila mai ma matou vaavaai atu, o lenei lava e taumanuo, na ave le tuualalo, ave le fautuaga, ave mea uma i le tulaga ina ia taatia i lagatonu le mataupu lenei. O lea foi ua outou silasila i le Ofisa o le Faamasinoga, silasila i finagalo o le au loia, silasila i finagalo o faalapotopotoga o Malo Aafaatasi ma tulaga o Malo Temokarasi o lo o tatou faipaaga ai. O le agaga lena lau Afioga i le Fofoga Fetalai, tasi ia ae foi, o fea ea la a sulu i ai o matou manatu? O lenei sa aioi atu i se taimi e mafai ai ona lauiliu ia te au nei ma lou sui usufono, e 100 ma ona tupu teuteuga nei. Ae o le a faapefea ona faateleai faapenei, e leai se potu leai se vave na te mafai ona lauiliu lenei Lipoti mafiafia pei se Tusi Paia? Ia o lena ua fai atu se lagona, o lea faatoa tasi le aiaiga, o lea ua matou tulai atu, ae paga lea o lea e faapea mai e poloka atu? E le o le agaga lena lau Afioga i le Fofoga Fetalai. O le agaga faamalamalama ma lagona finagalo o e e le o lagona leo. Ia ma le faaaloalo.

FOFOGA FETALAI: Malie lava le sui usufono Laauli se i tuu atu le avanoa i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, ou te fia tali lava i le saunoaga a le sui usufono mamalu mo Gagaifomauga Nu.3. Masalo a tele teuteuga e le taitai ona oo i se 100 ma ona tupu. A outou tagai i le Faavae, pe na o le 3 ea teuteuga na e i ai, a o le tatou Soligatulafono foi, pe na o le 3 lava. Na pau lava nai teuteuga e lilifa e fai sina feoloolo, o teuteuga i le tatou Faamasinoga o Fanua ma Suafa leaga o lea faatoa tau amata. O le umi foi o le tau aumai o le tatou Lipoti lau Afioga i le Fofoga Fetalai, e iloa ai i ina le mamafa o le galuega ia matou, ia aua ne i matou tago faatumutumulima i ai, avatu aumai avatu aumai, ia tasi se matou lagona i se mea e lelei ai Tulafono nei.

O le agaga lena lau Afioga i le Fofoga Fetalai ina ia mafai ona atoatoa Tulafono aua le tatou atunuu aemaise foi o le afaigaluega o lo o latou

faatinoina. Oi, faamolemole lava lau Afioga i le Fofoga Fetalai, malie lava lou finagalo, leaga o lea e taatia le fesili a Olo; lea e faapea mai; o fea i totonu o le Tulafono lea o lo o i ai le communal rights? E moni lau saunoaga le sui usufono mamalu mai Salega, e le o sipelaina i totonu o le Tulafono. Aisea? E tofu lava le nuu ma lana tu ma lana aga, a o lea ua i totonu, o le avanoa lea ua maua e le tatou Faamasinoga o Fanua ma Suafa, o i ina lea o le a faalautele ai le tu ma le aganuu a Samoa e tusa ma le faasinomaga o le atunuu i lea afioaga ma lea afioaga. O le mea la lena e faigata ona sipela i totonu faafeagai ma le individual right, aua o le aia lava ia a le tagata, e mafai ona faatulafonoina aua e tutusa uma o tatou aia faaletagata na soifua mai ai. A o le aia la faa-tu ma le aganuu, o lena tou te silafia, e tofu lava le afioaga ma lana agaifanua, ma lana tu ma lana aga. O le mea la lea, o lea ua maua le avanoa taua i totonu o le tatou Tulafono o Fanua ma Suafa, o i ina o le a tulai mai ai ma faamautietie ai le tu ma le aganuu a Samoa. Faafetai.

Tofa OLO FITI AFOA VAAI: Lau Afioga i le Fofoga Fetalai o lota avanoa auiliili lona lua pe a finagalo i ai lau Afioga.

FOFOGA FETALAI: Ia se i faauma mai le lua a lea sui usufono.

Tofa OLO FITI AFOA VAAI: Faafetai tele lava i le Afioga i le Taitaifono ma le Komiti o lea ua manino nei, e le o ogatasi le Tulafono lea ma le Faavae. O lea ua foi ua saunoa manino le Afioga i le Taitaifono, e le o i ai i totonu o le Faavae ona e le o amanaia tele. A o le a la le mea na fai ai? Aisea na avatu ai le communal rights lea i o pe afai o la e tofu uma tagata ma rights?

FOFOGA FETALAI: Ua ou fesoasoani atu, e i ai le manatu, se agai a oe i le finagalo ua e faapena... aua e te tusitusi aao, aua ne i fanaina i le tuitui tulaga o saunoaga, aua e faapena foi ona le taligofie i le isi sui usufono, aua e tutusa lava le tali a le Taitaifono ma le tali a le Malo. O le tali a le Taitaifono, o le tali foi lea a le Malo. O le tali mulimuli lena e faamalamalama ai se mea o a latou teuteuga.

O le mea la lea ou te faamalulu atu i le sui usufono, o se tasi foi o sui usufono e faapea ona fesili iai, ioe, e fesili foi i ai i mea uma lava o le tatou fonotaga lena. O le mea la lea, ia e faapena foi ona... Se i tulai mai lava le Palemia, le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, se i fai atu lava si faasaoga lea o le faipule lea. A e talanoa i communal rights, ua e talanoa i faipule. O le faalavelave o lena e te nanu, ae te le o mafaufau o lea e tau atu

alii ma faipule. O le tagata e sili atu i le toatasi. Ia, o lea e le malamalama le sui usufono a o lea ua ou tauina i ai.

Tofa OLO FITI AFOA VAAI: Lau Afioga ou te malamalama lelei. O le communal rights o le auvaega ia e i ai aulotu, o faalapotopotoga, ia ma alii ma faipule lea e tau tuu atu i ai, lea ua tagolima atu i ai le faigamalo.

FOFOGA FETALAI: Ia, o le mea lea o lea e tupu i lau Afioga i le sui usufono mamalu, seiloga lava e tali atu le Palemia faatoa malie lou finagalo. Se e ese lou faigata i le tatou Fono.

Faamaonia le Teuteuga.

Faamaonia le Fuaiupu e 2 e pei ona Teuteuina.

FUAIUPU 3: Ua teuteuina le Mataupu 32.

Faamaonia.

FUAIUPU 4: Ua suia le Vaega 6.

FOFOGA FETALAI: O lo o i ai le Teuteuga a le Komiti i le Fuaiupu 4. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatuina le Teuteuga i le Fuaiupu 4 e faapea:

“TEUTEUGA:

1. Ia aveese upu nei mai le Mataupu 65: – vagana ai o le Vaega IX Faamasinoga o Fanua ma Suafa e avea ma Faauluuluga o le Laulau a Faamasino”.

O le teuteuga lena lau Afioga. Ia, o le mafuaaga lau Afioga lena o lo o tuuina atu i le faamautu ai o le Vaega 6 o le Faavae e faatatau i isi itutino o le tafatolu.

Susuga Hon LAAULI POLATAIVAO LEUATEA: Lau Afioga i le Fofoga Fetalai, i le ava lava ma le faaaloalo pe maua se avanoa?

FOFOGA FETALAI: Ia se i tulai mai le sui usufono mo Gagaiformauga Nu.3 le Afioga ia Laauli.

Susuga Hon LAAULI POLATAIVAO LEUATEA: Faafetai. Ioe, o ala tonu lava lea o le maumau iumaea ma tautaualemau lau Afioga, se e ava tele i lau faaiuga. O le mea lava lenei o lea e taumafai atu o le tuli tamoe o matou vaivai ma le tulaga o lo o anoanoai ai teuteuga ia e tulai mai. O le ala lava lea lau Afioga i le Fofoga Fetalai o lea matou te piipiiama ai, e le o taitai talafeauga la matou matau i a matou toaitiiti o lo o tau fesiligia Tulafono ma le tulaga o lo o faamalamalama mai, ina ia manino teuteuga taitasi.

O le ala lea lau Afioga i le Fofoga Fetalai e avatu pea, e mataga lo matou tulai soo atu ona o lo matou fia malamalama ona o le le lava o se taimi e aumai matou te fesiligia ai teuteuga a le Komiti. O le matou lea matafaioi, ae o lo o i ina le pule lau Afioga i le Fofoga Fetalai, o lo o i le Afioga i le Palemia ma le Taitaifono o le Komiti le pule. Ia, o le a le mea e le pasi ai loa le tatou Tulafono?

Susuga Hon TUILAEPA AUUEA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e matua le malamalama lava se isi i le saunoaga a le sui usufono, po o le a tonu le mea lea e agai i ai, o le a tonu le mea lea e te agai i ai? O lea e faafesili atu, aua o tatou uma lava e tutusa uma a tatou, ae ala ona matou agai atu ma malamalama i Tulafono, leaga o tatou uma a na tatou talanoa ai i le Tulafono. E faigofie lava le teuteuga lenei e sau, ae na o le saunoa saunoa ae le aumaia mafuaaga, a o lea e faafogafoga atu foi le Komiti latou ia po o le a tonu le mea lea e fia fesili ai.

Susuga Hon LAAULI POLATAIVAO LEUATEA: Lau Afioga i le Fofoga Fetalai, e leai lava se agaga e faataumatatao o lo o i ina lava le pule, pule atoatoa, full power to pass the Act. Ia na ona matou fai atu, se taimi se i faitau ma faamalamalama faamolemole. Faamolemole o la e tapuai mai le atunuu ma i latou e ona finagalo ia po o sao mea ia na aumai ai fautuaga ia outou. Na pau lea, ae le o se isi tulaga faapea e le o malamalama. O lenei fa te tau tuli tamoe faamolemole. A o le agaga lena, o lo o i ina le pule.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, mo se avanoa lau Afioga i le Fofoga Fetalai...

FOFOGA FETALAI: Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, o le Tulafono lenei ua leva ona faataatia i totonu o le tatou Maota mai ia Mati pe a po o luma atu foi. Ou te talitonu ua tataua ona lava se taimi e silasila i ai sui usufono mamalu, a avatu la se suiga, ua pei lava la o se otometi foi lele i lona finagalo ia tagai tonu lava po o le a le mea lea e alu atu ai le suiga ma le aoga o le suiga lea e avatu ai.

O mea e atili faamalosi ai le Tulafono lea na avatu muamua. Tagai foi i le mea lenei o le 15 tausaga e tataua ai ona galue faa-faamasino se e avea ma Faamasino Sili? O se mea lelei ina ia mautinoa ai le agavaa o le o le a tofia ma Faamasino Sili e tulai mai ai e faafeagai ma le tatou atunuu ma mataupu o measina a le atunuu. A tagai a la i ai, tilotilo lelei ia ona faigofie lava lea ona tatou o.

Afioga Hon FIAME NAOMI MATAAFA: Faamolemole lava lau Afioga i le Fofoga Fetalai, o se mea e fia faamalamalama. O lea ou te faitau o lea a tatou te i luga o le Fuaiupu 4 a o le Mataupu 65 lea e saunoa mai ai le Taitaifono i le Fuaiupu 4 Mataupu 66(2b). Faamolemole o au lea sa ou fia tautala i le Fuaiupu 4 lea sa i ai le tatou faagasologa faamolemole.

FOFOGA FETALAI: O le Fuaiupu 4, o lenei e sao ae fai si tele o le teuteuga ae lelei o lea ua faaali outou finagalo i le teuteuga, o lea foi e tau tuuina atu le fesili mo le teuteuga i le Fuaiupu 4. Po ua maua lau Afioga i le Sao Faapito?

Afioga Hon FIAME NAOMI MATAAFA: I, o lea ou te maua lau Afioga, sa ou fia tautala i le Fuaiupu 4 Mataupu 65.

FOFOGA FETALAI: Ia lelei. Saunoa mai lau Afioga.

Afioga Hon FIAME NAOMI MATAAFA: I lau faitau atu i le faamalamalama o le teuteuga lea, e tusa o lea e faapea mai, e Faamasino Sili lava le Faamasino Sili ia i le Faamasinoga Sili. O le faamalamalama lenei o lea e i ai i i, o le Faamasino Sili ma nisi faamasinoga e tofi i ai le Faamasino Sili, ia o ia e faauluulu i ai.

Lau Afioga, o le fesootaiga foi la lea o le Faamasino Sili ma le o le a faauluulu i ai le Faamasinoga o Fanua ma Suafa. O le fesili foi lea, a i ai se feeseeseaiga i luga o mataupu faaletulafono, aemaise o mataupu tau aiatatau, o ai e faia le faaiuga? Aua e pei o le mea lenei o lea e fai mai e leai se mea e popole ai, o lea lava e i ai le Faamasino Sili. A o le mea moni, ua eseese le tulaga ma le malosi o le Faamasino Sili i luga o aiaiga lea ua faataatia ai le

faiga o tatou Tulafono i le taimi lenei ma le faatulai mai o le Faamasinoga o Fanua ma Suafa, e tutoatasi.

FOFOGA FETALAI: Malie le sui usufono se i tulai mai le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le mea lea ou te tulai atu ai e fesoasoani atu, e le tatau ona i ai se feeseeseaiga i le va o le Faamasino Sili ma le Peresetene. O le manatu taua i i, e ala ona i ai le feeseeseaiga, leaga ua laa mai fua le isi i le matafaioi a le isi.

O le mea la lena e ono tupu ai, o la e sese, a o la e manino a le mea e agai i ai le Faamasino Sili ia, manino le mea e agai i ai le Faamasinoga o Iloiloga ma Talosaga. O le faatumutumuga lea.

O le fesoasoani atu lena, e leai se mea o le a feeseeseai ai fua, leaga o lea ua faataoto atu le Tulafono, e alu lava la le tagata ia e vaai ana ia mea. Ae ala ona felaaia, ona ua laa sese le isi i le mea a le isi.

FOFOGA FETALAI: Malo faafetai. Faamaea mai le avanoa lona 2 lau Afioga i le Sao Faapito.

Afioga Hon FIAME NAOMI MATAAFA: Faafetai tele lau Afioga. Mo lou avanoa lona 2 i le Fuaiupu lava lea. Faafetai tele i le faamalamalama faaopopo a le Afioga i le Palemia. Ia, e ui ua i ai foi se lafoga i lou finagalo o matou nei ua fai ma faalavelave i le faagasologa o le tatou galuega, ae ese le taua o nei Tulafono. O lea la ua saunoa mai le Palemia e alu a le tagata ia i lana laina, lea ou te malamalama atu ai pe a faapea o lea e manino jurisdictions. A o le mea la lea e nenefu nei, ma o le mea lava lea e tuitui atu ai i le aia tatau a le tagata taitoatasi, aua o lea pei ua aliali mai, e le o se mea lena e lilifa tele i ai le Faamasinoga o Fanua ma Suafa. Ae i ai tagata e o i le Faamasinoga o Fanua ma Suafa, o la e o ma o latou foi aiatatau o tagata taitoatasi. A alu atu la le faamalieina i i ae o lea e faapea mai i o la e sao oe ona o matou nei e vaia tulaga tau aiatatau a tagata taitoatasi, o ai la e malosi? E malosi le Faamasinoga o Fanua ma Suafa ona o le Faamasinoga o Fanua ma Suafa lea ua faatulaga nei ae taatia le aiatatau a le tagata e toatasi lea e aiaia i totonu o le tatou Tulafono Faavae?

FOFOGA FETALAI: Malo.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai o le mea e fia faasao.

FOFOGA FETALAI: Lea ua maua atu, se i tulai mai le Taitai o le Maota.

Afioga Hon FIAME NAOMI MATAAFA: Leai o le fesili lena, o mea ia e le o manino, mea na e le o manino i le Tulafono lenei ma lona tusiga.

FOFOGA FETALAI: Lea o le a faamanino atu.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lea o le a ou faamanino atua. Po o aia toatele po o aia taitoatasi, afai lava o le mea lena o lea e agai tonu lava i i i mea tau fanua ma suafa, o i e lote ai. Ua maua? Ia o le tali lena.

Faamaonia le Teuteuga.

Faamaonia le Fuaiupu 4 e pei ona Teuteuina.

FUAIUPU 5: Ua suia le Mataupu 103.

Faamaonia.

FUAIUPU 6: Ua suia le Mataupu 104.

FOFOGA FETALAI: O lo o i ai le Teuteuga a le Komiti i le Fuaiupu 6. Tulai mai le Taitaifono o le Komiti faamolemole.

Afioga Hon GATOLOAIFAANA AMATAGA ALESANA GIDLOW: Faafetai i lau Afioga i le Fofoga Fetalai. ou te faatu le Teuteuga i le Fuaiupu 6 e faapea:

“TEUTEUGA:

Mataupu 104 – Puipuiga o Fanua Faaleaganuu ma Suafa Matai

Ia suia le faafuaiupu (1) e faapea:

“(1) O le a i ai se Faamasinoga o Fanua ma Suafa e aofia ai tofiga ma lana puleaga faatatau i mataupu e faasino i suafa matai ma eleele faaleaganuu ua aiaaia i lenei Vaega IX Faamasinoga o Fanua ma Suafa” o le Faavae, po o se Tulafono a le Palemene.

I le faafuaiupu (2), ia suia upu nei: “ma e i ai le pule sili i mataupu aganuu faa-Samoa ma lo latou faaaogaina.” I upu e faapea:

Ma e i ai le puleaga toatasi faapitoa i mataupu tau it u ma aganuu faa-Samoa ma lo latou faaaogaina e faatatau i suafa matai ma eleele faaleaganuu.”

Lau Afioga o le mafuaaga o nei suiga, o upu na faaopoopoina ina ia manino mai ai faamasinoga ia o le a i lalo o le Vaega 9 o le Faamasinoga o Fanua ma Suafa. O lea la e pei lava ona tatou maua, e le o manino mai le vaega o le Faamasinoga lea o Fanua ma Suafa. A lea e manino i i le suiga lea ua tuuina atu lau Afioga, lea ua maioio mai ai faamasinoga ia e 3, le Faamasinoga 1, le Faamasinoga Maua-luga ma le Faamasinoga o Talosaga ma Iloiloga. O le teuteuga la lena o le Mataupu 104.

Faafetai i lau Afioga i le Fofoga Fetalai.

FOFOGA FETALAI: Ia, se i tulai mai le Afioga i le Sao Faapito.

Afioga Hon FIAME NAOMI MATAAFA: Lau Afioga i le tau faitau faatopetope atu ua vave foi la oe faagasolo. I le Fuaiupu lea e 6 Mataupu 104, o lea o lo o faapea mai; sa tele le faasea ia faamanino mai le uiga o le amanaia o le aiatatau faaleaganuu po o aiatatau toatele.

Lau Afioga, e ui o lea sa paia foi i se finagalo faaalua, ae le mafai lava ona tuua, aua tatou te talanoa i le agaga o le Tulafono ma le faamoemoe o le Malo, ae o le faaiuga o le aso, e sue lava i le mataitusi o le Tulafono.

O le fesili la; aemaise ona o lea ua tatou oo tonu mai lava i le Fuaiupu lea, lea e aumai fai mai o le faataua o aiatatau faaleaganuu po o aiatatau toatele. Ou te toe fesili atu ma le faaaloalo i le Afioga i le Taitaifono aua o latou ia sa nafa ma le Tulafono, e lelei lava le saunoa mai ma tatou taulagi le faataua o aiatatau a tagata e toatele, a o la e tusi i le Tulafono le mea lena, i te i ua leaga mata o le faipule o Lotofaga pe le lelei lau faitau, ou te le i vaai i se mea faapena i le Tulafono o fai mai, ua amanaia aiatatau a tagata e toatele.

I le ma le isi lau Afioga i le Fofoga Fetalai, tatou talanoa i aiatatau a tagata e toatele, tatou talanoa i le pulega a alii ma faipule, ae faapefea isi faalapotopotoga? E faapefea le aia a le aiga potopoto? E faapefea le aia a Ekalesia? Po o a lava nisi faalapotopotoga o lo o i ai i totonu o le sosaiete a Samoa. E tatou te faavasegaina la i le Tulafono lea po o ai e maua-luga lana aiatatau toatele? E muamua le nuu, pito ai le aiga potopoto, pito ai le Ekalesia. O fea le mea e faasino i ai? O le mea lea e tau o le aiatatau toatele.

Lau Afioga i le Fofoga Fetalai, o le fesili lena. Po o fea o le Tulafono o lo o taatia mai ai le mataitusi ua amanaia, e le Tulafono po o le Faavae po o le

Faamasinoga o Fanua ma Suafa, o tusia ai upu na. O lona 2 lau Afioga i le Fofoga Fetalai, afai ua tatou ave le faataua o le pule o Alii ma Faipule, e le taumate pe ua i ai i totonu o le tino o le Tulafono lenei. A o le fesili, o fea o i ai le Tulafono o le Fono a Nuu? Aua a faapea tatou te talanoa i le pule, o lea e i ai le Tulafono lena, ae leai se mea o faia. Ma le faaaloalo.

Tofa OLO FITI AFOA VAAI: Lau Afioga i le Fofoga Fetalai, mo le faasaoina aua e puupuu lava si au mataupu.

FOFOGA FETALAI: Onosai lava, o na e puupuu. Ia faapuupuu mai.

Tofa OLO FITI AFOA VAAI: O lau tama e fai mea pupuu lava. Lau Afioga i le Fofoga Fetalai, e tasi lenei o vaega o le Tulafono o la e fia faafofoga mai i ai le atunuu. E talu mai le taamilosaga a le Komiti mamalu a le Palemene sa faatalanoaina le mataupu lea. I mea lava lea o suafa matai sao e 5. O la e faafofoga mai le atunuu, leaga na agiga i luga ia saunoaga a le Komiti, latou te suia le mataupu lena, o le a pule lava le aiga ia i le aofaiga o latou matai. I lau tilotilo atu i le teuteuga lea, e le o faia le mea lena.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Tatou te le i oo i le Tulafono lena. Se o le mea lea o le osovale. Tatou te le i taitai lava oo i ai. Se i oo i ai ona tatou agai lea i ai.

FOFOGA FETALAI: Malo, lau Afioga na ona faamanatu atu lava i lau Afioga. O Olo seiloga lava e te tulai mai e te saunoa faatoa malie lea o lona loto. E le o se faipule faigofie Olo, vae atu le faafofoga a Samoa ma le Palemene. Ae faamalie atu i lau Afioga i le Taitai o le Maota, pe mafai ona faatulai mai se lafo, o tatou lea ua tea le taimi manava ae o lea lava tatou te galulue lava. E ese le toaaga o lenei Palemene. Tulai mai lau Afioga i le Fofoga Fetalai.

LAFO MO LE FAAAUAUINA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Ma le ava tele, i lau Afioga ma sui usufono uma lava o le tatou Maota. O lea ua agai atu le tatou Maota mo le iloiloaina o nei Tulafono Tau Faaofi. Ou te faatu ai le lafo mo le suia o tatou Tulafono, *Ina ia faaauau le Iloiloga Auiliili o le Tulafono o lo o i le Pepa o Galuega, ma le Faitauga faatolu ona tolopo ai lea o Taulumaga a le Fono Aoa mo le masina fou.* O le lafo lea mo le silafia e le Maota.

Faaluaina e le Minisita o Tina & Tamaitai Atinae o Nuu ma Afioaga ma Agafesootai ma le Minisita o Pisinisi, Alamanuia ma Leipa.

Na faamaonia le lafo.

Na toe faaauau felafolafoaiga i luga o le Iloiloga Auiliili o le Tulafono Tau Faaofi o teuteuga o le Faavae 2020.

FOFOGA FETALAI: O le a faagasolo le tatou galuega Olo ma lena itu. Se i maea le tatou Tulafono Tau Faaofi, ona tatou manava lea. Se i tulai mai le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW: Faafetai lau Afioga i le Fofoga Fetalai. O le a ou le tali ia Olo leaga o lea ua uma ona saunoa le Afioga i le Palemia, e faamanino lea vaega e pei ona faafesiligia e le sui mamalu le Afioga ia Fiamē. O le fesili foi lea o lea na saunoa i ai Olo. O fea o totonu o le Tulafono o lo o aliali ai i totonu o le Faavae, o lo o aliali mai ai Communal Rights? O lea na ou tali, e le mafai ona sipela aia ia a tagata e toatele aemaise pulega a alii ma faipule, ona e eseese tu ma aga. E eseese tu ma aga eseese agaifanua a nuu taitasi. O le mea la lea, i le faatulai mai ai o le tatou Faamasinoga lea o fanua ma suafa, o le a maua ai le avanoa i ina, e aliali mai ai tu ma aga eseese ia a nuu taitasi ma afioaga. O lona lua lea sa faapea mai, o le a le ituaiga aia a tagata e toatele? O lea ua talanoa mai i le aia a alii ma faipule, ae faapefea le aia a ekalesia, faapefea le aia a aiga potopoto. Lau Afioga i le Fofoga Fetalai, a ua e toatele, o lau aia lava lena. O aia lava na toatele, po o aualuma po o taulelea, po o aiga potopoto po o nuu ma afioaga, mafutaga a ekalesia, e alu uma i le mea lea. Ua maua lo latou avanoa e faaali lo latou, faaali se latou finau, i a latou aia faatagata e toatele i totonu o le faamasinoga. E le o i ai i le taimi lenei, e le o i ai. E faiaina lava le aia lea, po o le a le lelei o mau, e lalo lava. Aisea? E le o mafai ona ofi i totonu o le tatou Faavae. O lea ua faaofi e ala i le tatou Tulafono lea o faamasinoga lea o Fanua ma Suafa. O se tali atu lena lau Afioga i le Fofoga Fetalai.

Susuga Hon LAAULI POLATAIVAO LEUATEA: Lau Afioga i le Fofoga Fetalai.

FOFOGA FETALAI: Se i tulai mai le Afioga ia Laauli, lona avanoa mulimuli.

Susuga Hon LAAULI POLATAIVAO LEUATEA: E puupuu lava lau Afioga i le Fofoga Fetalai. O lea e tau tomanatu i le tele o saunoaga na faia

i le Tulafono lenei. Ia ma faataua lava le malelega a le Maota i le faafofoga mai a le atunuu. Samoa, o le Tulafono lea, e faamalosia ai le pule mamalu a Alii ma Faipule, o le itu lena o lea sa fia tulituliloa. I le savaliga lea sa alu i tua a le Komiti ma mea uma. E pau lava lea o le mea sa fia faafofoga i ai le atunuu. O lau aiatatau faa-alii ma faipule Samoa, o lea o le a faamalosia i i. O lea sa matou taumafai atu, o le Communal Right, e tele lona expansion i le atunuu. E pei ona fai atu le saunoaga a le sao faapito, o aulotu o faalapotopotoga, o ni tagata e toa-sefulu, toa-luasefulu ona tau lea o le Communal Right.

FOFOGA FETALAI: Malie le sui usufono.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Se i aumai tonu lava fuaiupu ia e agai i ai. Se i toe aumai tonu lava po o fea tonu o le lipoti lea e talanoa mai ai? O a faaupuga ia e sau i le lipoti?

Susuga Hon LAAULI POLATAIVAO LEUATEA: Lau Afioga o le....

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Ua falala tele le....

FOFOGA FETALAI: Ua ou manatu, lau Afioga i le sui mamalu o Gagaifomauga Nu 3. Masalo o lea foi sa saunoa faafia i ai le Afioga i le Palemia e faamalamalama ma faapupula le itu lea. Ae sao foi oe, e sao foi lau Afioga i lou lea finagalo, ina ia tuumavaevae le tulaga lea o Faalapotopotoga ma aia tetele ia. O lea ua manino foi le saunoaga a le Taitaifono ia, e uso lava le toatele lena ma le isi toatele lea na ona liliu ifo lava ekalesia, liliu ifo autalavou, liliu ifo aoga Aso Sa. Ae e le mafai ona uso mea na, i se tulaga foi lea tuufaatasi.

Susuga Hon LAAULI POLATAIVAO LEUATEA: E faaiu sou lagona, e faauma atu ai lau upu faapea i le agaga, e tau la le sao i le atunuu. E le o le pule mamalu a Alii ma Faipule lea o le a faamalosia i i, o aiatatau a tagata e toatele, ae le o Alii ma Faipule. O le mea lena o lea ou te manao i ai o la e faafofoga mai le atunuu.

FOFOGA FETALAI: Malie le sui usufono se i toe tulai atu le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le mea lea o lea ou te tulituliloa atu. Ua uma ona tatou faitau i le Tulafono, o le lipoti la a le Komiti lea tatou te talanoa ai. O gafea tonu lava o le lipoti lea, o lea ua tatou oo i le mataupu lea. O a upu ia e te faafesili mai ai? Aua a e talanoa loa i mataupu ia faapitoa i le Tulafono, lea tatou te le i oo mai i ai, o Faamasinoga o Fanua ma Suafa. Ona tatou talanoa tonu loa lea i le faamasinoga. A tatou talanoa loa i le pule mamalu a Alii ma Faipule, ua tatou talanoa loa i le faamasinoga, auiliili le Faamasinoga o Fanua ma Suafa, leaga o i ina lea e faatonutonu ai ia ni tulaga e tulai mai, ua feeseeseai ai ia le faatinoga o aia, Alii ma Faipule i mea tau Fanua ma Suafa. O le mea la lea o lea ou te agaitonu, po o gafea o le lipoti lea ua tatou taunuu mai i ai, lea e te agai mai i ai? Leaga o lea e pa salalau.

FOFOGA FETALAI: Malie lau Afioga Laauli, se i ou toe fesoasoani atu, ona ua maea ou avanoa. A o le fesili a le Palemia ua i ai lou manatu o le a tuu atu ai ou avanoa e 3 i le isi vaega lea, o le 2 lea ma le 1, faasili atu ou avanoa i le tulaga lena. Leaga o lea ua fesili atu le Palemia ua maea ou avanoa, ae ua ou iloa ai foi ua malamalama i i le mataupu lea.

Faamaonia.

Faamaonia le Fuaiupu e pei ona teuteuina.

FUAIUPU 7: Ua faaofiina o Mataupu fou.

FOFOGA FETALAI: O lo o i ai le teuteuga a le Komiti i le Fuaiupu 7. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai i lau Afioga i le Fofoga Fetalai, i le mataupu e 104A, ia faia le teuteuga e faapea.

- I le faafuaiupu (2)(a), ia suia le “Sui Peresetene” i le Peresetene Lagolago.”
- I le faafuaiupu (2)(b), suia upu ma le numera”toalua (2)” i le “le toalua (2) pe sili atu.”
- Faaopoopo upu “muamua” I le tuanai ai o upu “Faamasinoga” a o lumanai ai o upu “o Fanua ma Suafa” ma faitauina ai

“Faamasinoga Muamua o Fanua ma Suafa” I so o se vaega e aliae mai ai i lenei Fuaiupu, ma vaega

104A. Faamasinoga Muamua o Fanua ma Suafa: O se tauaofiaga a le Faamasinoga Muamua o Fanua ma Suafa e aofia ai:

- (a) Le Peresetene lagolago e avea ma sui o le Peresetene e fai ma Faamasino e taitai, ma
- (b) Le toalua (2) pe sili atu faamasino.

Mo le Fuaiupu 104 (4)A

Aveese upu mai itu tau talosaga, ma suia le upu “sea” i le upu “le.”

Mo le Fuaiupu 104 A 6 (a)

Ia suia le Tulafono o taua muamua i upu faavae.

Ua aveese le faafuaiupu (8):

- (8) O le Tulafono tau le aganuu a Egelani ma le faamasinoga tonu tau le lotoifale, e le faaaogaina i le Tulafono o Fanua ma Suafa.
O lea ua aveesea lea fuaiupu, leaga e faaaogaina pea le Common Law ma le Equity i totonu lava o le Faamasinoga o Fanua ma Suafa, aua o lea ua i ai le Judicial Review po o le Iloiloga o Faamasinoga.

Ua aveese le faafuaiupu (9):

- (9) I soo se mataupu ua i ai i ona luma, e mafai e le Faamasinoga o Fanua ma Suafa ona taofia mo le iloiloga a le Faamasinoga Maualuga o Fanua ma Suafa.
 - a. se talosaga tusitusia ua tuuina mai, po o
 - b. se mataupu ua taua.

Ia toe faafuainumera le Fuaiupu 10, 11 ma le 12 e avea ma Fuaiupu 8, 9 ma le 10.

I le faafuaiupu (10), ia suia faapea:

- “(10) O le faaiuga a le Faamasinoga Muamua o Fanua ma Suafa e mafai ona iloilo i se talosaga i le Faamasinoga Maualuga o Fanua ma Suafa.”

Mafuaaga lau Afioga i le Fofoga Fetalai, o le aveeseina ona o le faaaogaina pea o le Common Law i le Equity e pei ona ou fai atu, leaga o lea e i ai i totonu o le Faamasinoga o Apili ma Iloiloga ia le iloiloga o faamasinoga. O le isi foi mafuaaga e pei ona i ai vaega ia i lalo ifo, ua tuuina atu nei aiaiga faafuaiupu i le Tulafono Tau Faaofi o Fanua ma Suafa, e le tau aiaia i totonu o le Tulafono Faavae. Ua mautinoa ai o faaiuga a le Faamasinoga Muamua o Fanua ma Suafa, e mafai ona iloilo i se talosaga i le Faamasinoga Mauualuga.

Ua aveesea upu nei; “o lo o faaiuga i lalo o le mataupu 104B, ona e le manaomia upu, e manino lava, o le mataupu 104B, e sau ai le malosiaga.”

O le tou vaavaai lava ma toe faamanino faalelei, e aua ai ne i toe feseta’i. E pei e foliga e faigata, ae a tatou lava i ai outou finagalo, e manino mai ai lava le auga o lenei faamoemoega.

Lau Afioga i le Fofoga Fetalai, o se tala lena.

Afioga Hon FIAME NAOMI MATAAFA: Lau Afioga i le Fofoga Fetalai.

FOFOGA FETALAI: Se i tulai mai le Afioga i le sao faapito.

Afioga Hon FIAME NAOMI MATAAFA: Faamolemole, o lo o faagasolo pea le faitau faatopetope, o le Fuaiupu e 8. Ua aveesea le faafuaiupu e 8. O le faamalamalamaga lea e aumai o le mafuaaga o le aveeseina, ona o le a faaaogaina pea le Communal Law and Equity i totonu o Faamasinoga o Apili ma Iloiloga o Fanua ma Suafa, ua le aoga ai lenei fuaiupu.

Lau Afioga i le Fofoga Fetalai, o se faataitaiga lea o se mea ua 100% pe 360 tikeri le toe fesuai. Aua na aumai muamua, e le faaaogaina le Common Law and Equity i totonu o le Faamasinoga tau Fanua ma Suafa a o lea ua liliu atoa. Lau Afioga i le Fofoga Fetalai, i le faapea mai ua tatou le toe faaaogaina Tulafono ia, ona faapea o Tulafono a Egelani po o papalagi. Sa tulai mai ai le fesili, o le a la le mea e sui a’i. O le tali, e leai se mea e sui a’i vagana ai le malosi ua tuu i le Faamasinoga e fai e ia faaiuga. O lona uiga e leai ni aiaiga faaletulafono o le a fai ai. O lea la ua matua liliu lava le mea lea. O fea le tuu faafeagai? O le faaoga o le Faavae faaletulafono o le Common Law, ma le agaga lea e tauave mai pea i le fesili atu, i le va o le aiatatau a le tagata e toatasi ma le aiatatau faitele? I le fai mai o le a fai i luga o le tu ma le aga. E fealofani mea ia?

Afioga Hon GATOLOAIFAANA AMATAGA ALESANA GIDLOW:
Faafetai lau Afioga i le Fofoga Fetalai...

FOFOGA FETALAI: Tulai mai le....

Afioga Hon FIAME NAOMI MATAAFA: Lau Afioga o lea e le i uma lau folasaga e faaoga ai lou avanoa muamua ma lou avanoa mauagata.

FOFOGA FETALAI: Malie le Taitaifono e le i maea mai le saunoaga. Pe i ai se isi o le Komiti e fia maua se fesoasoani ona tulai mai lea.

Afioga Hon FIAME NAOMI MATAAFA: E tau mai i le mea lea, ua matuai se'i atoa lava le faavae o le fuafuaga a le Malo lea na fai, o le a tatou see atu i se Tulafono, e faavae i luga o tatou tu ma tatou aga. A o lea ua toe fesuai. O le a la le uiga o le faaauau o le Tulafono pe a faapea, o lea o le a tatou toe foi i le mea lea tatou te i ai nei. O lau Afioga i le Fofoga Fetalai, e leai e ese lava le mea lea e faapea o le toe teuteuga, ao le mea lea, ua matuai aveese atoa lava le faavae na fau ai i le mafauauga o le Malo. Ou te le faapea atu foi o se mafauauga e leaga, tatou te faataua a tatou tu ma le tatou aga. A o le mea la lena, o le tali mai o le Taitaifono fai mai, o le a tuu i le faamasinoga e fai e latou le faaiuga i luga o tu ma aga, ma tu ma aga a nuu na. E leai sou mafanafana lau Afioga i le Fofoga Fetalai, e i ai i lena ituaiga faiga, se mautinoa ona ou te le malamalama. Aua a alu atu lava le tagata ia e faamatala lana tu ma lana aga, ia o lena. Ae tatou o atu tatou te finau i luga o Tulafono ma faavae faale-tulafono, **principle of law**, e tau maua mai ai lou mafanafana. A o le mea lea, ua se'i atoa le fala o le Tulafono, lea e faavae ai le Tulafono lea. I le aveese o le Common Law and Equity, ae fai mai, ia toe aumai loa.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai...

FOFOGA FETALAI: Saunoa se isi o oulua. O ai lava o oulua e saunoa. Saunoa mai le Minisita.

Afioga Hon FAAOLESA KATOPAU T. AINUU: Na ona ou fesoasoani atu lava i le manatu lea sa faatu mai e le sui usufono o Lotofaga. E faaoga pea le Common Law and Equity i le taimi nei, e develop ai le tatou jurisprudence. Ona oo lea i se taimi o lumanai, aveese. A o le taimi nei, o lea e tau amata le tatou faamasinoga lea ma le Tulafono lea. E sao le faaaliga, ae faaoga pea i le taimi lenei, se i oo i se taimi o lumanai, ua mautu a tatou Tulafono, ona fai lea o se fuafuaga i ai.

FOFOGA FETALAI: Malo faafetai.

Susuga Hon LAULI POLATAIVAO LEUATEA: Lau Afioga i le Fofoga Fetalai, faamolemole e fia maua sou avanoa.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, e tau lava ina...

FOFOGA FETALAI: Malie lava Laauli se i toe faaopoopo i le saunoaga a le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, se i toe faamanino atu le tulaga lea faapea o lea ua suia atoa le agaga o le Tulafono. Lau Afioga i le Fofoga Fetalai, o le tatou Tulafono tau faaofi. O lona uiga e teuteu ma vaai, o a mea ua le o lelei, teu laia, ona faatoa pasia lea i totonu o le Maota lenei, avea loa lea ma Tulafono. Ae le faapea la o le a aumai lava pasi i lona faaofiga na fai ai, a o le la e i ai ni faaletonu. O le uiga lena, was a draft bill, tau faaofiofi le tulafono ae fai ona teuteuga. O le i ai o le tulaga lea, o le aveeseina o le tulaga lea o le...o lea ua saunoa le afioga i le Minisita, o le Common Law and Equity, lau Afioga o lea ua fai le iloiloga faafaamasinoga i lalo o le Faamasinoga o Fanua ma Suafa, i lona vaega lea o Iloiloga ma Talosaga. Ma o i ina e manaomia ai le tulaga lea. O lea foi e saunoa le Afioga i le Minisita, o lea faatoa tau amata, build up lava ni a tatou Common Law and Equity, e tusa ai ma tu ma aga a Samoa. Ma le isi mea lau Afioga i le Fofoga Fetalai...

FOFOGA FETALAI: Malo faafetai. Saunoa le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: O lea ou te vaavaai atu o la e tulai mai ia sui o le Komiti e faaopoopo atili. Na ona pau lea o le mea, ona o lea ua faamaonia i i, nisi o finagalo sese sa faaalua, faavalevalea, e faapea ua uma ona pasia e le Maota ia Tulafono, e leai se aoga e toe ave ai i tua. E tusa lava poo a mea e fai mai ai tua e tumau lava. Lea la ua faamaonia i le taeao lenei. O isi ia manatu ua toe lauliliuina i le talatalanoa ma le talatalanoa ma i latou o le atunuu i tua, ma o le uiga lena o lenei mea o le faatalanoaga. E tele lava manatu lelei e tulai mai. O lea faatoa uma atu nei ona pasi le tatou Tulafono o mea tau palota, se i vaai i le anoano o tagata e le malamalama i le mea o le monotaga. E oo lava i totonu o le Maota lenei, lau Afioga i le Fofoga Fetalai, e faapena le faiga o Tulafono. A o e soalaupule, e tele lava manatu lelei e tulai mai, ona toe teuteu ai lea o tatou Tulafono. A o lea la ua ou tulai atu, o ituaiga manatu ia sa faaalua, aemaise lava loa, e maumau fua le ave i tua a o la ua

pasi. O le ala lena o lea sa faataamilo ai e le Komiti. Ma e taua tele le finagalo lea sa faaalua mai e le Taitaifono, ina ia malamalama atili ai, o uiga ia o soalaupulega. E tilotilo i manatu e faatupu mai, ona toe lauliliu lea o le tofa mamao e teuteu ai a tatou Tulafono. O le fesoasoani atu lena.

FOFOGA FETALAI: Malo faafetai, na ona fesoasoani atu foi. Silafia foi pe ua 12 masina o faataamilo i tua lenei Tulafono. O le tulaga masani lava e 3 masina pe a maea ona faitau faalua. Na ona faamanatu atu, i le tele o lenei taimi sa faataamilo atu e soalaupule ia le atunuu. E tasi lea itu e faamanatu atu le tulaga o lo o i ai. Se i tulai mai lava ia Namulauulu, Faasaleleaga Nu 2, aumai sina au fesoasoani ae ua manaia le saunoaga a le Taitai o le Maota.

Tofa NAMULAUULU SAMI LEOTA: Ia faafetai, masalo o lena ua manino auofala. Se o mea ia e tau o Healthy debate, o le aoga foi lena o le tatou talatalanoa. O lea tatou te talatalanoa tatou te le o fefaafefinau. Leaga o Tulafono nei e oo i ooooga o le tu ma le aganuu faa-Samoa. Masalo a tatou tomanatu i le folasaga manino a le Minisita ma le Taitaifono foi, ia faapena ona faatutoatasi le tatou Faamasinoga. O le upu faapalagi lena e faaaogaina o le Autonomist, o lona uiga la, i le taimi lenei, Faamasinoga Muamua uluai iloilogia, e alu atu le Apili, alu loa i le Judicial Review, o fea e fai ai le vaega lena? E fai i lalo o le Supreme Court, o le agaga atoa la. O ai e finauina mataupu ia pe a ave i le Supreme Court? E finauina e loia. Aua o lo o ia latou le tomai faapitoa, e finau ai vaega ia. O le Tulafono la ia ua faataoto, o lea ua aumai ai le Judicial Review lea i totonu o le Faamasinoga o Fanua ma Suafa. Manatua a finau le Judicial Review, e faaaoga le Common Law, e faaaoga le Common Law and Equity, e pei o le vaega lena o lea ua faaaogaina i lalo i i.

Afioga Hon FIAME NAOMI MATAAFA: Lau Afioga i le Fofoga Fetalai, o le mea e fia faasao.

FOFOGA FETALAI: Se i onosai mai Faasaleleaga Nu 2, se i tuu atu le avanoa se i faauma mai, aua e toe pau lea o le avanoa o le sao faapito.

Afioga Hon FIAME NAOMI MATAAFA: O le mataupu e fia faasao lau Afioga i le tatou debate.

FOFOGA FETALAI: A foi e lavea uma lava i avanoa e lua lau Afioga.

Afioga Hon FIAME NAOMI MATAAFA: Manaia lava le Tulafono Tumau a lau Afioga. Lau Afioga o le mea muamua, o le lipoti lea o le suesuega a le Palemene i mataupu tau Faamasinoga o Fanua ma Suafa i le 2016. O lea sa taua i le lipoti a le Komiti lea, la e manino mai ai lava le

fautuaga na aumai, e faatumauiina le Judicial Review. Lea e saunoa nei i ai le sui usufono lea, o le mea muamua lena. O le mea lona 2, o le Judicial Review lea e faatino nei, e lua lava mea e fai ai, pe na sao le ala o mea na faatino ai se mataupu, pe o i ai se aiatatau ua aafia. E le tagofia e le Faamasinoga Mauaialuga le tino o le mataupu sa iloilo e le Faamasinoga o Fanua ma Suafa. Ia manino mea na e lua. Ma le mea lava lea aua ne i galo, fai mai lelei lava le Komiti a Lopao, faaauau lelei le Judicial Review lea e i ai nei. Faafetai.

FOFOGA FETALAI: E masalo o lea ua manino lea vaega lau Afioga.

Tofa NAMULAUULU SAMI LEOTA: E tatau ona tatou malamalama ne i te i foi ua toe sau ai se isi fesili. O le Judicial Review lea e fai i le Supreme Court i le taimi lena a o le i pasia le tatou Tulafono. E tasi le faamasino e faia, o lea la ua fai isi fogafale lona tolu lea, o lea ua i ai faamasino ia. O ai faamasino ia? O le retired Supreme Court Judge, o loia uma tagata nei. O lea la ua aumai i lalo i i le Faamasinoga o Fanua ma Suafa, e sao lelei lava. E pau le mea e finau ai i lalo o le Judicial Review, o le process po o le faataunuina o faamasinoga, ae le iloiloa ai ia merits o mataupu. O lea la ua aumai i lalo i i, ua 3 faiai lapopoa ia ua i ai i le fogafale lona tolu lea. Ua sili atu ai la lona matagofie. A o le a le Tulafono e faavae ai ma taitaiina ai? Le Common Law la lea e fai mai e aveese, leaga o fautuaga nei, sa fautua mai ai foi le asosi o loia, aemaise foi o nisi o i latou na oo atu. Ia aua ne i aveesea. Le agaga lena o le Komiti o lea ua toe faatumauiina ai, ia tumau ai le Common Law, i totonu o le tatou Tulafono. Ma lou faaaloalo lava faafetai.

FOFOGA FETALAI: Malo faafetai.

Tofa OLO FITI AFOA VAAI: Lau Afioga i le Fofoga Fetalai...

Faamaonia.

Faamaonia le Fuaiupu e pei ona teuteuina.

Tofa OLO FITI AFOA VAAI: Lau Afioga i le Fofoga Fetalai, ua leva ona ou tutu atu pe....

FOFOGA FETALAI: A lea o le a oo i ai i le mea lena. A lea e te tulai mai ai.

Tofa OLO FITI AFOA VAAI: E leai o le ua pasi.

FOFOGA FETALAI: E mafai ona toe sui mai tua se i...a...se i faagasolo leaga o lea ua see le vaa o le Fofoga Fetalai.

Faamaonia.

Faamaonia le Fuaiupu 7 e pei ona teuteuina.

FUAIUPU 8: Teuteuga faatupulaia.

FOFOGA FETALAI: Se i tulai mai Olo po o le meatonu lea sa e tulai mai ai.

Tofa OLO FITI AFOA VAAI: Ia o le mea tonu lea. E ui lava o lea ua sese le fuaiupu ae o le a ou alu atu ai pea. Na ona pau lava le mea e fia faamanatu atu i lau Afioga i le Fofoga Fetalai. E ese foi lau matau atu i le tulaga o le faagasologa maiga o teuteuga ia sa i ai. Mai lava i le Fuaiupu 1 seia oo mai i Fuaiupu ia i le gaogaosa ma le tele o teuteuga. I lau matau lau Afioga i le Fofoga Fetalai, e faataua ia te au Tulafono Tumau o lo tatou Maota, i lona vaega 103. I lau faalogologo atu ua matua turn atoa le agaga o le Tulafono lea na aumai. O lona uiga afai o lalo o le 103 afai o se tulaga faapena, ua suia atoa le agaga o le tulafono, i ona teuteuga. E tatau ona toe faafoi atu i tua e talanoa i tua, ona toe aumai lea i totonu o le Maota. Ma le faaaloalo, e na ona ou faamanatu atu i lau Afioga.

FOFOGA FETALAI: Malo faafetai. Manaia le faamanatu se i faafofoga mai i ai le Minisita ma le Taitaifono.

O lo o i ai le Teuteuga i le Fuaiupu 8. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, o le Teuteuga e i totonu 94(4)(a), ia suia le fuainumera “69” i le “81” O le suiga lava o le fuainumera ona o lea ua i ai mea faaopoopo ia ua 81 ai le 69. Faafetai.

FOFOGA FETALAI: Malo.

Faamaonia.

Faamaonia le Fuaiupu 8 e pei ona teuteuina.

FUAIUPU 9: Aiaiga faasaoina ma aiaiga tau soloaiga.

FOFOGA FETALAI: O lo o i ai le teuteuga a le Komiti i i le Fuaiupu 9. Tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW: Lau Afioga i le Fofoga Fetalai ou te faatu le teuteuga i le Fuaiupu 9 e faapea:

“TEUTEUGA:

Ia faaofi le faafuaiupu (2) ma faatulagaina faasa’o fuainumera e sosoo atu ai:

“(2) O so o se aia tatau i lalo o le Vaega II o lenei Faavae sa faamamaluina a o lumanai le pasiaina o lenei Tulafono e ao ona amanaia, faatino ma faaauau lona faamalosalia.”

O le faamalalamalamaina lau Afioga, e fia faamautinoa pea o lo o i ai pea le aiatatau na faamamaluina a o lumanai le pasiaina, e leai ma se mea o aveesea ai le aiatatau. O le toe faamaninoina lava lea o le aiatatau lea lau Afioga. Faafetai.

Faamaonia le Teuteuga.

Faamaonia le Fuaiupu 9 e pei ona Teuteuina.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Faavae 2020.

Faamaonia.

Na faagasolo le Tulafono Tau Faaofi o Teuteuga o le Faavae 2020 faatasi ma Teuteuga.

**TULAFONO TAU FAAOFI O LE FAAMASINOGA O
SOLIGATULAFONO 2020 – iloiloga auiliili**

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti ona faatoa sagai atu ai lea i le iloiloga auiliili o le Tulafono Tau Faaofi.

Tulai mail au Afioga i le Taitaifono o le Komiti Faapitoa a le Palemene.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o le Faamasinoga o Soligatulafono 2020 faatasi ma Teuteuga.*

Faafetai i lau Afioga.

Faaluaina e le sui usufono mo Vaimauga Sasae, le sui usufono mo Falealili Sasae ma le sui usufono mo Safata Sisifo.

Na faamaonia le lafo.

FOFOGA FETALAI: O lea ua faamaonia e le Fono Aoao le Lipoti a le Komiti ma o le a sagai atu loa i le iloiloga auiliili o le Tulafono Tau Faaofi. E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Faamatalaina o uiga o upu.

FOFOGA FETALAI: O lo o i ai teuteuga a le Komiti i le fuaiupu 2. Tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW: Lau Afioga i le Fofoga Fetalai ou te faatu le Teuteuga i le fuaiupu 2 e faapea:

“TEUTEUGA:

I le faamatalaina o upu “Komisi o Galuega Tau Faamasinoga” ia suia le numera “80” i le numera “79”.

Faamaonia le Teuteuga.

Faamaonia le Fuaiupu 2 e pei ona Teuteuina.

FUAIUPU 3: Pulega faifaatasi o le tulafono ma tulaga tutusa.

Faamaonia.

FUAIUPU 4: Resitara.

Faamaonia.

FUAIUPU 5: O Sui Resitara.

FOFOGA FETALAI: O lo o i ai le teuteuga a le Komiti i le Fuaiupu 5. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Teuteuga i le Fuaiupu 5 e faapea:

“TEUTEUGA:

Ia suia le upu “Minisita” i le upu “Resitara” o Faamasinoga i le Fuaiupu 5(1).”

O le mafuaaga, o le faatinoina o le filifiliga o le Sui Resitara ia faatino lea e le Resitara. Faafetai.

Faamaonia le Teuteuga.

Faamaonia le Fuaiupu 5 e pei ona Teuteuina.

FUAIUPU 6: Tagata ofisa tau le pulega a le Faamasinoga.

Faamaonia.

FUAIUPU 7: Faamaufaailoga a le Faamasinoga.

FOFOGA FETALAI: O lo o i ai le Teuteuga a le Komiti i le Fuaiupu 7. Tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW: Lau Afioga i le Fofoga Fetalai ou te faatu le Teuteuga i le Fuaiupu 7 e faapea:

“TEUTEUGA:

Ia faaofi le fuaiupu 7 fou e faapea:

7. Faamasino Sinia o le Faamasinoga Sili: E i ai le Faamasino Sinia o le Faamasinoga Sili le pule faataga, i luga o le faamaoniga a le Faamasino Sili e faia uma ai po o so o se tasi o tulaga ua faia e faapea:

(a) Le tuuina atu so o se galuega tauave, tiute po o matafaioi i se Faamasino o le Faamasinoga Sili, po o le faatagaina o se Faamasino o le Faamasinoga Sili e faia so o se mea e talafeagai ai mo le faafoega lelei po o le faagaioiga o Faamasinoga Sili;

(b) e faamautinoa le atiae o tomai faapitoa o Faamasino o le Faamasinoga Sili, ma manaomiaga mo Faamasino mo le Faamasinoga Sili ia faatino so o se mataupu tau aoaoga po o faatonuga;

(c) ia faamaonia ma faaoga so o se faagasologa po o se faatulagaga o matafaioi e talafeagai i Faamasino o le Faamasinoga Sili;

Faafetai.

Faamaonia le Teuteuga.

Faamaonia le Fuaiupu 7 e pei ona Teuteuina.

FUAIUPU 8: Faiga masani ma taualumaga.

FOFOGA FETALAI: O lo o i ai le teuteuga a le Komiti i le Fuaiupu 8. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le teuteuga i le Fuaiupu 8 e faapea:
O le faaofiina o le fuaiupu i totogi ma faamanuiaga, e tuu i le Tulafono Tau
Faaofi o le Faamasinoga o Soligatulafono.

O le mafuaaga, e aveeseina mai le Tulafono Tau Faaofi o le Faavae aua e
fai ma fesui ai ia tulaga o le galuega. Ae i le 8 ai la –

“TEUTEUGA:

Ia faaofi le fuaiupu 8 fou e faapea:

8. Totogi ma faamanuiaga: (i) E tusa ai ma le Mataupu 81 o le
Faavae, o totogi o Faamasino o le Faamasinoga Sili o le a faatatauina
e le Fono Aoao Faitulafono ma o le a totogiina mai i le
Faaputugatupe i le Ofisa o Tupe.

(2) O totogi o Faamasino o le a le faaitiitia i vaitaimi latou te i ai i le
tofi, ae vagana ona ua avea o se Vaega o se toe faaitiitia aoao o totogi
ua faia i vaega tutusa i tagata uma o lo o fuafuaina faatatau o latou
totogi e le Tulafono.

(3) o le a totogi atu i le Faamasino Sili, ma isi Faamasino o le
Faamasinoga Sili, mai tupe ua faatatauina mo le faamoemoe e le
Fono Aoao Faitulafono, o ia aofaiga faaopoopo e ala i alauni mo
malaga ma tupe faaalu ma isi alauni e pei ona mafai ona faatulagaina
e le Ao o le Malo, i le faia i luga o le fautuaga a le Komisi o Galuega
Tau Faamasinoga.

(4) Mo faamoemoega o le faafuuiupu (3) o le a tatau ona totogi i luga
o, ma totogiina atu mai le Faaputugatupe i le Ofisa o Tupe, e avea o
tupe alu faaletulafono, e faamamaluina mai le aso o le tofiaina e avea
ma Faamasino Sili, o se alauni e \$12,000 i le tausaga, ma ia totogiina
atu i tausaga taitasi i le Faamasino Sili.

(5) O tupe totogi e faia i lalo o le faafuuiupu (4) ma le tau aoga o
faamanuiaga o le a tatau, ae vagana ua faatonuina i se isi faiga e ese
ai e le Ao o le Malo e ala i se poloaiga, ona tuusaunua mai le lafoga
ma o le a faapea ona faaaogaina ai loa le Tulafono o Lafoga o Tupe
Maua 2012.”

Faafetai i lau Afioga i le Fofoga Fetalai.

FOFOGA FETALAI: Malo faafetai i lau Afioga i le Taitaifono.

Faamaonia le Teuteuga.

Faamaonia le Fuaiupu 8 e pei ona Teuteuina.

FUAIUPU 9: Tulafono faafoe a le Faamasinoga.

Faamaonia.

FUAIUPU 10: Tagata ofisa.

Faamaonia.

FUAIUPU 11: Talosaga toe iloilo i mataupu tau le va o tagata.

Faamaonia.

FUAIUPU 12: E mafai ona faataatia seia se taimi se mataupu tau le tulafono mo se faaiuga a le Faamasinoga o Talosaga.

Faamaonia.

FUAIUPU 13: E mafai ona aveese atu taualumaga a le Faamasinoga Sili i le Faamasinoga o Talosaga.

Faamaonia.

FUAIUPU 14: Poloaiga e tuuina atu ai le faatagaga mo talosaga toe iloilo.

Faamaonia.

FUAIUPU 15: E leai se poloaiga e faatuai ai le faataunuina o faasalaga seia vagana ua poloaia e le Faamasinoga.

Faamaonia.

FUAIUPU 16: Faamatalaga molimau i luga o se talosaga toe iloilo.

Faamaonia.

FUAIUPU 17: Malosiaga o le Faamasinoga e uiga i faaiuga.

Faamaonia.

FUAIUPU 18: E mafai e le Faamasinoga ona poloaia se faamasinoga fou.

Faamaonia.

FUAIUPU 19: O le leai o se faafoega faaletulafono o se talosaga toe iloilo.

Faamaonia.

FUAIUPU 20: Faataunuina o poloaiga.

Faamaonia.

FUAIUPU 21: E leai se talosaga i luga o se talosaga mai le Faamasinoga Faaitumalo e faia e aunoa ma le faatagaga.

Faamaonia.

FUAIUPU 22: E mafai ona tuuina atu e le Faamasinoga o Talosaga se faatagaga faapitoa e talosaga ai.

Faamaonia.

FUAIUPU 23: Faamaufaailoga a le Faamasinoga.

Faamaonia.

FUAIUPU 24: Tulafono faafoe o faiga masani.

Faamaonia.

FUAIUPU 25: Tulafono Faatonutonu.

Faamaonia.

FUAIUPU 26: Soloia, aiaiga faasaoina ma aiaiga tau soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Faamasinoga tau Soligatulafono 2020.

Faamaonia.

Na faagasolo le Tulafono i Tau Faaofi o le Faamasinoga o Soligatulafono 2020 faatasi ma teuteuga.

TULAFONO TAU FAAOFI O FANUA MA SUAFA 2020
– iloiloga auiliili

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti ona faatoa sagai atu ai lea i le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti Faapitoa a le Palemene.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Fanua ma Suafa 2020 faatasi ma teuteuga.*

Faaluaina e le sui usufono mo Vaimauga Sasae, sui usufono mo Falealili Sasae ma le sui usufono mo Aana Alofi Nu.3.

Na faamaonia le lafo.

FOFOGA FETALAI: O lea ua faamaonia e le Fono Aoao le Lipoti a le Komiti ma o le a sagai atu loa i le iloiloga auiliili o le Tulafono Tau Faaofi. E tusa ai ma Tulafono Tumau, e amata le iloiloga auiliili i le Fuaiupu 2.

FUAIUPU 2: Faamatalaina o uiga o upu.

FOFOGA FETALAI: O lo o i ai le teuteuga a le Komiti i le Fuaiupu 2. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA-GIDLOW: Faafetai i lau Afioga i le Fofoga Fetalai.

“TEUTEUGA:

Fuaiupu 1

(a) i le faafuaiupu (2), suia le upu “O lenei” i le “Seia vagana le fuaiupu 43 ma le 44, o lenei”;

(b) ina ia faaofi i totonu le fuaiupu (3):

“(3) O le fuaiupu 43 ma le 44 e faamamaluina i se aso e ese mai e filifilia e le Minisita.”

Faamaonia le Teuteuga.

Faamaonia le Fuaiupu 2 e pei ona Teuteuina.

FUAIUPU 3: O le Matagaluega e fitoitonu i ai le faafoega o lenei Tulafono.

FOFOGA FETALAI: O lo o i ai le teuteuga a le Komiti i le fuaiupu 3. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, o le Matagaluega e fitoitonu i ai le faafoega o lenei Tulafono, o le teuteuga –

“TEUTEUGA:

I totonu o le fuaiupu(2), ia suia le upu “Resitara” i le upu “Ofisa Sili o Pulega o le Matagaluega” lea foi e taua o le Resitara o le Faamasinoga.”

Ma lou faaaloalo lava.

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 4: Resitala.

FOFOGA FETALAI: O lo o i ai le teuteuga a le Komiti i le fuaiupu 4. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai –

“TEUTEUGA:

(a) i totonu o le faafuaiupu (1): Aveese upu “tagata ua tofia.

(b) I totonu o le faafuaiupu (1):

Ia faaofi le tuanai ai o upu “Faamasinoga Muamua o Fanua ma Suafa,” o se faailoga koma liliu ma upu “Faamasinoga Maualuga o Fanua ma Suafa ma le Faamasinoga o Talosaga ma Iloiloga o Fanua ma Suafa.”

Faamaonia le Teuteuga.

Faamaonia le Fuaiupu 4 e pei ona teuteuina.

FUAIUPU 5: Tofiaina o isi tagata ofisa ma tagata faigaluega.

Faamaonia.

FUAIUPU 6: Faamaumauga a le Faamasinoga.

FOFOGA FETALAI: O lo o i ai teuteuga a le Komiti i le Fuaiupu 6. Tulai mail au Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai lau Afioga i le Fofoga Fetalai.

“TEUTEUGA:

Fuaiupu 6 (a) Mo le faafuaiupu (3), ia faaofi i totonu upu “seia vagana ua tuuina mai se faatagaga a le Peresetene o le Faamasinoga mo ni mataupu tau i le faamasinoga.” i le tuanai ai o le upu “Faamasinoga”;

(b) Ia faaofi le faafuaiupu (4) fou:

“(4) So o se tagata o ia lea ua na solia le faafuaiupu (3) e tatau ona noatia i se sala tupe e le silia le 56 iunite tau faasalaga po o le nofosala i le falepuipui mose vaitaimi e le silia le tolu(3) tausaga, po o faasalaga uma e lua.”.

Faafetai.

Faamaonia le Teuteuga.

Faamaonia le Fuaiupu 6 e pei ona Teuteuina.

FUAIUPU 7: Faamaufaailoga.

Faamaonia.

FUAIUPU 8: Fanua ua avea e faapea po o ua faaalua manino o fanua faaleaganuu.

Faamaonia.

FUAIUPU 9: Faailoaina manino o fanua faapitoa e avea ma fanua faaleaganuu.

FOFOGA FETALAI: O lo o i ai teuteuga a le Komiti i le Fuaiupu 9. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai:

“TEUTEUGA:

I le faafuaiupu (2), suia le “5” i le “3” ma le “6” i le “4”.

I totonu o le faafuaiupu (4):

Ia suia upu “Poloaiga o le Faamauina o Fanua Samoa 1920” i upu “Tulafono o le Faamauina o Pule o Fanua 2008”.

I totonu o le faafuaiupu (5):

Ia faaofi, a o lumanai ai le upu “Komisi” o upu “Suesuega o Fanua ma Suafa”.

I totonu o le faafuaiupu (8) ia aveese upu “o ia lea e tatau ona faia o sea teuteuga i totonu o le Tusi resitala o Fanua, e pei ona ono talafeagai ai.”

Faafetai.

Faamaonia le Teuteuga.

Faamaonia le Fuaiupu 9 e pei ona teuteuina.

FUAIUPU 10: Faasee atu o faaiuga i mataupu tau fanua faaleaganuu.

FOFOGA FETALAI: O lo o i ai le teuteuga a le Komiti i le fuaiupu 10. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai:

“TEUTEUGA:

Fuaiupu 10:

I le amataga o le fuaiupu, ia suia upu “O le Resitara” i upu “i luga o le talosaga a le Resitara o Fanua, o le Resitara.”

Faafetai.

Faamaonia le Teuteuga.

Faamaonia le Fuaiupu 10 e pei ona Teuteuina.

FUAIUPU 11: Fuagafanua ma ata tusi faataitai.

FOFOGA FETALAI: O lo o i ai le teuteuga a le Komiti i le fuaiupu 11. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai:

“TEUTEUGA:

Fuaiupu 11:

Ia suia i le Fuaiupu 11 fou:

“11. Fuagafanua, ata faataitai ma ata pu’e mai luga o le ea – (1)
Afa i ua sailia i se talosaga faasaga i se faaiuga le sa’o atoatoa o tuaoi

o fanua faaleaganuu, e mafai e le Faamasinoga ona poloaiina le tagata o talosaga ina ia tuuina atu se ata faataitai po o ata pu'e mai luga o le ea o le fanua faaleaganuu ma ona tuaoi.

(2) O le ata faataitai po o ata pu'e mai luga o le ea e tusa ai ma le faafuaiupu (1), e ao ona faatoai atu faatasi ma se talosaga tetee po o se tali i se talosaga ina ia fofogaina ai le mataupu i luma o le Faamasinoga.

(3) O le tupe totogi o so o se ata faataitai po o ata pu'e mai luga o le eau a poloaiina i lalo o le faafuaiupu (1), po o se fuagafanua i lalo o le faafuaiupu (2), e tatau ona totogiina e pei ona poloaiina e le Faamasinoga.”

Faafetai.

Faamaonia le Teuteuga.

Faamaonia le Fuaiupu 11 e pei ona Teuteuina.

FUAIUPU 12: Agavaa e umia ai se Suafa Matai.

FOFOGA FETALAI: O lo o i ai le teuteuga a le Komiti i le fuaiupu 12. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai...

TEUTEUGA:

Fuaiupu 12:

I totonu o le faafuaiupu (2):

(a) Ia suia le faaupuga “E le mafai ona agavaa se tagata ua faamaonia faaletulafono sona moliaga i se soligatulafono e oo atu i le fitu (7) tausaga e nofosala ai i le falepuipui po o le sili atu foi,” i le faaupuga “O se tagata ua faamaonia faaletulafono i se soligatulafono ma tuliina sona faasalaga e nofosala ai i le falepuipui.”; ma

Ia faaofi le upu “autasi” i upu “e se vaega aupito toatele”.

Faafetai.

Faamaonia le Teuteuga.

Faamaonia le Fuaiupu 12 e pei ona Teuteuina.

FUAIUPU 13: Matai Sa’o.

FOFOGA FETALAI: O lo o i ai le teuteuga a le Komiti i le fuaiupu 13. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai:

“TEUTEUGA:

Fuaiupu 13:

Ia suia i le fuaiupu 13 fou:

“13. Matai Sa’o – Ina ia tausisia le tulaga mamalu ma aloaia o le faavaeina o Matai Sa’o o Samoa, e faaaoga itu nei:

(a) o le filifiliga ma le aofai o Matai Sa’o o le a le tatau ona faaitiitia ai le aloaia ma le taua o le Matai Sa’o; ma

(b) o le sauniga o le faaeina atu o se suafa Matai Sa’o e tatau ona usitaia le fuaiupu 15; ma

(c) o le Matai Sa’o i le i ai faatasi ma ana matafaioi o le tautuaina o le aiga potopoto, e tatau ona nofomau i totonu o Samoa ma i ai i totonu o lona aiga ma le nuu e tauave tiute ma matafaioi e faatino e se Matai Sa’o.”

Tofa OLO FITI AFOA VAAI: Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le...

Tofa OLO FITI AFOA VAAI: Faafetai. Ia ona o lea ua ou oo tonu mai i le mea lea sa avatu ai lau fesili muamua. E taua ia te au le saunoaga a le

Afioga i le Minisita i le faapasene mai o itu lagolago ma le lagolago ma itu foi lea e leai se tali i lana Saunoaga Faa-Minisita e faapea e 80% le

Lau afioga i le Fofoga Fetalai, ia e fesiligia lava pe sa fai se palota a na foi nuu, nuu taitasi uma lava e i ai le pasene sao lea a le faamaumauga a le Fono Aoao. Aua e manaomia mea moni e aumai i totonu o le tatou Palemene.

O le tulaga la lea i le 83% lea, o lea sa...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

FOFOGA FETALAI: Se i malie lava lau afioga i le sui usufono mamalu o Salega, se i tulai mai ia le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: E na o se mea lava e fia faamalamalama. Ua uma ona faataoto ia le lafo e talanoa ai atoa ai le saunoaga a le afioga i le Minisita. E le o i i la i totonu o le tatou Tulafono. Ae se i oo ia ina oo atu le faasologa i le talanoaina o le saunoaga a le Minisita, ia ona talanoa lea i le mataupu lea e laga mai.

Tofa OLO FITI AFOA VAAI: Lau afioga i le Fofoga Fetalai, leaga e aiga lelei ia le mea lea na ou tau avatuina i lau fesili fia malamalama i le afioga i le Taitaifono, i le tulaga o le lagolago lea. O la e faafofoga mai Samoa i le tulaga ua i ai le faaiuga a le afioga i le Taitaifono ma lana Komiti mamalu, i le tulaga lea sa faaalua i lona vaitaimi. O le mea foi lona na toatele ai nisi e lagolago ia le Tulafono, ina ua faaalua i o latou finagalo, e omai faasao le mea lea e le toe faia ia se 5... e le toe pule le Malo i le aofaiga o matai sao. Ia o lea la ua aumai nei, ia e le o faia ia lona mea.

O le isi mea lau afioga i le Fofoga Fetalai ou te fia fesili atu ai, o lea faafetai o lea e amanaia ia le mamalu o sui o suafa sao. Ae pe na tau ia le latou silasila ma le latou tofa, i le nofo filemu o aiga i le Tulafono lea. Ma o le upu moni lava lona. E pei lava ona ou fai atu i le taimi ua sola, e 7 ia matou matai sao. A pasia nei ia le Tulafono, e le na o le matou aiga foi. O lona uiga e vevesi le tau aumaiga i lalo po o ai le 2 o le a aveese. O le ala lona o lou tulai atu e faafesili atu.

FOFOGA FETALAI: Ia, fesoasoani atu ia le Taitaifono, faapea ai ua manino ia le sui usufono. Ia o le sui usufono se matuai faigata tele. Ia, se i saunoa ia faapea ua manino le mataupu.

Afioga Hon GATOLOAIFAANA AMATAGA ALESANA-GIDLOW: Lau afioga i le Fofoga Fetalai, e sao lelei lava ia lau saunoaga. Faapea lava

au ua malamalama ia le sui usufono lea o lo o i ai ia le numera la e faanumera ai ia tagata e tatau ona lesitala. Ua aveese, e pau lava ia le mea lea ua o matou tuuina atu, o ni nai tuutuuga e tagai i ai ia aiga potopoto, ina ia faamamalu ai faiga filifiliga a matai. Ia faamamalu ai ia tatou faamatai, ae ua leai ia le vaega na e te popole ai.

Olo la, ia malie lou finagalo, e matou te le o tala sese i le atunuu, o lea ua leai se mea i i, faafetai.

FOFOGA FETALAI: Ia, malo.

Faamaonia le Teuteuga.

Faamaonia le Fuaiupu 13 e pei ona Teuteuina.

FUAIUPU 14: Aveesea o le Suafa Matai.

FOFOGA FETALAI: O lo o i ai le Teuteuga a le Komiti i le Fuaiupu 14. Tulai mai ia le Taitaifono.

Afioga Hon GATOLOAIFAANA AMATAGA ALESANA-GIDLOW: Lau afioga i le Fofoga Fetalai, i le Fuaiupu 14:

“TEUTEUGA:

I totonu o le Fuaiupu 1 parakalafa c, ia suia le faaupuga e faasalaina i le nofosala i le falepuipui i le 7 tausaga, po o le sili atu foi i upu, ma tulia lona faasalaga e nofosala i le falepuipui.

Faafetai.

Faamaonia le Teuteuga.

Faamaonia le Fuaiupu 14 e pei ona Teuteuina.

Afioga TAPULESATELE MAUTENI TAMASONE METULI II ESERA (Vaisigano Nu.2): Lau afioga i le Fofoga Fetalai...e i ai si mataupu laitiiti lea e fia talanoa atu ai, i le tulaga lea.

FOFOGA FETALAI: Ia, se i saunoa mai ia le... e faale o maua atu lou finagalo.

Afioga TAPULESATELE MAUTENI TAMASONE METULI II ESERA: O le tulaga lea e fia fai atu ai se faamatalaga, o le 14 lea 13a. A silasila i ai lau afioga i le tulaga lea e faailoa mai i i, afai o lea e taumafai tatou foi lea i le tulaga lava lea o le faataua o tatou tu ma aganuu. Ae a silasila i ai i le tulaga lea e i ai le vaega lea, tusa o lea ua aveese ai ia le tulaga lea o le pule faasao. E pei o le tulaga na o lea e tele lava le popolega i lea tulaga, ona o le aganuu lava a tatou ia, e i ai le mea e tau o le pule faasao.

Po o le a lava so o se mataupu lava e faatalanoaina i totonu o se aiga, e faaali lava finagalo o tagata uma, ona oo lea i le faaiuga, e fai le faaiuga i le pule faasao. Ae o lea ua ou vaai atu nei ua saisaitia i i le tulaga lea. E pei e matau lava foi e tatou ma le atunuu foi lea e pei ona i ai. O nei suiga o le faatauaaina o tatou tu ma aganuu.

FOFOGA FETALAI: Ia, se i tali atu... ia se i tulai mai ia le sui usufono o Faleata Sisifo.

Tofa LEALAILEPULE RIMONI AIAFI (Faleata Sisifo): Ia, faafetai lava mo le avanoa. E fia fesili lava i le vaega lea i le fuaiupu lea lau afioga (b). O le mea lea e popole i ai lou manatu, o le mea lea leaga e le mafai ona define le mea e tau e alu ese le auiliiliga o le mea e tau o tiute faamatai. E mafai ona aveese lou matai pe a le faatinoina ou tiute faamatai.

O le mea lea i le Komiti ma le Taitaifono i le latou suesuega, pe ua lautele tele lea mea. Ae e tatou te leiloa foi po o a tiute faamatai. Aua e eseese tiute faamatai mai i lea nuu i lea nuu. E pei foi o le mea lea e vevesi ai tatou i le monotaga. Ae po o le a se tagai, pe o le a faafaigofie tele ona aveese le tofi i le suafa matai i le vaega lea. Ma le faaaloalo lava.

FOFOGA FETALAI: Ia se i tulai le... e i ai se isi o le Komiti se i fai sina koma a le Taitaifono. Ia o le a outou nonofo lava ae le se i tu mai se isi outou...

Afioga FUIMAONO TEO SAMUELU TEO (Falealili Sasae): Ia, faafetai o lea o le a ou tali atu i ai i le e fai ma sui, e sui le sema. Masalo o le tasi lenei o mataupu sa lagalaga ai finagalo o le atunuu lea ua oo tonu i ai. O le faamatalaga a le Komiti, ua talia le tuualalo a le mamalu o le atunuu i le faatapulaaina o matai sao, ao tiute, ia o lona e te iloa lou tiute.

O le a le tiute a le matai sao? O le vaai o lou auai, e te finau i measina a lou aiga aua o lau tiute lona e fai. E le sau le matai tautua e sau e finauina measina a oe, ae o la e nofo oe o le sao. O oe o le sao e vaaia le fanua e vaaia le suafa e vaaia mea uma.

A oo foi i faalavelave, leaga e eseese aiga. E eseese foi le faatinoga. O le isi sao e na ona alu atu lava nofo ma ona tauau i luga e leai se mea e faia. Ae e tautua mai ia le aiga, ae o lona tiute, o le ave o le fautua. Afai lava e le tago

i se mea foi lea e ave i le aiga ae o lona tiute o le fautua ma vaai lelei le aiga, o lou tiute lena. Afai la e te le faia ou tiute lena, ia o le a le mea e te saga matai sao ai ae ua le aveese loa? Ia o le mafuaaga lena e ala ai ona avatu, o ou tiute na e fai ma faatino, ma le agaga faaaloalo.

Tofa LEALAILEPULE RIMONI AIAFI: Lau afioga i le Fofoga o le Fono, o le mea lea na ala ai ona ou fesili ona ua leva ona fia tali ia sui o le Komiti ae le tali. Se i vaai i le manaia o le tali. E pau o le mea lau afioga i le sui mamalu o le Komiti, o lea ou te talanoa atu i mea e tau o le matai. Ou te lei talanoa atu i le matai sao. A e le afaina, ua lava lea ua ou malie i le leotele o lau tali, faafetai.

Afioga Hon FIAME NAOMI MATAAFA (Lotofaga): Lau afioga i le Fofoga Fetalai...

FOFOGA FETALAI: Ia, se i tulai mai ia le afioga i le Sao Faapito.

Afioga Hon FIAME NAOMI MATAAFA: Faamalulu atu pe afai ua leotele tele atu i lau afioga. Faamolemole i le Fuaiupu lava lea e 14, aua o lea e i ai le Teuteuga lea, i le tulaga lea o le tagata lea ua solitulafono. Ma e i ai se faasalaga i le 7 tausaga.

Faamolemole lau afioga i le Taitaifono ma le mamalu o le Komiti, ou te le o manino lelei, pe o le Teuteuga lea ua i ai, a faapea ua tuliloaina lona faasalaga, ona magalo mai ai lea, aua o lea e fai mai, e le agavaa se tagata ua faasalaina. Ae o lea ua i ai le tou Teuteuga, e pei e foliga mai, na tulia lona faasalaga i le nofosala i le falepuipui. Po o le a la... ou te le o manino lelei, po o le a la le uiga o le mea lea? Aua o le agavaa, o lea e lavea ai i i, a... ae e pei ou te tau faitau atu, a faapea ua tuli ia le faasalaga, ua tatau foi ona magalo. O lea ou te fia malamalama po o le a le uiga faamolemole.

FOFOGA FETALAI: Ia, se i tulai mai ia le Taitaifono.

Afioga Hon GATOLOAIFAANA AMATAGA ALESANA GIDLOW: Ia, lau afioga i le Fofoga Fetalai, o lea la ua saunoa sao lava ia Fiamme ua leva ona solitulafono le isi vaega lea ua tatou pasia ia le vaega 13. O lea ua o tatou i luga o le vaega 14. O lea la o le a ou tali atu ai i le faafesili a le afioga i le Sao Faapito.

O le tulaga lea e i ai le Tulafono, a 7 tausaga o e nofosala, e te le agavaa e aveae oe ma matai, se i vagana ua autasi pe o lea ua sui foi le autasi i le fulisia. Se i vagana ua fulisia lou aiga po o le a lava ia lou solitulafono i le mea mamafa na e i ai, ae ua manao lava ia lou aiga e faamatai oe, o le vaega lena o le faamalamalama tonu lena o le vaega 14. Pe na e falepuipui mo se 2 masina, po o se 2 tausaga, po o le 7 tausaga, po o le a lava, a autasi lava lou

aiga e faamatai oe, ia o lena. E tuu i le filifiliga a aiga ia le faamoemoe lea. O le uiga lena lau afioga i le Sao Faapito.

FOFOGA FETALAI: Ia, malo. Ia se i toe tulai mai ia le Sao Faapito.

Afioga Hon FIAME NAOMI MATAAFA: Ia faafetai. Ia o le mea lava lenei o le tau fai atu o le faitau, o lea e tilotilo i le uluai Tulafono na aumai, lea e tilotilo i le Teuteuga, faamolemole, o fea lea e i ai le mea lea o le a tuu i le pule faitalia a le aiga?

Afioga Hon GATOLOAIFAANA AMATAGA ALESANA-GIDLOW: O lena e i ai le 14 (3) (b). Aveesea ai se suafa matai... leai 14 (1) (c). Afai e faapea o se o umia se suafa matai ua faamaonia faaetulafono i se soligatulafono e faasalaina e le nofosala i le falepuipui i le 7 tausaga po o le sili atu foi, e aveesea ai se suafa matai ma isi sulii e faatoa mafai ona faia (b) sau loa i le 3b, aveesea ai le suafa matai o se sao e mafai ona faia i le maliega autasi a sulii. O i ina la e apply ai le vaega lena, faamolemole.

FOFOGA FETALAI: Malo.

Faamaonia le Teuteuga.

Faamaonia le Fuaiupu 14 e pei ona Teuteuina.

FUAIUPU 15: Tulaga aloaia o le faaee atu o se Suafa Matai.

FOFOGA FETALAI: Ia o lo o i ai le Teuteuga a le Komiti i le Fuaiupu 15. Lau afioga i le Taitaifono tulai mai.

Afioga Hon GATOLOAIFAANA AMATAGA ALESANA-GIDLOW: Totonu o le faafuaiupu 1 (c), parakalafa (1), ia faaofi ia le tuanai ai o le upu tagata, i upu ua faaeeina i ai se suafa matai. Ae i le vaega lava lea o le fuaiupu lava lea e tasi, 15, ia suia le faafuaiupu 2 i le fuaiupu 2 fou, mo le faamoemoe o lenei fuaiupu, e ao i se sui o le nuu, ona auai atu i saofai o le faaeeina atu o se suafa matai, e faatino ai ona tiute tauave, i lalo o lenei Tulafono. Ma afai e le talafeagai lona auai, e mafai e le sui o le nuu ona faatino ona tiute tauave, faatasi ai ma ona faamaoniga tusitusia, a itiiti mai e toa 5 matai na auai i le saofai.

O le faaopoopoga lava i totonu o le fuaiupu lava lea e 3, i le tuanai ai o upu faiganuu o le a amanaiaina i le faaofi o upu, o lona uiga o le nuu ua faamauina. Faafetai lava.

FOFOGA FETALAI: Malo.

Faamaonia le Teuteuga.

Faamaonia le Fuaiupu 15 e pei ona Teuteuina.

FUAIUPU 16: Ia teuina e le Resitala le tusi Resitala o Suafa Matai.

FOFOGA FETALAI: O lo o i ai le Teuteuga a le Komiti. Tulai mai le...

Afioga Hon GATOLOAIFAANA AMATAGA ALESANA-GIDLOW:
Lau afioga i le Fofoga Fetalai, i totonu o faafuaiupu

“TEUTEUGA:

I totonu o faafuaiupu (4) parakarafa (a), ia suia i se parakarafa (a) fou.

Ua maea ona faia ia le faaiuga e le Faamasinoga, e tuuina atu se poloaiga mo le aveeseina o se suafa matai i lalo o le faafuaiupu 14 (1).”

I totonu o le faafuaiupu (4) parakarafa (b), faaparakarafa (ii)

Ia aveese upu “po o se faifeau”.

Faamaonia le Teuteuga.

Faamaonia le Fuaiupu 16 e pei ona Teuteuina.

FUAIUPU 17: Faalavelave i le faaiuga a le Resitala ina ia tusia pe aveese se Suafa Matai.

Faamaonia.

FUAIUPU 18: Faamoemoe e faaee se suafa matai.

FOFOGA FETALAI: O lo o i ai le Teuteuga a le Komiti i le Fuaiupu 18. Tulai mai ia le Taitaifono.

Afioga Hon GATOLOAIFAANA AMATAGA ALESANA-GIDLOW:
Lau afioga i le Fofoga Fetalai...

I totonu o le faafuaiupu (1):
I le tuanai ai o le upu “faapogai” ia aveese le upu “Samoa”.

I totonu o le faafuaiupu (3)
Ia suia le fuainumera “lima (5) i le fuainumera “tolu (3)”

I totonu o le faafuaiupu (4) parakalafa (a):
Ia suia le fuainumera “ono (6) i le fuainumera “fa (4)”

Faamaonia le Teuteuga.

Faamaonia le Fuaiupu e 18 e pei ona Teuteuina.

FUAIUPU 19: E mafai ona faatoai atu se faalavelave e faasaga i se Faaaliga o se faamoemoe e faaee se suafa matai.

FOFOGA FETALAI: O lo o i ai le Teuteuga a le Komiti i le Fuaiupu 19 lau afioga i le Taitaifono.

Afioga Hon GATOLOAIFAANA AMATAGA ALESANA-GIDLOW:
Lau afioga i le Fofoga Fetalai...

Ia suia le fuaiupu o i ai nei i le faafuaiupu (1) ma le (2) fou:

- “(1) E mafai e se tagata ona faatoai atu se talosaga tetee i le Faamsinoga mo le iloiloga faasaga i le faasilasilaga ua lomía faasalalau i lalo o le fuaiupu 18 ma o sea tetee e tatau ona aiaia ai:
- (a) o le sootaga tau toto o le tagata o lo o talosaga tetee i le Suafa Matai o le autu lea o le Faasilasilaga;
 - (b) o mafuaaga mo le tetee i le faaee atu o le Suafa Matai ua fuafuaina ma auala e foia ai ua talosagaina; ma
 - (c) so o se isi lava manaoga faatonuina.
- (2) O tetee i se Talosaga e ao ona lomía faasalalau ma tuuina atu ai igoa o itu Faamasinoga, mafuaaga mo le tetee ma auala e foia ai ua talosagaina i totonu o le 20 aso a o lumanai ai le fofogaina le mataupu.”

Faamaonia le Teuteuga.

Faamaonia le Fuaiupu 19 e pei ona Teuteuina.

FUAIUPU 20: Tualumaga pe afai e leai se faalavelave ua faatoai atu.

Faamaonia.

FUAIUPU 21: Puleaga faa-faamasinoga pe afai e leai se faalavelave.

Afioga Hon FIAME NAOMI MATAAFA: Lau afioga i le Fofoga Fetalai...

FOFOGA FETALAI: Tulai mai lau afioga i le Sao Faapito, Fiamē.

Afioga Hon FIAME NAOMI MATAAFA: Faamolemole lava, e leai sau Fuaiupu 21. O sese ea lau pepa lea ou te tilotilo ai.

FOFOGA FETALAI: Se Olo, Olo se i e silasila ifo i le pepa a Fiamē faamolemole.

Tofa OLO FITI AFOA VAAI: E tutusa lava ma pepa, ai e ese pepa ia e aumai ia maua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O le Tulafono lea sa tufa atu ia te oulua ua leva. Ua 9 masina. O lena lea e tatou te talanoaina. E leai se Teuteuga o i ai.

FOFOGA FETALAI: Ia, se i... a ave pepa i le fale se i aumai i le tatou Maota nei pe a usua le Fono.

Tofa Olo Fiti Afoa Vaai: Se lau afioga i le Fofoga Fetalai o lona uiga la e sese mai ia le Taitaifono e leai se Teuteuga o le 21 ae la e lau mai ia le 21, ma le faaloalo.

FOFOGA FETALAI: Ia...

FUAIUPU 22: Faaaliga i le tuanai ai ona faaee o se Suafa Matai.

FOFOGA FETALAI: O lo o i ai le Teuteuga a le Komiti, tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW:

I totonu o le faaupuga o le fuaiupu:

- (a) i totonu o le parakalafa (a), ia suia le fuainumera “lima (5)” i le fuainumera “tolu (3)”; ma
- (b) i totonu o le parakalafa (b), ia suia le fuainumera “fa (4)” i le fuainumera “tolu (3)”.

Faamaonia le Teuteuga.

Faamaonia le Fuaiupu 22 e pei ona Teuteuina.

FUAIUPU 23: Faalavelave i le Suafa Matai ua faaee.

FOFOGA FETALAI: O lo o i ai le Teuteuga a le Komiti i le Fuaiupu 23, tulai mai lau afioga i le Taitaifono.

Afioga Hon GATOLOAIFAANA AMATAGA-GIDLOW: Faafetai i lau afioga i le Fofoga Fetalai. Fuaiupu 23...

Ia faaofi se faafuaiupu (2) fou ma toe faanumera faafuaiupu o mulimuli mai i lona faasologa sa’o:

- (2) O se Talosaga tetee e faatoai atu e tatau ona faia ina ia tusa ai ma le fuaiupu 19.”

Faamaonia le Teuteuga.

Faamaonia le Fuaiupu 23 e pei ona Teuteuina.

FUAIUPU 24: Taulumaga i le tuanai ai ona faaee se Suafa Matai.

FOFOGA FETALAI: O lo o i ai le Teuteuga a le Komiti i le Fuaiupu 24 tulai mai ia le Taitaifono.

Afioga Hon GATOLOAIFAANA AMATAGA-GIDLOW: Lau afioga i le Fofoga Fetalai...

“TEUTEUGA:

I totonu o le faafuaiupu (1):
Ia suia upu “Vaevaega 6” i upu “Vaevaega 5”

I totonu o le faafuaiupu (2):
Ia aveese le parakalafa (a),

Ia suia le faafuaiupu (4) i se faafuaiupu (4) fou:

“(4) Afai ua faaee atu se Suafa Matai i totonu o se nuu lea e le o i ai se Sui o le Nuu, ma mo le Suafa Matai ina ia faamauina, e mafai e le faapogai ona faatoai atu se talosaga mo le faamaoniga a le Faamasinoga.”

Faamaonia le Teuteuga.

Faamaonia le Fuaiupu 24 e pei ona Teuteuina.

FUAIUPU 25: Faamatalaga sese ma tau faasese.

FOFOGA FETALAI: O lo o i ai le Teuteuga a le Komiti i le Fuaiupu e 25, tulai mai le Taitaifono.

Afioga Hon GATOLOAIFAANA AMATAGA-GIDLOW: Lau afioga i le Fofoga Fetalai...

“TEUTEUGA:

I totonu o le faaupuga o le fuaiupu:
Ia suia le faaupuga “10 iunite tau faasalaga” i upu “50 iunite tau faasalaga” ma suia i le “12 masina” i le “3 tausaga”.

Faamaonia le Teuteuga.

Faamaonia le Fuaiupu 25 e pei ona Teuteuina.

FUAIUPU 26: Tagata e faaogaina sese se Suafa Matai.

FOFOGA FETALAI: O lo o i ai le Teuteuga a le Komiti...

Afioga Hon GATOLOAIFAANA AMATAGA GIDLOW: Fuaiupu 26 lau afioga i le Fofoga Fetalai...

I totonu o le ulutala o le fuaiupu:
Ia suia le upu “tagata e faaaogaina” i le upu “faaaoga”

Tofa LEALAILEPULE RIMONI AIAFI: Lau afioga i le Fofoga o le Fono...

FOFOGA FETALAI: Tulai mai le sui usufono o Faleata Sisifo.

Tofa LEALAILEPULE RIMONI AIAFI: O lea e matau atu e sui faasalaga o le Fuaiupu 25, o lea sa tutusa ia solitulafono o le 25 ma le 26. Ae o lea e matau atu, o lea e aumai fautuaga e sui ia le faasalaga o le 25 e sii i luga, ae tumau lava ia le faasalaga o le 26. I lou talitonuga, e tutusa pau lava ia mamafa o solitulafono ia. Pe o le a foi la le mea na le sii ai le faasalaga o le 26 e faatutusa ma le 25 ma le faaaloalo lava.

FOFOGA FETALAI: Malo. Ia e faapea e lafo atu e silasila i ai le Taitaifono, o le fautuaga. Ia tulai mai ia le Taitaifono sina au saunoaga e faamalie ai le sui o Faleata faapea foi ai ua o ta faimea faatamala ia ia.

Afioga Hon GATOLOAIFAANA AMATAGA-GIDLOW: O le fesili pe o le a le mea ua le suia ai ma le 26. O mo... e sili atu ona matuia ia le tulaga lea o le taufaasese i lou alu fai mai o oe o le matai. E toatele lava tagata e o fai mai o latou o matai, e le afaina. Ae o le taufaasese lea, o le matuai le tonu lava o ia faaupuga. O le mea lea ua eseese ai ia... faafetai lava.

FOFOGA FETALAI: Ia, malo faafetai. Ia o la e matau atu o la e soisoi ia le sui usufono o Faleata ua malie i ai.

Faamaonia le Teuteuga.

Faamaonia le Fuaiupu 26 e pei ona Teuteuina.

FUAIUPU 27: Resitara ina ia teena le faauluina o se talosaga.

FOFOGA FETALAI: O lo o i ai le Teuteuga a le Komiti i le Fuaiupu e 27. Tulai mai lau afioga i le Taitaifono.

Afioga Hon GATOLOAIFAANA AMATAGA GIDLOW: Lau afioga i le Fofoga Fetalai...

“TEUTEUGA:

Ia suia le fuaiupu 27:

“27, Faatapulaaina o le faatoai atu o Talosaga – E le tatau ona faatoai atu se Talosaga tetee i se mataupu na faia muamua ai se faaiuga tumau a le Faamasinoga, seia vagana ae o se faatagaga a le Peresetene.”

Faamaonia le Teuteuga.

Faamaonia le Fuaiupu 27 e pei ona Teuteuina.

FUAIUPU 28: Poloaiga le tumau a le Peresetene po o le Sui Peresetene.

FOFOGA FETALAI: O lo o i ai Teuteuga a le Komiti i le Fuaiupu 28.

Afioga Hon GATOLOAIFAANA AMATAGA-GIDLOW: Lau afioga i le Fofoga Fetalai...

“TEUTEUGA:

I totonu o le faafuaiupu (1):

Ia faaofi le tuanai ai o le upu “talosaga” se faailoga koma ma upu”, faatagaga e talosaga tetee ai i le talosaga, po o le talosaga tetee”,

Faamaonia le Teuteuga.

Faamaonia le Fuaiupu 28 e pei ona Teuteuina.

FUAIUPU 29: Poloaiga le tumau a le Resitara.

Faamaonia.

FUAIUPU 30: Umi o le aoga o se poloaiga le tumau a le Resitara.

Faamaonia.

FUAIUPU 31: Taumafaiga anoa e foia ai se feeseeseaiga.

FOFOGA FETALAI: O lo o i ai le Teuteuga a le Komiti i le Fuaiupu 31.

Afioga Hon GATOLOAIFAANA AMATAGA-GIDLOW: Lau afioga i le Fofoga Fetalai...

“TEUTEUGA:

I le faaupuga o le fuaiupu, ia suia le faaupuga atoa:

“E manaomuia itu faamasinoga taitasi i se mataupu i le Faamasinoga ina ia faia se taumafaiga anoa e foia ai le feeseeseaiga a o le i amatalia le Faamasinoga e ala i le auai i iuga o feeseeseaiga po o leleiga i le faa-Samoa.”

Faamaonia le Teuteuga.

Faamaonia le Fuaiupu 31 e pei ona Teuteuina.

FUAIUPU 32: Ia faatautaia e le Resitara o leleiga faa-Samoa.

FOFOGA FETALAI: O lo o i ai le Teuteuga a le Komiti i le Fuaiupu 32, tulai mai le Taitaifono.

Afioga Hon GATOLOAIFAANA AMATAGA-GIDLOW: Fuaiupu 32 lau afioga i le Fofoga Fetalai...

“TEUTEUGA:

(a) i totonu o le faafuaiupu (1):

Ia suia le faaupuga “taualumaga, so o se feeseeseaiga a o lumanai ai le faatoai atu o se talosaga i lalo o lenei Tulafono ma i le fesootaiga ma lea feeseeseaiga” i upu “po o so o se feeseeseaiga a o lumanai ai faatoai atu se talosaga i lalo o lenei Tulafono.”

(b) mo le faafuaiupu (4), ia suia e faapea:

“(4) E mafai e le Resitara ona poloaiina tupe totogi mo le le auai i lalo o lenei fuaiupu.”.

Faamaonia le Teuteuga.

Faamaonia le Fuaiupu 32 e pei ona Teuteuina.

FUAIUPU 33: Fonotaga a le Faamasinoga mo le Foia o Mataupu.

FOFOGA FETALAI: O lo o i ai le teuteuga a le Komiti i le fuaiupu 33. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai:

“TEUTEUGA:

Fuaiupu 33:

(a) ua suia le faafuaiupu (3) ma le (4) i le faafuaiupu (3) ma toe faanumera faafuaiupu ia ua taua mulimuli ane e faapea:

“(3) E le tatau i se Faamasinoga o ia lea ua galue o se tagata e taimua i fonotaga ona avea ma Faamasino i luga o so o se tasi o mataupu lava ia.”;

(b) i totonu o le faafuaiupu (4) ia suia upu “o se faaiuga” i upu “o se poloaiga”.

Ia aveesea le faafuaiupu (6).

I totonu o le faafuaiupu (4) ua toe faanumeraina: Ia suia upu “o le a faatatauina” i upu “e tatau ona valaauina i totonu o le Faamasinoga mo se faamaoniga”.

Faamaonia le Teuteuga.

Faamaonia le Fuapu 33 e pei ona Teuteuina.

FUAIUPU 34: Faagasologa o Iuga o Feeseeseaiga.

FOFOGA FETALAI: O lo o i ai teuteuga a le Komiti i le fuaiupu 34. Tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW:
Lau Afioga i le Fofoga Fetalai:

“TEUTEUGA”

Fuaiupu 34:

Ia suia le faafuaiupu (1) ma le (2):

“E mafai e le Faamasinoga i so o se taimi e manatu o ia ua talafeagai ai ona poloaiina itu faamasinoga e faaaogaina gasologa e foia ai feeseeseaiga a o faagasolo tualumaga o se mataupu ma afai e faia sea poloaiga, e mafai e le Faamasinoga ona tolopo le mataupu.”

Faamaonia le Teuteuga.

Faamaonia le Fuaiupu 34 e pei ona Teuteuina.

FUAIUPU 35: Faiga Suega a le Faamasinoga.

FOFOGA FETALAI: O lo o i ai le teuteuga a le Komiti i le Fuaiupu 35. Tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW:
Lau Afioga i le Fofoga Fetalai:

“TEUTEUGA:

Fuaiupu 35:

Ua suia le fuaiupu 35 e oo atu i le 62 i le Fuaiupu 35 e oo atu i le 60.

“35. Faavaeina o tualumaga – (1) O tualumaga u ai luma o le Faamasinoga o Fanua ma Suafa e ao ona amatalia i le faatoai atu o talosaga faasaga i faaiuga e faia i totonu o pepa faatumu faatonuina.

(2) O se talosaga faasaga i se faaiuga e faatoai atu e ao ona lomiga faasalalau e le Resitara i totonu o lomiga sosoo e tolu (3) tai masina o le nusipepa a le Savali.

Afioga Hon FIAME NAOMI MATAAFA: Lau Afioga i le Fofoga Fetalai faamolemole, e le fia faalavelave i le galuega a le Komiti, ae o se mea e fia malamalama ai.

FOFOGA FETALAI: Tulai mai le Sao Faapito. Saunoa lau Afioga.

Afioga Hon FIAME NAOMI MATAAFA: E matau atu i le vaega lea o i ai se suiga i fuaiupu e amata mai le 35 e oo atu i le 62. Ia o lea o lo o faapea mai ua suia le fuaiupu foi lea, tusa o lea ua sui atoa se vaega atoa o le Tulafono lenei i le matau atu i le faataatia mai - 35 i le 62. Lau Afioga, o lona uiga, e le o se teuteuga le mea lea, o le Tulafono atoa i se vaega. A o lea faatoa maua le avanoa e tau faitau atu ai. Ou te le iloa po o le a le sao o lea ituaiga faiga lau Afioga i le Fofoga Fetalai, ua toe suia atoa na mau fuaiupu ma e matau atu, o le vaega lea e faatatau i taualumaga o le faatinoga o le galuega a le Faamasinoga o Fanua ma Suafa.

Ia, o le mea nei lau Afioga, e le faapea o ni teuteuga laiti ua faia i le tino o le Tulafono na aumai i luma o le Fono, ua matuai sii atoa ese lava le mea sa i ai ae aumai le mea fou. O lea la e tatalo atu ai lau Afioga i le Fofoga Fetalai, ia, e tusa ai foi ma le tulaga e ao ona tagofia ai ia ituaiga faiga faapea; pe sao ea lea mea, pe mafai ona aveese lea vaega e tau ina aumai pea e tilotilo i ai, ae faaauau pea isi vaega ia taitasi ia ua tatou malilie i ai.

E pei o le mea lena ua ta tu atu ai, e maoae foi sia faiga ua aliali mai, aemaise o le aano lea o le Tulafono, o taualumaga ma le faatinoga o le tatou Tulafono lea o Fanua ma Suafa. Ia, na o se mea e faafesili atu lau Afioga. Ma le faaaloalo lava.

FOFOGA FETALAI: Malo faafetai. Se i tulai mai le Taitaifono.

Afioga Hon GATOLOAIFAANA AMATAGA ALESANA-GIDLOW: Faafetai lava i lau Afioga i le Fofoga Fetalai, faafetai foi i le laga o le vaega lea leaga e sao atu ai se faamalamalama lau Afioga. E pei foi o se tala na fai atu i se taimi ua fano, o lea faatoa tau faamaioio le Tulafono lea o Fanua ma Suafa, lea ua i ai le Faamasinoga 1, ua i ai le Faamasinoga Mauuluga, ua i ai le Faamasinoga o Iloiloga ma Talosaga. O faamasinoga uma lava na, e eseese talosaga e faatatau i ai, pe eseese tulaga o latou jurisdiction, ma o le faavasegaga lea e aumai ai, ua maioio mai ai taimi e mafai ai ona tatala le avanoa e te alu atu e te talosaga ai. Mo se faataitaiga; i le High Court po o le Faamasinoga mauuluga o le Faamasinoga o Fanua ma Suafa. O le mea lea sa i ai, e faatalaloa lava e tuatalaloa, e fiu e faatali se taimi e tali mai ai le

Faamasino po o le Faamasinoga i se taimi e mafai ai ona faia sau apili, pe mafai ona tali mai i sau talosaga mo sau apili. E umi se taimi o faatali, lea tou te silafia ou te iloina, o isi ua atoa lava le 20 tausaga e le i faia se tulaga tau apili po o vaega faapena. O le vaega la lea i le 35 i le 62, ua maioio mai ai taimi e tatau ai ona faatino e le Court po o le faamasinoga 1 le vaega lea o talosaga e tatau ona tali mai ai e tatau ai ona faatino lau faamasinoga. O lea foi ua maioio mai i le Faamasinoga Mauualuga o Fanua ma Suafa, le taimi o le a tali mai ai i sau apili e avatu, ae po o afea foi a fai ai. E faapena foi la i luga i le Faamasinoga o Iloiloga ma Talosaga. O le mea la lena o lea e faapea mai ai, o le faamaioio mai o taimi e tusa o le mataupu foi lea, o le tali atu foi i atugaluga o le tatou atunuu. O le mea lava lea na aumai, fia tausaga o faatali, e fai o taimi e fai ai, a o faaiuga foi, e fia ni tausaga o faatali ni faaiuga e aumai. O le vaega la lea, o lea ua maioio taimi e tatau ona faatino uma ai mea ia, ua faatulafonoina ina ia aua ai lava ona toe salaese le galuega faa-faamasinoga i le Tulafono e tatau ona faatino ai le galuega faa-faamasino.

Ia, o sau tala atu lena lau Afioga i le Fofoga Fetalai.

Afioga Hon FAAOLESA KATOPAU T. AINUU: Lau Afioga i le Fofoga Fetalai na o se tamai faaopoopo lava.

FOFOGA FETALAI: Ia se i tulai mai le Minisita.

Afioga Hon FAAOLESA KATOPAU T. AINUU: Ua matau foi e lau Afioga ma le mamalu o le Maota, ua sui ua le o toe lua levels o le Lands and Titles a ua tolu. Ua eseese foi o latou manaomiaga. Ma o le ala lea ua ala ai ona faaopoopo le vaega tele lea o le suiga o le Tulafono ina ia faamaioio ai vaega o lea level faapena lea level. Ua tolu levels o le faatinoga o galuega, ua eseese. E pei o le mafuaaga lena ua ala ai ona faaopoopo le vaega tele lea o suiga o Tulafono e pei ona saunoa i ai le Taitaifono. Ma le faaaloalo lava.

FOFOGA FETALAI: Ia, se i tulai mai se tasi o sui o le Komiti se i fesoasoani mai...

Tofa NAMULAUULU SAMI LEOTA: Lau Afioga i le Fofoga Fetalai, e manaia lava le tatou femalamalamaai i le vaega lea. O le 35 i le 62, na o le faavasegaina lava o proceedings ia faamaioio ai lea vaega i lea vaega. Manatua foi o le faamasinoga muamua, apili lea i le lona lua, apili lea i le lona tolu. A tagai nei i le Tulafono tuai, o lena o lo o i ai. Na pau lava le vaega lea na o teuteuga ina ia faapena ona manino, aua o le isi lea atugaluga o le atunuu na faapena ona aumai, o taimi. O lea la ua matou vaai i taimi foi nei ina ia faapupuu ai, mai le 30 aso i le 21 aso ia faapena ona faapena ona faavavevave ai ma faapena ona tali atu i manaoga o le atunuu ia faapena ona

faatopetope ma maioio a tatou faiga faavae i totonu o faatulagaga o Faamasinoga ina ia vave tali atu ai i manaoga o le atunuu. So o le 35 la i le 62, o le aano lava lena e tasi o lo o atagia atu i le Tulafono tuai, ae na ona faatulaga lava pei ua sui fuainumera e pei o le 38 na i ai, lea ua aumai i luma i le 35. Na o numera lava, a o le mea lava e tasi lau Afioga. Ma lou faaaloalo lava.

FOFOGA FETALAI: Ia, masalo o lena ua manino auofala i lea vaega. Se i tulai mai lava le sui usufono mo le Nuu Tu Taulaga i Sisifo.

Afioga FAUMUINA ASI PAULI WAYNE FONG (Nuu Tu Taulaga i Sisifo): Faafetai i lau Afioga i le Fofoga Fetalai. E tasi lava le fesili e fia tuu atu, i le tulaga lea o le vaega o le Standing Orders 108, lea o lo o i ai le tulaga na o faasaoga pe a faapea ua i ai se mea o sese, a o lea ua suia atoa le vaega lea o le Tulafono, pe le tatau la ona toe tilotilo i ai lau Afioga aemaise foi le tatou Palemene, ona o lea ua amend. Lena e fai mai e leai se amendment e mafai ona toe faia pe a sui atoa. O lea la e tatalo atu ai i lau Afioga, se i faamalamalama mai la po o aafia ai le suiga lea o le vaega lea o le Tulafono 108. Ma le faaaloalo lava.

FOFOGA FETALAI: Malo. O lea ua manino le tulaga lea pei ona saunoa foi se tasi o sui o le Komiti e faamatalaga le tulaga o le 35 i le 62. Malo faafetai. Ia o le tulai mai foi o le Afioga ia Faumui le sui o le Nuu Tu Taulaga i Sisifo. O lou finagalo o le vaega tonu lena e faasino pe a tatou oo atu i le faitauga faatolu, a o le auiliiliga lea tatou te i ai. Ia o lea lava ua tatou alu ai i le mea lea e te saunoa i ai, e tatau ona silasila ma soalaupule ma faamanino le tulaga o vailiu ia pei ona aumai e mea taitasi. O le mea la lena e leai lava se eseese ma le tulaga o lea ua faagasolo ai le tatou galuega, a o le vaega lena e fitoitonu i le faitauga faatolu o le tatou Tulafono.

Ma ua ou manatu ua aogagase foi le tatou galuega. O le a se i fai se tatou malologa mo sina 15 minute.

Se i tulai mai le Taitai o le Malo.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO NEIOTI GALUMALEMANA Dr. SAILELE MALIELEGAOI: Lau Afioga i le Fofoga Fetalai ae tatou te le i malolo, e le tele lava ni suiga. O lea lava ou te tilotilo atu nei i le 35, o lea e sau le faaupuga o taualumaga i luma o le Faamasinoga, ae sau le Teuteuga, o taualumaga ua i luma o le faamasinoga. Sau le 2, e tatau i le resitala ona faasalalau le talosaga. A o lea foi e sau i i, o se talosaga i se faaiuga e ao ona lomina faasalalau e le Resitala. O le laititi ia o nai suiga. E toeitiiti lava tutusa upu, a o le laititi ia o nai uiga ia e eseese ai. Ne i te i ua faatele le mea laititi, ae aoga foi le tatou malolo ia...

FOFOGA FETALAI: Malo faafetai. Ua ou manatu lau Afioga i le Taitai o le Maota, ua ou mate, e te silafia foi i le ta itumalo e i ai Tutuila foi lea moemanatunatu, Apenamoemanatunatu. Ua ou manatu o le ala lea o le tulai mai o le itu lela, ua fia maua sina malologa i sina 15 minute. Masalo a tatou toe foi mai, ona faagasolo loa lea ma vave le tatou galuega.

E faasilasila atu o le a tuuese a tatou...

Afioga Hon FIAME NAOMI MATAAFA: Lau Afioga, o le tulai atu o le naunautai e fai le tatou galuega pei ona aumai le lafo a le Afioga i le Palemia. E le o se fia malolo lea e tulai atu ai, o lea e fia malamalama pe faapefea ona tatou faia ia ituaiga mea faapea.

FOFOGA FETALAI: Malo faafetai.

Afioga Hon FIAME NAOMI MATAAFA: Ma e a faapea o la e malamalama mai le Komiti, ona ua leva ona feagai latou ma le taumafaiga lea, malo lava. A o lea faatoa oo mai i nei, o fea o i ai le amiotonu o lena mea?

FOFOGA FETALAI: Ia, atonu e aoga foi le tatou malologa e toe faitau ifo ai a tatou pepa.

Ou te faasilasila atu ua faataatia ese galuega mo le malologa e faitau ai le pepa a le itu le la.

Na faataatia ese Galuega a le Fono Aoao Faitulafono mo lana malologa i le itula e 2:55 ma toe amatalia i le itula e 3:40 i le afiafi.

FOFOGA FETALAI: Ou te toe faasilasila atu ua toe amatalia Taulumaga ma Galuega a le Fono Aoao Faitulafono.

Ia, e i ai le manatu ua vela le fala i le tatou galuega, a ua maua foi le faasiliga malosi. Ia e faamoemoe lava i le Atua e aumai le malosi e faaauau ai le tatou galuega ae a se manuia o Samoa ma lana tapuaiga.

E faataatiaese Taulumaga a le Fono Aoao ua maea teuteuga a le Komiti e pei ona toe faatulaga ai le Fuaiupu 35 i le 62. O lea ua tuuina atu le fesili mo le faamaoniaga o le teuteuga ma tuuina atu le fesili. O lea ua oo mai le tatou faasologa i le vaega e 63.

Ia se i tulai mai lau Afioga i le Sao Faapito.

Afioga Hon FIAME NAOMI MATAAFA: Lau Afioga o le faasologa o le tatou galuega, sa tuua e faalemanino lelei pe faapefea ona tagofia lea

vaega o le Lipoti a le Komiti, le teuteuga o se vaega atoa e pei ona tuuina mai.

E fia tuliloa lava lau Afioga i le Fofoga Fetalai e fai foi o tatou Tulafono Tumau, a o ala o mea e faagasolo ai le tatou galuega.

O lea la e matau atu, o le eseese o le vaega lea 35 i le 62, o lea ua aumai i se aotelega. O le fesili la ma le faaaloalo, aua o lea e pei ona matauina ua amata ona faitau mai e le Taitaifono o le Komiti lenei suiga atoa. Pe o le ala lea o le a tatou o ai. Aua o le mea moni lau Afioga, e le i vaai muamua se isi i le vaega lea o le Tulafono, e le o se toe teuteuga.

FOFOGA FETALAI: Malo faafetai. O lea ua maua le finagalo o lau Afioga i le Sao Faapito, ia, ou te faamalulu atu foi, e faapena lava le faagasologa o tatou galuega, e i ai foi le mea e laaloa ai le vaai. Ae ou te tapa le... o lea... ua ou manatu e tatau ona lafo i le Komiti e toe tolaulau mai le suiga foi mai le 35 i le 62 ona tuu atu ai loa lea o le fesili e faamaonia ai. Ou te manatu o le tulaga lea pei ona i ai le finagalo o le Afioga i le Sao Faapito, ma o le tulaga foi lea e tatau ona i ai, ae ua na o se tolaulau a le Komiti i le tuufaatasia o le 35 se i tau i le 62, ia mo le malamalamaaga o le sui usufono mamalu o le Palemene pei ona tulai mai le Sao Faapito ona tuuina atu ai loa o le fesili mo le vaega atoa lea.

Ia se i...

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai, o lea ua manino atu i lou finagalo, o le agaga lava o le faaauau o le tatou galuega, ia, o le a tatou o ai ia faapea lau Afioga. Ae tasi lava le mea, ona e ui o lo o aumai o se teuteuga e aofai ai se vaega tele o le Tulafono, pe mafai la i le faitauga a le Taitaifono o le Komiti ona laga mataupu i fuaiupu taitasi e pei ona tulaga masani ai lea sa tatou omai ai i isi teuteuga ia i fuaiupu taitasi. O e maua mai le uiga o le fesili?

FOFOGA FETALAI: Ua ou manatu o lea o le a saunoa le Taitaifono o le Komiti e tolaulau le tulaga lea, ae a i ai se mea e fia laga e lau Afioga ma sui usufono mamalu o le Palemene, o le a faapena ona tuu atu le avanoa.

Afioga Hon GATOLOAIFAANA AMATAGA ALESANA-GIDLOW: Lau Afioga i le Fofoga Fetalai, e pei i lau matau atu, e ta te malolo ua i luga i le 40 o lea sa auiliili taitasi a vaega ia. E augofie lava le Komiti e alu alu taitasi pe a faapea e aua ne i afaina foi lea le galuega.

Ae tatou te malolo ua i luga i le 40 e le o taaofaiga le 35 i le 62. E gata i le 40 ea po o le 41.

Afioga Hon FIAME NAOMI MATAAFA: Lau Afioga i le Fofoga Fetalai, na tatou malolo ua tatou oo mai i le itulau e 15 o le Lipoti lenei lea

o lo o i ai le vaega lea e faapea o le 35 i le 62. Na tatou malolo la, o lo o fai le tatou felafolafoaiga pe faapefea ona fai le vaega lea, ona e tulaga ese lona faatulagaina mai. E leai la e le i oo i le 40, o lea tatou te i i le 35 i le mea na amata ai le tatou talanoaga i le mataupu lea.

FOFOGA FETALAI: Se i tulai mai le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, masalo e faigofie lava ona faagasolo i le 35 agai atu i le 36 faasolosolo atu ai faapena. A siaki le Tulafono, toe siaki i fautuaga ia e aumai, e le tele lava se eseeseega. E laitiiti lava le eseeseega. Ou te le iloa po o aumai tou kopi o Tulafono na tufa atu ia te outou i le 10 masina talu ai.

Afioga Hon FIAME NAOMI MATAAFA: Lau Afioga o lea e i ai matou kopi, ae na pau lava le mea, e tulaga ese si teuteuga lea ua aumai, e le fua la i le Tulafono tuai, aua o le mea moni, o le mea fou atoa lava lea ua aumai.

FOFOGA FETALAI: Ia, pei e i ai le manatu, malie lau Afioga i le Taitaifono na o sina au saunoaga i le vaega lea pei ona matau mai foi e le Afioga i le Sao Faapito ina ia faapena ona faamalieina pea i latou o lo o faapea ona tulai mai. E manatu foi le Nofoa e puipui i le Tulafono ma le faagasologa o le tatou Galuega ia faapena ona faamanuaina finagalo o sui usufono mamalu, a o lea ua tatou i ai i le auiliiliga o mea taitasi, a o lea ua tuufaatasi le teuteuga o le 35 i lona aotelega i le 35 e tau i le 62.

Ona ou manatu lea, na o sina au faapupulaga laitiiti i le tuufaatasiga o le 35 lea pei ona tuuina mai e le teuteuga, ona tuuina atu ai loa lea o le fesili ae tatou see atu i le 63. Ia...

Afioga Hon GATOLOAIFAANA AMATAGA ALESANA-GIDLOW: Lau Afioga i le Fofoga Fetalai pei ona ou tau maua atu i le finagalo o le Afioga i le Palemia, e augofie lava le Komiti pe a tatou o pea i vaega taitasi e pei ona saunoa ai le Afioga i le Sao Faapito. Ae o le tulaga lava latou ia o vaega ia 35 e oo i le 62, o le toe faasologa lava o teuteuga o lo o faia. E leai ni teuteuga tele, a o le toe faatulagaina, restructure ina o galuega a faamasinoga taitasi, leaga e fou isi vaega e pei la o le Faamasinoga o Iloiloga ma Talosaga e le i i ai muamua i totonu o le tatou Faamasinoga o Fanua ma Suafa. A o lea la ua i ai, o le toe restructure ina la o vaega ina ia i ai i totonu vaega na. E pei uma lava o lau faamatalaga foi lena na fai i le taimi ua fano, ae augofie lava le Komiti lau Afioga, pe a auiliili taitasi ina ia aua ne i afaina le galuega.

Afioga Hon FIAME NAOMI MATAAFA: Lau Afioga i le Fofoga Fetalai, o le mea e fia malamalama i ai i le itu lea e saunoa mai ai le Afioga i le Taitaifono e faapea ua ala ona fai le mea lea ona e fou le fuafuaga lea ua faataatia mai e le Tulafono. E le faapea la ua fou i i, na fou lava i le taimi na amata mai ai le faatulagaina o le faamasinoga i lona faamasinoga fou, ma le faaopoopoina i ai o le faamasinoga toe Iloilo pe a ma le faamasinoga o apili. E faigata ona ou malamalama i le mea lea e saunoa mai ai ua ala ona sui ona e fou mea ia na fai. E leai na aumai lava le Tulafono e fou. O lona uiga, e le i atoatoa la le tapenaga na aumai ai le Tulafono?

Afioga Hon GATOLOAIFAANA AMATAGA ALESANA-GIDLOW: Pei ona taumafai atu lau Afioga i le Fofoga Fetalai, o le tatou Tulafono o le Tulafono Tau Faaofi. E i ai la vaega sa tilotilo i ai i le iloiloga e tataua ona faamaioio ma faamanino i le tulaga lea o le a tutoatasi ai le tatou Faamasinoga o Fanua ma Suafa. Na pau lea. Ae o le faatulagaga ma le toe faamaioio ma toe faamanino mai le faiga o le process o jurisdiction a faamasinoga taitasi, a o le agaga lava latou, o le mea lava e tasi. Ae pei ona fai atu, a finagalo lava e o e auiliili taitasi fuaiupu ia, tatou alu ai i lona. E leai sau faamatalaga se i vagana ua raise mai se fesili i se vaega o mea ia faamolemole.

FOFOGA FETALAI: Ia, ina ia faafaigofie le mataupu, aua o lona uiga o le finagalo o le Afioga i le Sao Faapito, o le a tatou toe o e auiliili le tulaga o le 35, 36, 37, 38 i le tulaga se i paia le 62. O lou finagalo lea Fiamē?

Afioga Hon FIAME NAOMI MATAAFA: Aua lau Afioga, e leai lava se isi auala e fai ai, o lea e fou atoa lava le mea lea, ae ua le mafai la ona aveese mai e i ai se taimi e toe vaai i ai le Maota, aua e lelei le Komiti o lea ua silasila latou i ai, ae i ala o mea, e le i vaai muamua se isi i le mea lea.

FOFOGA FETALAI: Malo faafetai.

Afioga Hon FIAME NAOMI MATAAFA: Lau Afioga faamolemole lava, ae a pe a talosaga atu ma le faaaloalo i le Taitaifono o el Komiti, o le mea foi o lea e tau faitau lava lenei lipoti aua o lea faatoa tau aumai. O lea foi na matou talanoa ma isi faipule faapea o lea lava e faasolo le tatou Fono a o lea e faaauau mai lava le tufaina mai o le tatou Lipoti o la e tau print mai. Paga lea lau Afioga i le Fofoga Fetalai, o a ea nei ituaiga faiga i le aumai o mataupu i totonu o le Maota? O lea la e le o maua se matou avanoa e faitau lelei ai, lea foi o le a oo i se teuteuga ogaoga ma le tele faapea. Ae i ai lava le agaga lea e pei e aliali mai e faatopelau le faiga o le tatou mataupu.

FOFOGA FETALAI: Mo le silafia e lau Afioga i le Sao Faapito, o le faagasologa lea o le tatou galuega e tatou te o lava i mea taitasi. O lea la e i ai le manatu, o le a taoto le finagalo lea o le tuufaatasiga o teuteuga lea e saunoa i ai le Taitaifono ona o le faagasologa o galuega faatino a le Vaega Tafatolu lea pei ona i ai le tulaga o le Faamasinoga o Fanua ma Suafa ma le Faamasinoga o Soligatulafono. O lea la ua ou manatu, o le a faamalieina le finagalo o lau Afioga i le tamaitai faipule, o lea o le a tatou faagasolo lava faapena, e lelei foi lena e aua ne i i ai le matega faapea ua topelau le galuega, e leai o le galuega nei ua uma ona silafia, e leai e faapena ua 10 masina talu ona faagasolo lena galuega.

Faamaonia le Teuteuga.

Faamaonia le Fuaiupu 35 e pei ona Teuteuina.

FUAIUPU 36: Galuega tauave ma malosiaga o le Resitara i luga o leleiga ma suesuega.

FOFOGA FETALAI: O lo o i ai le Teuteuga a le Komiti i le Fuaiupu 36. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA-GIDLOW:
Lau Afioga i le Fofoga Fetalai:

“TEUTEUGA:

Fuaiupu 36:

36. Tualumaga o le Faamasinoga - (1) O taimi ma nofoaga e atofaina mo tualumaga o le Faamasinoga e fuafuaina e le Resitara i le maea ai ona feutagai ma le Peresetene.

E mafai e le Faamasinoga a o faagasolo se tualumaga ona faafogaina so o se mataupu, ma e mafai foi ona ia tolopoina le fofogaina i so o se isi lava taimi po o se nofoaga.

(3) O se mataupu ua tolopoina i lalo o le faafuaiupu (2) e le tatau ona faatuai e aunoa ma se mafuaaga tatau.

- (4) O ni Faamasinoga se lua (2) po o le sili atu ua faavaeina i lalo o lenei Tulafono:
- (a) e mafai ona faagasolo ana taualumaga i le taimi lava lea i
 - (b) le nofoaga lava lea po o se isi nofoaga ese ua atofaina; ma
 - (b) e i ai malosiaga uma ma puleaga faa-faamasinoga o le Faamasinoga o Fanua ma Suafa.

Afioga Hon FIAME NAOMI MATAAFA: Lau Afioga i le Fofoga Fetalai..

FOFOGA FETALAI: Ia se i....tulai mai lava le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUAMALEMANA Dr. SAILELE MALIELEGAOI: E faamalo atu i le vaega lea, pau le mea lea ou te fia fai atu, o le vaega 4 i le tatou Tulafono, lea o le a ou lau atua. O ni faamasinoga se lua (2) po o le sili atu foi ua faavaeina i lalo o o lenei Tulafono. (a) e mafai ona tauaofia i le taimi e tasi, i lea lava nofoaga, po o ni nofoaga eseese ua lautogia; ma le (b) o le a i ai malosiaga uma i pulega faamasinoga a le Faamasinoga o Fanua ma Suafa. O le a ou lau atu loa la ia teuteuga ia ua tatou faia. O ni faamasinoga, e tutusa lelei lava. O ni faamasinoga i le mea tuai, o le mea fou, O ni faamasinoga se lua (2), po o le sili atu i le mea tuai, o ni faamasinoga se lua (2) pe sili atu. Ona sau loa lea i le (a), e mafai ona faagasolo, e mafai ona tauaofia le (a) i le mea tuai, sau le mea fou, (e), e i ai malosiaga uma (b) o le a i ai malosiaga uma. Lau Afioga i le Fofoga Fetalai, e tutusa lelei, ae tatou o pea faapea.

FOFOGA FETALAI: E masalo o lea ua manino le tulaga lea e pei ona toe faaopoopo mai le Taitai o le Maota.

Afioga Hon FIAME NAOMI MATAAFA: Faafetai lava mo le faamanino atili e le Palemia. E na o le pau lava le mea lea ou te fia fesili atu ai i le taitai Komiti. Ona i lalo o le vaega lea o lo o faamatala mai ai mafuaaga e fai ai suiga nei. O le faaiiuga lava o le faamatalaga o le teuteuga lea. O lea e talanoa e le gata i se nofoaga, a o se faaiuga lea na faia, a o lumanai ai le faamamaluina o le Tulafono Tau Faaofi pe a pasia. Ou te fia fesili atu lava lau Afioga i le Taitaifono o le Komiti, i le fuaiupu mulimuli lava lea, o le a le faia o le faaiuga ma le nofoaga o lo o fai ai, ma le pasia o le Tulafono lenei. Pe a fua i le faamatalaga lea e i ai i i. Pe o lou malamalamaaga, o faaiuga na fai, ae le i pasia le Tulafono lenei. O le a faaauau pea i le Tulafono tuai, pe o le a ono toe i ai se suiga, pe a faapea e fai le faaiuga lena, ae ua pasia le Tulafono lenei o lo o tatou faagasolo. Na o le pau lava lena o le mea ou te le o manino i ai, i le aumaiga. Ae silasila i mafuaaga o lo o faaiu mai

ai lava, faaiuga lea na faia, a o lumanai ai le faamamaluina o le Tulafono Tau Faaofi pe a pasia. Ou te fia malamalama i ai i le mafuaaga lea.

FOFOGA FETALAI: E i ai se isi tali faaopoopo, aua o lea ua saunoa manino le Taitai o le Maota i le tulaga lea i le faagasologa lea ua i ai, lea sa manaomia e faamalamalama. Ae vagana e i ai se isi faaopoopoga.

Afioga Hon GATOLOAIFAANA AMATAGA ALESANA- GIDLOW: Lau Afioga i le Fofoga Fetalai, o le agaga o le teuteuga lea, e faataga ai le faamasinoga, e mafai ona ave i so o se nofoaga e finagalo i ai le Peresetene, ma fai ai faaiuga e tusa ai ma lena foi faamasinoga. Pe a pasia le Tulafono lenei, o a lava faaiuga o le a faia i na nofoaga, o le faaiuga lava lena o le a i ai. Ae le faapea o le a toe lotea faaiuga ua uma o la ua i ai nei. A o lea lava ua i ai le tatou faamoemoe, o faaiuga a faamasinoga e mausali. Ae o lea e talanoa i faamasinoga fou, ma nofoaga fou, e ave lava i ai le jurisdiction a le First Court po o le Faamasinoga Muamua. E pule lava le Peresetene po o fea e fai ai, ae ave ai ma ana aiaiga ma ana jurisdiction, e tataua ona faatino i ai, ma aiaia ma faaogaina. O se tali atu lena lau Afioga i le Fofoga Fetalai.

FOFOGA FETALAI: Malo faafetai.

Faamaonia.

Faamaonia le Fuaiupu 36 e pei ona teuteuina.

FUAIUPU 37: Feeseeseaiga i luga o aia i auala.

FOFOGA FETALAI: O lo o i ai teuteuga a le Komiti i le Fuaiupu 37.

Afioga Hon GATOLOAIFAANA AMATAGA ALESANA- GIDLOW: Lau Afioga i le Fofoga Fetalai,

O galuega tauave ma malosiaga o le Resitara i luga o leleiga ma suesuega:

(1) O galuega tauave a le Faamasinoga e mafai ona faatino e le Resitara pe afai e faatonuina e le Peresetene po o le Sui Peresetene po o le Peresetene Lagolago, e aofia ai le tolopoina o mataupu po o isi mataupu mo faamoemoega tau pulega.

(2) O se faatonuga ua faia e le Resitara i lalo o lenei fuaiupu, ua faatatauina lava o se faatonuga a le Faamasinoga.

(3) I sauniuniga mo le fofogaina o se mataupu i lalo o lenei fuaiupu, e mafai e le Resitara ona aofia ai ni ata faamaonia o le faiga

faavae na tuuina atu ia te ia i lalo o le fuaiupu 5A(3) o le Tulafono o Fono a Nuu 1990.

Lau Afioga i le Fofoga Fetalai, o teuteuga na.

Faamaonia.

Faamaonia le Fuaiupu 37 e pei ona teuteuina.

FUAIUPU 38: Faavaeina o taualumaga.

FOFOGA FETALAI: O lo o i ai teuteuga a le Komiti i le Fuaiupu 38.

Afioga Hon GATOLOAIFAANA AMATAGA ALESANA- GIDLOW:
Lau Afioga i le Fofoga Fetalai:

Feeseeseaiga i luga o aia o auala: I le faaopoopo i ai i le puleaga faa-faamasinoga a le Faamasinoga o Fanua ma Suafa i totonu o le Vaega IX o le Faavae, e tatau i le Faamasinoga ona fuafua talosaga ma feeseeseaiga o lo o aafia ai le aia i auala po o le avanoa i fanua faaleaganuu.

Vaevaega 2 – Faamasinoga Maua luga o Fanua ma Suafa

Vaevaega Laitiiti A – Talosaga e Faasaga i se Faaiuga.

Afioga Hon FIAME NAOMI MATAAFA: Lau Afioga i le Fofoga Fetalai, o le Fuaiupu lenei, o le feeseeseaiga i luga o aia o auala. E matauina o se mea fou lea. ma i le faatusatusa lea ma le Tulafono tuai, e pei ona saunoa mai ai le Palemia, e tai tutusa lava ia tino o le Tulafono lea e aumai ma le Tulafono na aumai ai. Ae matauina o le vaega lea, o se vaega fou. Ma i le matauina foi, i le aumaiga o le faaupuga o le toe teuteuga o lo o aumai e fapea. O se mataupu lea e mafai ona tagofie e le Faamasinoga o Fanua ma Suafa. Ona e le i masani ai, lau Afioga i le Fofoga Fetalai ma le mamalu o le Palemene ona tagofia e le Faamasinoga ia mataupu ia. E na o le pau le mea e faafesili atu ai, e na ona faapea mai e i ai le malosia, aepeitai e le o i ai foi ni aiaiga e savali ai i luga le faamasinoga i le faatinoga o tiute fou ia faale-Tulafono. Lau Afioga i le Fofoga Fetalai, e ono i ai se tulaga i le taatia ai o fanua faale-aganuu ma fanua umia saoloto, a o ala la e uia e ono tupu mai ai se tulaga e faafaigata i le Tulafono, ona saili po o fea e i ai le fofo. Ae atonu o le autu o lou manatu, o lea ua aumai le pule faale-Tulafono e tagofia ai e le Faamasinoga. Aepeitai e le o aumaia ni aiaiga e faia ai le galuega lea.

A o le tulafono lea, atonu o le Tulafono lea o Fanua ma Suafa e faagaioi ai ia galuega a le faamasinoga. O le mataupu lena i lau Afioga.

FOFOGA FETALAI: Se i tulai mai le sui o le Komiti.

Tofa NAMULAUULU LEOTA SAMI LEOTA: Faafetai mo le avanoa. E na ona ou fesoasoani atu lava i le Afioga i le Sao Faapito. E masalo o le vaega lea e tau fesetai ai le faitauina o le Tulafono Tau Faaofi lena. A tatou matau atu i le 38 tuai lea na i ai, o lea ua tuu mai i le 35, o le vaega lea o le **Right of way** po o le feeseeseaiga i luga o le auala lea e 37. Lea na aumai loa i luga le 38 i le 35, me i mai loa isi faaupuga uma na e tumau ai. O lea la ua 38 ai le 37 lea. A matau atu i le Tulafono tuai, o lo o tutusa lelei lava faaupuga na o lo o i ai, fesoasoani atu ai i le sao faapito. Ma lou faaaloalo.

Afioga Hon FIAME NAOMI MATAAFA: Faafetai i lau Afioga i le Fofoga Fetalai mo le avanoa. O le autu o lou manatu, o se faiga fou lea. Po le toe faatulaga o fuainumera, a o le Tulafono lava ia...oi o le fesili, e faafefea ona fai. E le lava le fai mai e fai e le Faamasinoga le mea lea. Po o maua mai e lau affioga. Ae ona ua aumai, o se mea fou atoatoa, pe mafai ona ou fesili atu ai, e fai ai sina tatou talanoaga laititi i le fuaiupu lea.

FOFOGA FETALAI: Se i fesoasoani mai le Taitai o le Maota.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUAMALEMANA Dr. SAILELE MALIELEGAOI: Lau Afioga i le Fofoga Fetalai, e pau lava le eseesea, o le mea lea na taoto mai ai le tatou Tulafono Tau Faaofi, o lea e faaoga le upu, e mafai. A o le Tulafono lea e i i, e tatau. E mafai le upu lena e i le Tulafono lena ua 10 vaiaso, a o lea ua sau le teuteuga ua i ai le upu tatau. E pau lava le eseesea o le mafai le isi ae tatau le isi. O le matua faatauvaa o lena mea. A o mataupu ia, o mataupu ia e lote e le faamasinoga. Ona faataoto mai ai lea o aiaiga. O lea o le a tatou talanoa galuega a le Faamasinoga, o mea na a latou e fai. O le fesoasoani atu lena, o la e sao le Komiti.

FOFOGA FETALAI: Atonu o lea ua manino le tulaga lea i suiga e pei o lo o... i se auala e faigofie, ona o le finagalo o le sui usufono ina ia faamaioio pe mafai i se a suiga. O le mea lea ou te faamalulu atu ai, ona aiatatau faasui usufono o le Palemene. Ae ui i lea, o lea lava o le a tatou o i le ala umi lea e pei ona finagalo i ai lau Afioga i le Sao Faapito, i le tulaga o lo o i ai. Ae ui i lea o le a tatou o lava i le ala umi lea.

Faamaonia.

Faamaonia le Fuaiupu 38 e pei ona teuteuina

FUAIUPU 39: Taofia o le faaauauina o taualumaga.

FOFOGA FETALAI: Se i tulai mai teuteuga a le Komiti.

Afioga Hon GATOLOAIFAANA AMATAGA ALESANA- GIDLOW:
Lau Afioga i le Fofoga Fetalai, o le Fuaiupu e 39.

“TEUTEUGA:

Mafuaaga mo talosaga e faasaga i se faaiuga: - E mafai ona faamatuu atu se faatagaga e talosaga ai faasaga i se faaiuga a le Faamasinoga Maua o Fanua ma Suafa i luga o so o se tasi o mafuaaga nei.

(a) E faapea ua toe maua faamatalaga molimau fou ma faamatalaga anoa talu mai le fofogaina o le talosaga lea e le i ai se malamalamaaga o le tagata talosaga, po o lea e le mafai i luga o mafuaaga talafeagai na tuuina atu i le fofogaina o talosaga.

(b) E faapea ona nofosala le itu faamasinoga na faamanuiaina i se amioga ua le alagata e tusa ai ma le fofogaina o le talosaga e faasaga i le faaiuga e aafia ai le taunuuga o le mataupu.

(c) E faapea ona nofosala se tagata molimau i sea amioga sese e tusa ai ma le fofogaina o le talosaga faasaga i le faaiuga, e aafia ai le taunuuga o le mataupu.

(d) E faapea ua faailoaina se mea sese ma faamaonia e tusa ai ma le fofogaina o le talosaga ua aafia ai le taunuuga o le mataupu.

(e) E faapea e le i ai i le faamasinoga ma le Pulega faa-faamasinoga e faia ai le faaiuga po o le Poloaiga.

(f) E faapea e sese le faaiuga po o le poloaiga i le tulafono po o e le i ogatasi ma tu ma aganuu.

(g) E faapea o le faaiuga po o le poloaiga na faia faasaga i le mamafa o faamatalaga molimau na tuuina atu i le fofogaina o le talosaga.

(h) Na tulai mai e le i faataunuaina le faamasinoga tonu ma e maoae le sese.

Lau Afioga i le Fofoga Fetalai.

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 40: Faatagaga e talosaga ai faasaga i se faaiuga.

FOFOGA FETALAI: O lo o i ai foi le teuteuga i le Fuaiupu 40.

Afioga Hon GATOLOAIFAANA AMATAGA ALESANA- GIDLOW:
Lau Afioga i le Fofoga Fetalai.

“TEUTEUGA:

Faatagaga e talosaga faasaga ai i le talosaga ma tali:

(1) E le tatau ona fofogaina se talosaga faasaga i se faaiuga vagana ai o se faatagaga a le Faamasinoga Mauaialuga o Fanua ma Suafa e faamatuu atu e le Peresetene po o le Sui Peresetene.

(2) I totonu o le fasefulu (40) aso e amata mai le aso na lauina ai le faaiuga a le Faamasinoga Muamua o Fanua ma Suafa, e mafai e se itu faamasinoga ona talosaga faasaga i se faaiuga e ala i le faatoai atu:

(a) o se talosaga mo se faatagaga e talosaga ai faasaga i le faaiuga e auiliili mai ai mafuaaga o le faatagaga, e pei ona aiaia i lalo o le fuaiupu 39, o lo o faalagolago ai le talosaga faatasi ai ma pepa lagolago ma

(b) le totogifuapau faatonuina.

(3) O se talosaga mo se faatagaga e faatoai atu i lalo o lena fuaiupu e ao ona faaoo atu i le itu tetee, o ia lea e ao ona ia faatoai atu se tali i totonu o le pepa faatumu faatonuina i totonu o le 30 aso mai le aso na taulimaina ai le talosaga.

(4) E le tatau i le Resitara ona ia taliaina se talosaga na faatoai atu ua muta le taimi ua faamaotiina i lalo o le faafuaiupu (2), po o le tali e faatoai atu ua muta le taimi ua faamaotiina i lalo o le faafuaiupu (3).

Faamaonia.

Faamaonia le Fuaiupu 40 e pei ona teuteuina.

FUAIUPU 41: Fofogaina o se talosaga mo se faatagaga.

FOFOGA FETALAI: O lo o i ai le Teuteuga. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai:

“TEUTEUGA:

Fuaiupu 41, Faatagaga e talsoaga ai le fofogaina:

- (1) O le talosaga mo se faatagaga o le fofogaina o se talosaga e faasaga i se faaiuga e tatau ona fofogaina i luma o le Peresetene po o le Sui Peresetene e na o ia lava, i se aso o le a logoina atu i itu faamasinoga taitasi e le Resitara i totonu o le pepa faatumu faatonuina.
- (2) E mafai ona faafogaina itu faamasinoga uma ma faia a latou talosaga tusinga.
- (3) E mafai e le Faamasinoga Maualuga o Fanua ma suafa ona faia ia poloaiga i luga o le talosaga e pei ona manatu le Peresetene po o le Sui Peresetene ua talafeagai ai.
- (4) O le faaiuga mo se faatagaga e talosaga faasaga ai i se faaiuga e ao na faia i totonu o le 10 aso mai le aso e fofogaina ai.
- (5) I le faamatuu atu ai o se faatagaga, o le Faamasinoga:
 - (a) e mafai ona ia taofia le fataunuuina o le faaiuga po o se poloaiga, e talia ai le taunuuga o le talosaga; ma
 - (b) e mafai ona ia faamatuu atu le faatagaga o talosaga a itu faamasinoga soofaatasi; ma
 - (c) e mafai ona ia faatonuina itu faamasinoga ina ia lava saunia mo mataupu ua failoa mai o lea iloiloaina; ma
 - (d) e mafai ona ia atofaina le taimi ma le nofoaga mo le fofogaina o le talosaga lea e tatau ona fai i totonu o le 21 aso mai le aso e faamatuu atu ai le fatagaga; ma
 - (e) e ao foi ona ia poloaina le tagata talosaga ina ia ona totogina tupe o faamalumaluga mo tau o le faamasinoga.

Faamaonia le Teuteuga.

Faamaonia le Fuaiupu 41 e pei ona teuteuina.

FUAIUPU 42: Taimi mo talosaga e faasaga i se faaiuga.

FOFOGA FETALAI: Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA-GIDLOW: Lau Afioga i le Fofoga Fetalai. Fuaiupu 42:

“TEUTEUGA:

Fofogaina o talosaga e faasaga i faaiuga:

(1) E ao i se talosaga e faasaga i se faaiuga ona faia e ala i le toe fofogaina e le faamasinoga Maualuga o Fanua ma suafa e pei ona aiaia i le mataupu 104B o le Faavae.

(2) e mafai e le Faamasinoga e ala i lana pule faitalia ona ia toe faafogaina le mataupu atoa po o sona vaega. Faafetai lava.

Faamaonia le Teuteuga.

Faamaonia le Fuaiupu 42 e pei ona teuteuina.

FUAIUPU 43: Mafuaaga o se talosaga e faasaga i se faaiuga.

FOFOGA FETALAI: Se i tulai mai le Taitaifono.

“TEUTEUGA:

Fuaiupu 43: Mafuaaga mo faatagaga Faapitoa e Talosaga ai faasaga i se Faaiuga:-

- (1) E tatau ona faataatia se talosaga e faasaga i se faaiuga i le Faamasinoga o Talosaga ma Iloiloga o Fanua ma Suafa i se faaiuga na faia i le Faamasinoga Muamua o Fanua ma Suafa ma lana vaega o fitoitonu ma talosaga i le Tulafono ua soloia i luga o mafuaaga nei.
 - (a) O le mataupu o lo o aofia ai se tulaga taua o fesiligia ai le Faamasinoga i le faauigaina po o le aafiaga o le fuaiupu (5) ma le (6) o le Mataupu 104A: po o
 - (b) O le mataupu o lo o aofia ai o se tasi o lona mafuaaga i lona tulaga lautele, tulaga taua faaleaganuu po o le taua mo tagata lautele po o le mamafa o aia ua aafia, e ao ona tuuina atu i le Faamasinoga o Talosaga faasaga i faaiuga ma Iloiloga a le Faamasinoga o Fanua ma Suafa.
- (2) O se talosaga ua taua i lalo o le faafuaiupu (1) e le tatau ona fofogaina i totonu o le Faamasinoga o Talosaga ma Iloiloga o Fanua ma Suafa e faasaga i se faaiuga ma Iloiloga a le Faamasinoga o Fanua ma Suafa seia vagana ai ua faamatuu atu se faatagaga faapitoa e le Peresetene.
- (3) O lenei fuaiupu e faaoga i faaiuga na faia a o lumanai ai le aso na faamamaluina ai lenei Tulafono.

Faamaonia le Teuteuga.

Faamaonia le Fuaiupu 43 e pei ona teuteuina.

FUAIUPU 44: Tali i talosaga mo talosaga e faasaga i se faaiuga.

FOFOGA FETALAI: Se i tulai mai lau Afioga i le Taitaifono. Ta galulue a taua ae tapuai le Palemene.

**Afioga Hon GATOLOAIFAANA AMATAGA ALESANA
GIDLOW:** Lau Afioga i le Fofoga Fetalai,

“TEUTEUGA:

Fuaiupu 44, Talosaga mo faatagaga faapitoa ma tali: (1) E tataui i se talosaga mo se faatagaga faapitoa i lalo o le fuaiupu 43 ona:-

- (a) Faia i totonu o e pepa faatumu faatonuina;
- (b) Faia i totonu o le 12 masina mai le aso na faamamaluina ai lenei Tulafono.
- (c) Ia aofia ai mea nei:
 - (i) O se ata o le faasilasilaga o le talosaga faasaga i le faaiuga; ma
 - (ii) Ata faamaonia o pepa aloaia talafeagai uma, faamaumauga ma faamatalaga molimau e lagolagoina ai le talosaga; ma
 - (iii) Totogifuapauina faatonuina.

(2) I le taulimaina ai o se talosaga, e ao i le Resitara ona tauaao tuusao atu i tagata taitoatasi o le itu tetee pe afai e mafai ona faatino, ma lomua faasalalau i le Faasilasilaga i totonu o lomiga sosoo e tolu (3) o le nusipepa o le Savali.

(3) E ao i se itu tetee ona faatoai atu se tali i totonu o le 40 aso mai le aso na tauaaoina ai le faatagaga faapitoa o talosaga.

(4) E mafai e le Resitara ona teena so o se talosaga, ua faatoai atu i lalo o leni fuaiupu lea e le o ogatasi ma manaoga faatonuina.

(5) I le faamatuuina atu o le faatagaga, e mafai e le Peresetene ona faatonuina itu faamasino e tapena mo ni mataupu na faailoa mai e ao ona fuafuaina.

(6) afai ua faamatuuina atu le faatagaga, e tataui i le Resitara ona feutagai ma le Taitaifono o le Faamasinoga o Talosaga ma Iloiloga o Fanua ma Suafa e faamautu ai le aso e fofogaina ai le talosaga, a o le i logoina itu faamasinoga uma.

(7) Afai ua teena le faatagaga e mafai e le Faamasinoga o Talosaga ma Iloiloga o Fanua ma Suafa ona pe afai e faamalieina ai e faapea o le mataupu e aofia ai o mataupu anoa o le tulafono e pei ona i ai le faaiuga po o le faamalosia o fuaiupu (4) ma le (5) o le Mataupu 104A, ona faamatuu atu se faatagaga faapitoa e toe iloilo ai se talosaga mai i se faaiuga.

(8) E ao ona faia se talosaga e faasaga i se faaiuga e ala i le toe fofogaina e le Faamasinoga o Talosaga ma Iloiloga o Fanua ma Suafa e pei ona aiaia i lalo o le Mataupu 104C o le Faavae.

Faamaonia le Teuteuga.

Faamaonia le Fuaiupu 44 e pei ona teuteuina.

FUAIUPU 45: Taulumaga o talosaga e faasaga i se faaiuga.

FOFOGA FETALAI: Tulai mai lau Afioaga i le Taitaifono.

Afioaga Hon GATOLOAIFAANA AMATAGA ALESANA-GIDLOW:
Lau Afioaga i le Fofoga Fetalai, Fuaiupu 45.

“TEUTEUGA:

Mataupu ua taua:

(1) I so o se taulumaga ua i luma o e Faamasinoga Muamua o Fanua ma Suafa, e mafai e le Faamasinoga Muamua o Fanua ma Suafa ona faataatia ese mo le iloiloga a le Faamasinoga Mauuluga o Fanua ma Suafa e faasaga i se faaiuga a le Faamasinoga Muamua o Fanua ma Suafa se mataupu ua taua, ma o le a tatau ona i ai i le Faamasinoga Mauuluga o Fanua ma Suafa lea le malosiaga e fofogaina ai ma faia le faaiuga o lena mataupu ua taua.

(2) I so o se taulumaga ua i luma ole Faamasinoga o Fanua ma Suafa, e mafai e le Faamasinoga o Fanua ma suafa ona faataatiaese mo le iloiloga a le Faamasinoga o Talosaga e faasaga i se faaiuga a le faamasinoga o Fanua ma Suafa se mataupu ua taua, ma o le a tatau ona i ai i le Faamasinoga lea le malosiaga e fofogaina ai ma faia le faaiuga o lea mataupu ua taua.

Faamaonia le Teuteuga.

Faamaonia le Fuaiupu 45 e pei ona teuteuina.

FUAIUPU 46: Tusi faamaonia mai le Peresetene mo faatagaga faapitoa.

FOFOGA FETALAI: O lo o i ai foi le teuteuga, lau Afioga i le Taitaifono.

**Afioga Hon GATOLOAIFAANA AMATAGA ALESANA
GIDLOW:** Lau Afioga i le Fofoga Fetalai,

“TEUTEUGA:

Fuaiupu 46:- Mafuaaga o se Talosaga e faasaga i se faaiuga:

(1) E le tatau i le Faamasinoga o Talosaga e faasaga i se faaiuga ma Iloiloga a le Faamasinoga o Fanua ma Suafa ona faamatuu atu se faatagaga e talosaga ai e faasaga i se faaiuga seia vagana ua faamalieina o ia ua talafeagai ma le amiotonu o le Faamasinoga mo le fofogaina ma faia ia le faaiuga o talosaga.

(2) Ua talafeagai ai ia le faia o le amiotonu o le faamasinoga mo le

Faamasinoga o Talosaga e Faasaga i se Faaiuga ma Iloiloga a le Faamasinoga o Fanua ma Suafa, e na te fofogaina ma faia le faaiuga o se talosaga e faasaga i se faaiuga ua faatagisia pe afai

(a) o lea talosaga o lo o aofia ai se mataupu faalauaitetele po o e taua foi i tagata lautele; po o

(b) ua faia se faaiuga ua maoae le le amiotonu, po o e ono tulai mai vagana ai ua fofogaina le talosaga; po o

(c) le talosaga faasaga i le faaiuga o lo o aofia ai se mataupu lautele faale atunuu po o itu taua faaleaganuu.

Faamaonia le Teuteuga.

Faamaonia le Fuaiupu 46 e pei ona Teuteuina.

FUAIUPU 47: Faatagaga e talosaga faasaga i se faaiuga.

FOFOGA FETALAI: O lo o i ai le Teuteuga a le Komiti i le Fuaiupu 47. Tapa lau Susuga i le Sui Taitaifono se i sui momoe foi e le faigofie le galuega.

Tofa NAMULAUULU SAMILEOTA (Faasaleleaga Nu.2): Lau afioga i le Fofoga Fetalai...

TEUTEUGA:

- (1) E le tatau ona fofogaina se talosaga e faasaga i se faaiuga seia vagana o se faatagaga a le Faamasinoga o Talosaga e Faasaga i Faaiuga a le Faamasinoga o Fanua ma Suafa, e faamatuu atu e le Taitaifono.
- (2) I totonu o le 40 aso e amata mai le aso na lauina ai le faaiuga a le Faamasinoga Mauuluga o Fanua ma Suafa, e mafai e se tagata talosaga ona ia faatoai atu:
 - (a) se talosaga mo le faatagaga e talosaga ai faasaga i le faaiuga i totonu o le pepa faatumu faatonuina; ma
 - (b) se Faasilasilaga o le talosaga e faasaga i le faaiuga i totonu o le pepa faatumu faatonuina; ma
 - (c) le totogifuapauina faatonuina.
- (3) E ao i le Itu Tete e faatoai atu se tali i totonu o le 30 aso e amata mai i le aso na taulimaina ai le talosaga.
- (4) E le tatau i le Resitara ona ia taliaina se talosaga na faatoai atu ua muta le taimi na faamaoti atu i lalo o le faa fuaiupu (2), po o se tali e faatoai atu ua muta le taimi o lo o faamaoti mai i lalo o le faafuaiupu (3).

Faamaonia le Teuteuga.

Faamaonia le Fuaiupu 47 e pei ona Teuteuina.

FUAIUPU 48: Taulumaga mo le faatoai atu o faasilasilaga o se talosaga e faasaga i se faaiuga.

FOFOGA FETALAI: O lo o i ai Teuteuga a le Komiti. Tulai mai le Sui Taitaifono.

Tofa NAMULAUULU SAMILEOTA: Fuaiupu 48 lau afioga i le Fofoga Fetalai...

“TEUTEUGA:

- (1) E tatau i le talosaga mo le faatagaga e talosaga faasaga ai i le fofogaina ona laulauina i luma o le Taitaifono na o ia lava, i se aso e

logoina ai itu faamasinoga taitasi uma e le Resitara i totonu o le pepa faatonuina.

(2) E mafai ona fofogaina uma itu faamasinoga ma faia a latou talosaga tusinga.

(3) E mafai e le Faamasinoga o Talosaga e Faasaga i se Faaiuga ma Iloiloga a le Faamasinoga o Fanua ma Suafa ona faia ia poloaiga i luga o le talosaga e pei ona faatonuina e le Taitaifono.

(4) O le faaiuga mo le faatagaga e faatoai ai le talosaga faasaga i le faaiuga, e ao ona faia i totonu o le 10 aso mai le aso na fofogaina ai le mataupu.

(5) I le faamatuuina atu o le faatagaga, o le Taitaifono:

(a) e mafai ona ia poloaia le taofia o le faatinoga o le faaiuga po o le poloaiga, a o talia ai le taunuuga o le talosaga faasaga i le faaiuga; ma

(b) e mafai ona faatonuina itu faamasinoga ina ia nofo sauni i mataupu ua faailoa mai e ao ona faia i ai le iloiloga; ma

(c) e mafai ona ia faatulagaina le taimi ma le nofoaga mo le fofogaina o le talosaga lea e ao ona i totonu o le 60 aso mai le aso na tuuina atu ai le faatagaga; ma

(d) e ao ona ia poloaia le tagata talosaga na te totogiina tupe o faamalumaluga mo tau o le faamasinoga,

Faamaonia le Teuteuga.

Faamaonia le Fuaiupu 48 e pei ona Teuteuina.

FUAIUPU 49: Taimi faatapulaaina mo le faatoai atu mo se faatagaga i se talosaga e faasaga i se faaiuga.

FOFOGA FETALAI: O lo o i ai le Teuteuga a le Komiti i le Fuaiupu 49. Tulai mai le Sui Taitaifono o le Komiti.

Tofa NAMULAUULU SAMILEOTA: Fuaiupu 49 lau afioga i le Fofoga Fetalai...

“TEUTEUGA:

(1) E ao i se talosaga e faasaga i se faaiuga ona faia e ala i le toe fofogaina e le Faamasinoga o Talosaga e Faasaga i se Faaiuga ma Iloiloga a le Faamasinoga o Fanua ma Suafa e pei ona aiaia i totonu o le Mataupu 104C o le Faavae.

(2) E mafai e le Faamasinoga i lana pule faitalia ona toe fofogaina le mataupu atoa po o so o sona vaega.

Faamaonia le Teuteuga.

Faamaonia le Fuaiupu 49 e pei ona Teuteuina.

FUAIUPU 50: Fofogaina o le talosaga mo se faatagaga e talosaga ai faasaga i se faaiuga.

FOFOGA FETALAI: O lo o i ai le Teuteuga a le Komiti i le Fuaiupu 50. Tulai mai le Sui Taitaifono o le Komiti.

Tofa NAMULAUULU SAMILEOTA: Fuaiupu 50 lau afioga i le Fofoga Fetalai...

“TEUTEUGA:

O mafuaaga mo Iloiloga i totonu o le Faamsinoga o Talosaga e Faasaga i Faaiuga ma Iloiloga a le Faamasinoga o Fanua ma Suafa o mafuaaga masani faaletulafono o iloiloga faa faamasinoga, e pei o faiga solitulafono, faiga le taupulea ma tualumaga e le talafeagai.

Faamaonia le Teuteuga.

Faamaonia le Fuaiupu 50 e pei ona Teuteuina.

FUAIUPU 51: Taimi mo talosaga mulimuli e faasaga i se faaiuga po o iloiloga.

FOFOGA FETALAI: O lo o i ai Teuteuga a le Komiti i le Fuaiupu 51. Tulai mai le Sui Taitaifono.

Tofa NAMULAUULU SAMILEOTA: Fuaiupu 51 lau afioga i le Fofoga Fetalai...

“TEUTEUGA:

(1) E mafai ona faatoai atu se lafo mo se iloiloga faa faamasinoga o so o se taimi i le tuanai ai o le aso talu ona faia le faaiuga, po o se poloaiga a le Faamasinoga Muamua o Fanua ma Suafa po o le Faamasinoga Mauaialuga o Fanua ma Suafa, lea ua avea ma mataupu autu o le iloiloga, faatasi ai ma faamalumaluga faatonuina mo tupe e totogi o le faamasinoga.

(2) i le amata faamamaluina ai o lenei Tulafono, e faaoga Tulafono faafoe o iloiloga o mataupu faa faamasinoga a le Faamasinoga Sili i lenei Tulafono seia vagana ai ua toe suia ma avea ma vaega o le Tulafono Faafoe i lalo o le fuaiupu 61.

Faamaonia le Teuteuga.

Faamaonia le Fuaiupu 51 e pei ona Teuteuina.

FUAIUPU 52: Mafuaaga o se talosaga e faasaga i se faaiuga.

FOFOGA FETALAI: O lo o i ai Teuteuga a le Komiti i le Fuaiupu 52. Tulai mai le Sui Taitaifono.

Tofa NAMULAUULU SAMILEOTA: Fuaiupu 52 lau afioga i le Fofoga Fetalai...

“TEUTEUGA:

O lenei Vaevaega e faasino i le Faamasinoga Muamua o Fanua ma Suafa, Faamasinoga Mauaialuga o Fanua ma Suafa ma le Faamasinoga o Talosaga ma Iloiloga o Fanua ma Suafa.

Faamaonia le Teuteuga.

Faamaonia le Fuaiupu 52 e pei ona Teuteuina.

FUAIUPU 53: Mafuaaga mo Iloiloga.

FOFOGA FETALAI: O lo o i ai Teuteuga a le Komiti i le Fuaiupu 53. Tulai mai le Sui Taitaifono.

Tofa NAMULAUULU SAMILEOTA: Fuaiupu 53 lau afioga i le Fofoga Fetalai...

“TEUTEUGA:

(1) E mafai e le Faamasinoga i le i ai faatasi ma le maliega a itu faamasinoga uma ona poloaiina e faapea, ia taofia taualaumaga ua amatalia, ma o ia taualaumaga e ao ona faatautaia i totonu o le Faamasinoga.

(2) O se talosaga na faaulu peitai e le i faaooina atu, ua faamutaina i luga o se talosaga a le tagata ua talosaga i luma o le Resitara, faatasi ai ma le toe mafai ona faafoi atu totogifuapauina ua uma na totogi.

Faamaonia le Teuteuga.

Faamaonia le Fuaiupu 53 e pei ona Teuteuina.

FUAIUPU 54: Faaaliga o le fofogaina o le talosaga e faasaga i se faaiuga ma iloiloga.

FOFOGA FETALAI: O lo o i ai le Teuteuga a le Komiti. Tulai mai le Sui Taitaifono.

Tofa NAMULAUULU SAMILEOTA: Fuaiupu 54 lau afioga i le Fofoga Fetalai...

“TEUTEUGA:

(1) E ao ona faaoo atu se faaiuga tusitusia atoatoa a le faamasinoga i totonu o le Faamasinoga:

(a) mo le Faamasinoga Muamua o Fanua ma Suafa, e fofogaina e le Sui Peresetene o lo o seei, po o se sui o le laulau a fono a faamasino ua tofia e le Sui Peresetene i totonu o le tolu (3) masina o le aso mulimuli o taualumaga; ma

(b) mo le Faamasinoga Maualuga o Fanua ma Suafa e fofogaina e le Peresetene po o le Sui Peresetene o seei, po o se sui o le laulau a fono a faamasino ua tofia e le Peresetene i totonu i le tolu (3) masina o le aso mulimuli o taualumaga; ma

(c) mo le Faamasinoga o Talosaga Faasaga i Faaiuga ma Iloiloga a le Faamasinoga o Fanua ma Suafa e fofogaina e le Taitaifono po o se

se sui o le Faamasinoga ua tofia e le Taitaifono i totonu i le tolu (3) masina i le tuanai ai o le aso mulimuli na fofogaina ai.

(2) Afai ua le mafai ona faatino taimi faatapulaaina ua taua i le faafuaiupu (1) ona o ni tulaga ua aliae mai e le i fuafuaina, e mafai e le Faamasinoga ona faaoo atu lana faaiuga i so o se isi lava faiga e ono mafai ona faatino ai i totonu o le tasi masina mai i le aso o taimi faatapulaaina i lalo o le faafuaiupu (1).

Faamaonia le Teuteuga.

Faamaonia le Fuaiupu 54 e pei ona Teuteuina.

FUAIUPU 55: Tali i talosaga mo talosaga e faasaga i se faaiuga ma iloiloga.

FOFOGA FETALAI: O lo o i ai le Teuteuga a le Komiti i le Fuaiupu 55. Tulai mai le Sui Taitaifono.

Tofa NAMULAUULU SAMILEOTA: Fuaiupu 55 lau afioga i le Fofoga Fetalai...

“TEUTEUGA:

(1) E ao i le Faamasinoga i ana faaiuga taitasi i luga o se talosaga aloaia talosaga e faasaga i se faaiuga po o se talosaga mo le toe iloiloga, ona tuuina atu ai mafuaaga mo lea faaiuga.

(2) Mo se faatagaga e talosaga ai faasaga i se faaiuga, e mafai ona taua manino mafuaaga ma tusia i na o tuutuga lautele.

(3) E ao i le Faamasinoga ona tuuina atu mafuaaga e uiga i se faaiuga mo se talosaga o se poloaiga le tumau, po o, i se talosaga mo se poloaiga le tumau e taofia ai.

Faamaonia le Teuteuga.

Faamaonia le Fuaiupu 55 e pei ona Teuteuina.

FUAIUPU 56: Faaaogaina.

FOFOGA FETALAI: O lo o i ai Teuteuga a le Komiti i le Fuaiupu 56, tulai mai le Sui Taitaifono.

Tofa NAMULAUULU SAMILEOTA: Fuaiupu 56 lau afioga i le Fofoga Fetalai...

“TEUTEUGA:

- (1) I le noatia ma le fai fuafua i le Vaega IX o le Faavae ma lenei Tulafono, e le tatau i so o se isi lava Faamasinoga e ala i se talosaga e faasaga i se faaiuga po o se poloaiga e faia i luga o le pule faitalia a lea Faamasinoga, po o se isi faiga e ese ai ona toe iloilo pe fesiligia foi se faaiuga po o se poloaiga a le Faamasinoga o Talosaga ma Iloiloga o Fanua ma Suafa, Faamasinoga Maua-luga o Fanua ma Suafa po o le Faamasinoga Muamua o Fanua ma Suafa.
- (2) E tumau so o se faaiuga e faia e le Faamasinoga o Talosaga ma Iloiloga o Fanua ma Suafa ina ia tusa ai ma le mataupu 104C(9) o le Faavae.

Faamaonia le Teuteuga.

Faamaonia le Fuaiupu 56 e pei ona Teuteuina.

FUAIUPU 57: Lauina atu o Faaiuga a le Faamasinoga.

FOFOGA FETALAI: O lo o i ai le Teuteuga a le Komiti, tulai mai le Sui Taitaifono.

Tofa NAMULAUULU SAMILEOTA: Fuaiupu 57

“TEUTEUGA:

- (1) O faaiuga a le Faamasinoga Sili ma le Faamasinoga o Talosaga o lea le noatia ai le Faamasinoga Muamua o Fanua ma Suafa, Faamasinoga Maua-luga o Fanua ma Suafa, ma le Faamasinoga o Talosaga ma Iloiloga o Fanua ma Suafa.
- (2) O le a le tatau ona noatia le Faamasinoga Muamua o Fanua ma Suafa, Faamasinoga Maua-luga o Fanua ma Suafa ma le Faamasinoga o Talosaga ma Iloiloga o Fanua ma Suafa i faaiuga uma a le Faamasinoga Sili ma le Faamasinoga o Talosaga e uiga i mataupu e noatia i lalo o le pulega faafaamasinoga a le Faamasinoga

a le Faamasinoga o Fanua ma Suafa, ma tuuina atu ma faaoo atu ao lumanai ai le faamamaluina o le Tulafono o Teuteuga o le Faavae 2020 ma leni Tulafono.

(3) O le a tatau ona tumau pea ona i ai aia tatau uma po o aia ua faatulai mai, po o ua faaee atu e ala i faaiuga ua taua i le faafuuiupu (2).

Afioga Hon FIAME NAOMI MATAAFA (Lotofaga): Lau afioga i le Fofoga Fetalai...

FOFOGA FETALAI: Tulai mai lau afioga i le Sao Faapito...

Afioga Hon FIAME NAOMI MATAAFA: Tulai atu ma le faaaloalo, o le Fuaiupu leni 57, e pei e matauina e fou. E le o i ai i le tatou Tulafono lea na faataatia mai i le Maota. E pei o lea e maua atu o le agaga o le vaega lea ia tumavaevae lava ia Pulega e 2 nei lea ua faatulaga ai ia le Faamasinoga. O le Faamasinoga Sili Supreme Court ia ma le District Court ia ma le Faamasinoga o Fanua ma Suafa i lona faatulagana fou.

O le parakalafa 2, ou te le o manino lelei i ai faamolemole se i saunoa mai ia le Sui Taitaifono o le Komiti, i le faapea mai, o le a le noatia ia le Faamasinoga o Fanua ma Suafa i ni faaiuga na fai e le Faamasinoga Maua luga po o le Supreme Court po o le District Court. Aemaise o ni faaiuga ua uma ona fai ae e le i pasia ia Tulafono nei.

A faapea la lau afioga pe a faapea o lea e sao lau faitau lena, o lona uiga, o le a toe suia ni faaiuga ua uma ona taatia. Ma e ou te manatu e le o se tulaga lelei lena. E pei a tatou agai i luma, ia e taumafai ona fuafua atu i ai. Ae a faapea o lea o le a toe foi i tua, e ala mai i le Fuaiupu lea, ni faamanuiaga o ni tagata ua maea ona ave i ai ia se faaiuga, ona popole ai lea o le taofi. E tusa ua toe foi i tua retrospective, malosiaga fou lea ua i ai i le Faamasinoga o Fanua ma Suafa.

E pei o le tulaga lena e faale o manino lelei i le faaupuga mai o le mataupu lea, ia ma le taunuuga aemaise mo ni faaiuga ua uma ona fai, faafetai.

FOFOGA FETALAI: Malie le Taitaifono se i tulai mai lava Olo, le sui usufono o Salega.

Tofa OLO FITI AFOA VAAI: Faafetai atu i lau afioga i le Fofoga Fetalai mo lou avanoa. Leai e taua o lea ua ou tilotilo atu i le vaega lea o le Tulafono lea ua faapea mai e tatau ona faataua ma faatumau pea ia tulaga o aiatatau i le vaega lea o le Tulafono.

A silasila foi lau afioga i le Fofoga Fetalai i le 56, o lo o manino ai e le mafai ona toe iloilo ina e se isi Faamasinoga ia poloaiga. O lau fesili la i le tulaga lea i le 57, e faafefea ia tulaga i mataupu foi lea e aafia ai ia mea tau

civil mea o lisi o fanua Samoa. Pe o le a gata ai i i ia le iloiloia, pe aua o mea ia o claims pe na e tatau ona ave i luga o le Faamasinoga Mauuluga. Po o lea o le a faatino lava i i i le Faamasinoga lea a tatou o Fanua ma Suafa.

Ia o mataupu ia i fanua ia e aafia ai mea ia tau civil po o claims i le lisiina o fanua Samoa ma le faaaloalo.

FOFOGA FETALAI: Ia, se i tulai mai le Sui Taitaifono.

Tofa NAMULAUULU SAMI LEOTA: Faafetai i lau afioga i le Fofoga Fetalai. E taua tele ia fesili a le Sao Faapito aemaise foi ia le afioga ia Olo.

O le naunautaiga atoa o Tulafono nei, ia faamaoti ia jurisdiction a tatou Fanua ma Suafa, aua o la ua taatia ia le Faamasinoga lea o le Supreme Court ma le Civil Jurisdiction. O le agaga la o le 57, ia aua ne i toe sopoia mai e le Faamasinoga lea, faaiuga ia a le Fanua ma Suafa. O le mea lena la e i ai i le taimi leni. E pau lava le taimi e kolosi ai, i le taimi leni pe a faapea e faatino ia le vaega lea o iloiloga faale faamasinoga, po o le Judicial Review lea e fai e le isi itu, o le vaega lena lea ua aumai i lalo.

Ae o lea la o le a deal lava e le Faamasinoga o Fanua ma Suafa mo mataupu tau Fanua ma Suafa tau Samoa. E le aiaia ai fua e pei o le mea lea na saunoa mai ai Olo o le civil claim, e fai lava i o i le tatou Supreme Court, i lalo lava o le vaega na e le... E pau lava le mea e lotea i i pe a lotea ia fanua faaleaganuu ia ma matai faaSamoa, e pei ona i ai le naunautaiga lea.

O le agaga atoa, ia faaiu mea uma i lalo o le tatou fogafale lona 3 lea, lea o lo o i ai i le taimi nei lea o lo o faataatia atu i le vaega fou lea ma le agaga faaaloalo.

FOFOGA FETALAI: Malo, ia se i saunoa mai i le avanoa mulimuli.

Afioga Hon FIAME NAOMI MATAAFA: Faafetai i le Sui Taitaifono, ma o lea lava e manino le agaga ia taumafai e tuu mavaevae ia Pulega a Faamasinoga nei e 2, latou Jurisdictions, ae o lea e le o mafai ona tali mai ia le Sui Taitaifono, i le mataupu lea e avatu, o ni faaiuga ua uma ona fai ae le i pasia ia le Tulafono leni.

E pei e foliga mai, o lea e fai mai pe sao lau faitau, e mafai ona toe liliu ia faaiuga na na fai i le Supreme Court po o le District Court, ona o lea ua i ai ia le malosi fou lea. E pei o lau faitau lena o lea e faitau atu i le Tulafono, faasao mai au e le afioga i le Sui Taitaifono pe a faapea e sese lau faitau atu i le vaega lea o le Tulafono.

Tofa LEALAILEPULE RIMONI AIAFI: Lau afioga i le Fofoga o le Fono...

Afioga Hon FIAME NAOMI MATAAFA: Ma e faamolemole lau afioga, o la e le i uma ia lau mataupu. E ui o lea e manino le agaga ia tuumavaevae, ae o lea foi sa faaleo atu muamua ia atugaluga e i ai lava mea e ono fesopoai ai. Ia o le tali lea na aumai ia tupu, ia ona fai lea i ai o se tali i lenei taimi.

Ia e ese ai ia lou taofi i lenei ituaiga faiga, aua o le uiga lea o le tau faamaoti, po o le fea le mea e oo i ai le malosi o lea vaega ma lea vaega. E fai ma faataitaiga lau afioga i le Fofoga Fetalai. E ui lava e oo lava i lenei taimi, o lea o lo o i ai ia le fesopoai lea, i le faiga lea o lisi o fanua faaSamoa e fai ai atinae.

O le vaaiga faaletulafono lea e i ai, a maua loa le lisi, ua see ese loa, ma o le Faamasinoga e vaaia ia mea tau lisi, o le Faamasinoga Mauualuga. Ua fai ai foi faaiuga a le sa Faamasino Sili talu ai ia le afioga ia Patu. Ae peitai, e tulai mai pea, le tagofia e le Faamasinoga o Fanua ma Suafa, ia eleele lava ia e faapea ua uma ona lisi. O se faataitaiga lenei lau afioga, i le mea o lo o fesopoai ai nei, ia o le mea la e faafesili, o le fea la o le a nofo ai? Ia le tulaga lea o tatou fanua o le a lisi. O fanua o fanua faaleaganuu.

Ae faamolemole, ou te fia malamalama pea lava i lau mataupu lea na avatu muamua, pe o le a toe faafoi i tua, e ono toe aveeseina ia ni faaiuga ua uma ona faataitia e le Faamasinoga Sili ma le Faamasinoga Faaitumalo, ona o le suiga o le pule faaletulafono lea ua taatia ai nei pe a pasia ia Tulafono e le Faamasinoga o Fanua ma Suafa.

FOFOGA FETALAI: Malo, e i ai se isi mataupu Olo se i faauma atu pea...

Tofa OLO FITI AFOA VAAI: Leai malie lou finagalo, e matau atu ua ou matua confuse atoa i le mea lenei. O le agaga autu lea matou te lagolagoina foi nisi o vaega, o le mea lea o le tuu mavaevae o mea ia e 2. E i ai la lou popolega o lea ua saunoa mai ia le Sui Taitaifono, a i ai loa tulaga ia o le aafia o fanua Samoa, ia ua toe alu atu i le Supreme Court po o le fea mea o i ai. Ae a oo atu foi la i ina ua vevesi ni matai e ona le fanua, le fanua lea e lisi, ia ona toe aumai foi lea i lalo i Fanua ma Suafa.

O le agaga na o matou lea e tau avatu, e le o taoto lelei ia tatou Tulafono i le mea e tataua ona i ai, ma le faaaloalo.

FOFOGA FETALAI: Ia se i...saunoa mai lau afioga i le Taitaifono.

Afioga Hon GATOLOAIFAANA AMATAGA ALESANA-GIDLOW: Lau afioga i le Fofoga Fetalai, se i avatu se fesoasoani i le tulaga lea o lisi. A faapea o fanua Samoa faaleaganuu, lea ua ou manao e lisi lou fanua, ona ou alu loa lea e faamatuu lelei teuteuga e faasalalau pe i ai ni tagata e latou te faalavelaveina lau lisi lea ou te manao e fai.

A leai la ua manino o au le sao e mafai lava ona ou faia le fuafuaga i le fanua lea, o la la ua matala mai e leai se faalavelave, ona ou alu loa lea i le Matagaluega o Punaoa, o i ina e fai ai le lisi. E ese foi la le vaega lena.

O le lisi ou te alu i le Matagaluega lea o Fuagafanua, e fai ai lau lisi, e i ai foi ona ia aiaiga. Ae ua leai ma se toe aiaina e lou aiga ia le lisi lea o fanua faaleaganuu. O le eseese lena. Ae a alu alu la lau lisi lea ua afaina, po o ua i ai se feeseeseaiga ma le tagata lea e lisiina lou fanua, e pule foi au pe toe faamuta ia le lisi lena. Ae e leai se afaina ai o le tulaga lea faale faamasinoga o Fanua ma Suafa, leaga e le o...

A faapea ua alu alu ua faalavelave se tagata i le lisiina o lou fanua, o i la i le Faamasinoga lea o Fanua ma Suafa e fai ai. Ae a ua leai, ua ou alu e faamautu lau lisi i le Matagaluega o Fuagafanua, faafetai.

FOFOGA FETALAI: Malo, ia se i tulai mai le Sui Taitaifono se i tali le...

Afioga Hon GATOLOAIFAANA AMATAGA ALESANA-GIDLOW: Faafetai o le a ou le tali atu i le faafesili mai o le Sao Faapito, i faaiuga ia a le Supreme Court ma le District Court. E le mafai ona faaaogaina i lalo o le Faamasinoga o Fanua ma Suafa. O le ala tonu lava lena o lea ua mavaevae ai, lea foi ua aumai ai ia le Judicial Review po o le Iloiloga faale Faamasinoga i totonu o Fanua ma Suafa, ia aua ne i toe fesopoai ia tier ia e 2.

E pei la o le vaega lea na saunoa mai ai le Sao Faapito leai. Leai e le toe faaaogaina ia faaiuga na a le Supreme Court ma le District Court i totonu o le tatou LTC ma lou faaloalo.

FOFOGA FETALAI: Malo faafetai, ua maea lou taimi Fiaame.

Afioga Hon FIAME NAOMI MATAAFA: Fia maua mai lava le tali, o faaiuga ua uma ona fai. A faapea la o faaiuga ua uma ona fai, ae lea e fai mai, pe a faapea e sao lau faitau i le fuaiupu lea, o le a mafai ona toe suia ona o le aia lena a le Faamasinoga a Fanua ma Suafa. E pei o le mea lena o lea e tau momoli atu faamolemole, ou te le o malamalama lelei lava i ai i le tusiga lea e aumai ai aua o le mea fou le mea lea, ma e tali lelei mai ai ia le Komiti pe o le le lelei o lau faamatalaga lea...

Tofa LEALAILEPULE RIMONI AIAFI: O lea o le a ou fesoasoani atu...

FOFOGA FETALAI: Se i tulai mai Lealailepule se i tau fesoasoani i le mataupu lea..

Tofa LEALAILEPULE RIMONI AIAFI: Faamolemole, leaga o au foi lea sa tau le mautonu lau faitau i le Tulafono, ae a tatou faitau tonu lava i le vaega lea 59 o le Tulafono, lea ua avea nei ma vaega 57, o le manaia ia ma straight forward o faamatalaga. O faaiuga ma poloaiga e le mafai ona toe iloiloia e isi Faamasinoga. O le mea lea na tau confuse ai ae o lea ua ou malamalama ai, o le upu lea noatia. O lea e faapea e le noatia ia isi Faamasinoga, ma le toe loteina. E le o le saoga na o le vaega tonu lea lau afioga pe afai ta manino i ai, e tusa o le vaega 59 lea e sii mai ai le vaega lea.

O lea na pei e tau faamanino mai e le Sui Taitaifono, pau lava le mea lea e tau faamanino mai i i, e le mafai ona toe loteina e se isi Faamasinoga i luga atu, pe a faapea ua maea ona lote, i le Faamasinoga Apili, i totonu o le Lands and Titles Court. O le faitauga sao lava lena o le Tulafono o le vaega lea.

Afioga Hon FIAME NAOMI MATAAFA: Lau afioga faamolemole, o le mea la e fia faasao. O le vaega o le Tulafono la e saunoa mai i ai ia le sui usufono mamalu, o le 59 tuai. E ese mai lena, i le tatou talanoaga o le 57 fou, o se mea fou atoatoa. E le aiga ma le... o lea lava e avatu pea le fesili, aua i lau faitau, i le tusiga o le Tulafono lea, e ono mafai ona liua ni faaiuga ua uma ona fai, ona o le Tulafono lea o le a tatou pasiaina.

FOFOGA FETALAI: Masalo o lea sa manino lava i le saunoaga a le Minisita i le taeao ua sola le tulaga lea pei ona atugalua i ai lau Afioga i le Sao Faapito. Ae faafetai foi i le fesoasoani mai a le sui usufono mo Faleata i le tulaga lea. Ae ua ou manatu, o le a faaauau le tatou galuega ua maea a tatou avanoa.

Faamaonia le Teuteuga.

Faamaonia le Fuaiupu 57 e pei ona Teuteuina.

FUAIUPU 58: Mafuaaga o faaiuga a le Faamasinoga.

FOFOGA FETALAI: O lo o i ai le teuteuga a le Komiti i le fuaiupu 58. Tulai mai le Sui Taitaifono.

Tofa NAMULAUULU SAMI LEOTA: Lau Afioga i le Fofoga Fetalai:

“TEUTEUGA:

58. Poloaiga e tusa ai ma totogi o le faamasinoga – (1) i so o se taualumaga, e mafai e le Faamasinoga ona faia ni poloaiga e manatu o

ia ua tatau ai, e tusa ai ma le fuafuaina o totogi o taualumaga, po o so o se mataupu e ono aliai mai po o, a o lumanai ai taualumaga, e po o i so o se tagata o ia lea o avea ma itu i taualumaga.

(2) Afai ua i ai le manatu o le Faamasinoga:

(a) e faapea e faatauva po o ua faatupu vevesi so o se talosaga aloaia, tagi po o se talosaga tetee e tusa ai ma taualumaga, e mafai e ia, pe afai ua ia manatu ua talafeagai ai, tusa lava po o le a le iuga o le taualumaga, ona ia faatagaina so o se itu faamasinoga e totogi atoa po o le totogi o so o se vaega o tau o le Faamasinoga, mo le puipuiga po o le finauina o se taualumaga faatauva ma faavevesi.

(3) I so o se taualumaga ma i so o se laasaga o taualumaga, e mafai e le Faamasinoga ona manaomia so o se itu faamasinoga ina ia tuuina atu so o se vaega o tupe e avea ma faamalumaluga mo tau, ma afai e le tuuina atu lea tupe, e mafai e le Faamasinoga ona taofia le taualumaga atoa po o, na o le vaega o le taualumaga e faatatau tonu i ai le itu faamasinoga lea ua le mafai ona totogiina lea tupe.

(4) O vaegatupe uma e totogiina atu o le a teuina i se faiga e pei ona faatonuina e le Faamasinoga.

Faamaonia le Teuteuga.

Faamaonia le Fuaiupu 58 e pei ona Teuteuina.

FUAIUPU 59: O faaiuga ma poloaiga e le mafai ona toe iloiloina e isi Faamasinoga.

FOFOGA FETALAI: O lo o i ai le teuteuga a le Komiti i le fuaiupu 59. Tulai mai le Sui Taitaifono.

Tofa NAMULAUULU SAMI LEOTA: Lau Afioga i le Fofoga Fetalai:

“TEUTEUGA:

59. Faamalosia o faaiuga ma poloaiga a le Faamasinoga – (1) O faaiuga po o poloaiga a le Faamasinoga o le a tatau ona faamalosia i totonu, ma e le Faamasinoga Sili po o, i le a lava le tulaga e mafai ai, e le Faamasinoga Faa Itumalo.

(2) E ao ona tuuina atu se ata o le faaiuga ua faamaufaaailogaina po o le poloaiga ina ia faamalasia i lalo lenei fuaiupu i le Faamasinoga Sili po o Faamasinoga Faaitumalo.

Afioga Hon FIAME NAOMI MATAAFA: Lau Afioga i le Fofoga Fetalai...

FOFOGA FETALAI: Leaga o lea e tulai mai le sui usufono mo Salega ma le sui usufono mo Lotofaga, ia se i tulai mai le sui usufono.

Afioga Hon FIAME NAOMI MATAAFA: Faamolemole lava lau Afioga e tauala atu i le Nofoa i le Sui Taitaifono, e tau faigata ona ota malamalama i le fuaiupu lea ona o le tulaga foi lea faapea pe o lau faitau o faaiuga a le Faamasinoga o Fanua ma Suafa o le a faamamaluina i totonu o le Faamasinoga Sili ma le Faamasinoga Faaitumalo. O le sao lea o lau faitau atu i le... A faapea o lena, ona fesiligia lava lea o le faatulagaina lea e faapea e tuumavaevae a tatou Faamasinoga ia e lua. Ae a faapea e sao lau faitau i le mea lea, e pei e foliga mai o le a malosi atu le power o le Faamasinoga o Fanua ma Suafa e avatu ai ana faaiuga e faamamalu e le Faamasinoga Sili po o le Faamasinoga Faaitumalo. E sao lau faitau faamolemole lau Afioga i le Sui Taitaifono?

FOFOGA FETALAI: Ia, se i tulai mai le... Malie lau Afioga i le Sui Taitaifono, e lelei ona se i faamaea mai pea ma le saunoaga a Olo.

Tofa OLO FITI AFOA VAAI: Lau Afioga i le Fofoga Fetalai, faafetai mo le avanoa. E tau aiga lau fesili ma le fesili a le Sao Faapito. O le upu lava lea e tau atugalua ai le taofi, o le upu lea o le faamalasia o faaiuga ia o fanua ma Suafa e tusa lava pe i ai se tulaga e i ai e le Faamasinoga Faaitumalo. Faamolemole lava lau Afioga i le Sui Taitaifono, sei aumai lava sina au faataitaiga i le mea lea i le fesootaiga o le Faamasinoga o Fanua ma Suafa ma le le toe feaiatai ma le Faamasinoga Faaitumalo. Ma le faaaloalo.

Tofa NAMULAUULU SAMI LEOTA: Faafetai i lau Afioga i le Fofoga Fetalai. Masalo le vaega lea e le o se vaega fou. O le taatiaga lava lea o lo o i ai i le taimi lenei. A faataunuuna faamasinoga i le Faamasinoga o Fanua ma Suafa, o ai e faamalasia? O ai e enforce ina? E enforce e le tatou Faamasinoga lea o le District Court ma le Supreme Court. O le a le mafuaaga? Aua foi a e le usitaia le poloaiga a le Faamasinoga, ua e sopo loa i le mea lea ua over criminal, ua solitulafono. O lona uiga la a e le usitaia, ua i ai le faaupuga foi lea o le contempt of court, ua e le usitaia le poloaiga faa-faamasinoga. O i ina la ua sisi ai loa la le vaega lea e faatinoina e le tatou district court faa-itumalo le vaega lea ma lou faaaloalo lava.

FOFOGA FETALAI: Ia, ua manino lea vaega.

Faamaonia le Teuteuga.

Faamaonia le Fuaiupu 59 e pei ona Teuteuina.

FUAIUPU 60: Poloaiga e tusa ai ma totogi.

Faamaonia.

FUAIUPU 61: Faamalosia o faaiuga ma poloaiga a le Faamasinoga.

FOFOGA FETALAI: O lo o i ai le teuteuga a le Komiti i le fuaiupu 61. Tulai mai le Sui Taitaifono.

Tofa NAMULAUULU SAMI LEOTA: Faafetai i lau Afioga. O le Fuaiupu 61:

“TEUTEUGA:

Fuaiupu 61.

61. O le le tuliloaina o se mataupu e faasaga i se faaiuga.

(1) Afai o le ua talosaga ua na le tuliloaina lana talosaga na faatoai i le Faamasinoga Muamua o Fanua ma Suafa ma le loto naunautai ua tatau ai, e mafai e se isi itu faamasinoga ona talosaga i le Peresetene e teena le talosaga.

(2) Afai e le oo mai le ua talosaga i le taimi ua atofaina mo le fofogaina o lana talosaga, e mafai e le Faamasinoga Muamua o Fanua ma Suafa ona teena le talosaga.

(3) I le itu faatatau i le faafuaiupu (1), e mafai e le Peresetene po o le Faamasinoga ona poloaiina le ua talosaga ina ia totogi atu ni tupe i so o se itu faamasinoga.

(4) Afai o le ua talosaga apili ua na le tuliloaina lana talosaga apili na faatoai i le Faamasinoga Maualuga o Fanua ma Suafa po o le Faamasinoga o Talosaga ma Iloiloga o Fanua ma Suafa ma le loto naunautai ua tatau ai, e mafai e se isi itu faamasinoga ona talosaga i le Peresetene po o le Taitaifono e teena le talosaga apili.

(5) Afai e le oo mai le ua talosaga apili i le taimi ua atofaina mo le fofogaina o lana talosaga apili, e mafai e le Faamasinoga ona teena le talosaga apili.

(6) I le itu faatatau i le faafuaiupu (4), e mafai e le Peresetene po o le Taitaifono po o le Faamasinoga ona poloaiina le ua talosaga apili ina ia totogi atu ni tupe i so o se itu faamasinoga.”

FUAIUPU 62: Taulumaga o soligatulafono.

FUAIUPU 63: Tulafono faafoe mo taulumaga a Faamasinoga.

Tofa NAMULAUULU SAMI LEOTA: Lau Afioga i le Fofoga Fetalai:

“TEUTEUGA:

63. Tulafono faafoe mo taulumaga a Faamasinoga.

Ia toe faanumera le fuaiupu 63 e avea ma Fuaiupu 62 ma teuteuina le faafuaiupu (1) o lo o i le amataga o le faafuaiupu:

(a) ia suia le upu “O” i le faaupuga “Ae vagana ai mo tulafono faafoe i le fuaiupu 51, o le”.

Faamaonia le Teuteuga.

Faamaonia le Fuaiupu 63 e pei ona Teuteuina.

FUAIUPU 64: Faaoina atu o se talosaga i isi itu faamasinoga.

Faamaonia.

FUAIUPU 65: Faaaogaina o se loia.

FOFOGA FETALAI: Se i tulai mai le Afioga i le Taitaifono.

Tofa NAMULAUULU SAMI LEOTA: Lau Afioga i le Fofoga Fetalai:

“TEUTEUGA:

Ua toe faanumera le Fuaiupu 65 e avea ma Fuaiupu 64 ma o le faafuaiupu (1) ma le (2) ua suia e faapea:

“E mafai ona faaaogaina se loia e avea ma sui o so o se itu faamasinoga i se taulumaga o iloiloga faafaamasinoga ua i luma o le Faamasinoga o Talosaga Faasaga i Faaiuga ma Iloiloga a le Faamasinoga o Fanua ma Suafa”.

Faamaonia le Teuteuga.

Faamaonia le Fuaiupu 65 e pei ona Teuteuina.

FUAIUPU 66: Talosaga e faasaga i faaiuga mai le Fono a Nu.

FOFOGA FETALAI: O lo o i ai le Teuteuga a le Komiti.

Tofa NAMULAUULU SAMI LEOTA: Lau Afioga i le Fofoga Fetalai...

“TEUTEUGA:

Ua toe faanumera le Fuaiupu 66 e avea ma Fuaiupu 65 ma ua teuteuina e ala i le faaofiina i le tuanai ai o le upu “talosaga o upu” ia e tataua ona tuuina atu e ala i le faatoai atu o se talosaga e faasaga i se faaiuga.”

Ma lou faaaloalo.

Faamaonia le Teuteuga.

Faamaonia le Fuaiupu 66 e pei ona Teuteuina.

FUAIUPU 67: Soloia.

FOFOGA FETALAI: Tulai mai lau Afioga i le Taitaifono o lo o i ai le Teuteuga.

Tofa NAMULAUULU SAMI LEOTA: Lau Afioga i le Fofoga Fetalai:

“TEUTEUGA:

Ua toe faanumeraina le fuaiupu 68 e avea ma Fuaiupu 67 ma ua suia le faafuaiupu (3) ma le (4) e faapea:

“(3) O faamaumauga uma, pepa faale-tulafono, filifiliga, tofiga, tusi faapoloaiga, faaiuga, poloaiga ma pepa aloaia uma i le tulaga lautele ma gaoioiga ua faia i le pule faataga e mafua mai i lalo o le Tulafono lea ua soloia, ma o lo o i ai pea i le taimi e faamamaluina ai lenei Tulafono, o le a tatau ona faamautinoa mo faamoemoega o lenei Tulafono i le tulaga atoatoa ma aloaia lelei e faapei ai na mafua mai i lalo o aiaiga talafeagai o lenei Tulafono, ma o le mea lea o le a tatau ai ona faatatauina, pe a alagatau ai, e pei lava o ni aiaiga na faapogai mai faapea.

(4) O le soloia ai o le Tulafono o Fanua ma Suafa 1981 o le a le aafia ai so o se tagi, suafa, aia tatau po o aia ua faia po o ua faaeeina atu i lalo o lea Tulafono, po o so o se pepa faaletulafono o lagolagoina ai, ma o tagi taitasi uma faapena, suafa, aia tatau, aia, pepa faaletulafono po o pepa aloaia, o le a faaauuina pea ona faamamaluina ma aloaia e faapei ai e le i pasia lenei Tulafono, po o e faapei lava na faia po o na fausia i lalo o aiaiga talafeagai o lenei Tulafono.”

Faamaonia le Teuteuga.

Faamaonia le Fuaiupu 67 e pei ona Teuteuina.

FUAIUPU 68: **Aiaiga faasaoina ma aiaiga tau soloaiga.**

FOFOGA FETALAI: Tulai mai lau Afioga i le Sui Taitaifono.

Tofa NAMULAUULU SAMI LEOTA: Lau Afioga i le Fofoga Fetalai:

“TEUTEUGA:

(a) Ua toe faanumera le Fuaiupu 69 e avea ma Fuaiupu 67 lau afioga, ma ua faaofi se parakalafa (d) fou i le tuanai ai o le parakalafa (c):

“(d) i totonu o le fuaiupu – (i) 2 e ala i le aveesea o le uiga o le upu “resitara”; ma

(e)(ii)3 e ala i le suia o le upu “Resitara i upu “Ofisa Sili o Pulega.”

(c) ia suia le igoa o le “Faamasinoga o Fanua ma Suafa” i le “Faamasinoga Muamua o Fanua ma Suafa”.

Faamaonia le Teuteuga.

Faamaonia le Fuaiupu 69 e pei ona Teuteuina.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Tulafono o Fanua ma Suafa 2020.

Faamaonia.

Na faagasolo le Tulafono Tau Faaofi o Fanua ma Suafa faatasi ma Teuteuga.

TULAFONO TAU FAAOFI O LE ULUFALE MAI O TAGATA 2020 – iloiloga auiliili

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti i le Tulafono Tau Faaofi ona faatoa sagai atu ai lea mo le iloiloga auiliili.

Ou te tapa lau Afioga i le Taitaifono o le Komiti.

Tofa NAFOITOA TALAIMANU KETI (Taitaifono, Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Ia se i sui foi nota o le tatou piano i lenei afiafi. Malo le tauatai malo le faatoatoa i lau Afioga i le Fofoga Fetalai.

Lau Afioga i le Fofoga Fetalai ou te tulai atu ma le faaaloalo ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina*

ai, ina ia faagasolo le Tulafono Tau Faaofi o le Ulufale mai o Tagata 2020 faatasi ma Faasaoga.

Faaluaina e le sui usufono mo Lefaga ma Faleaseela ma le sui usufono mo Falealili Sisifo.

Na faamaonia le lafo.

FOFOGA FETALAI: O lea ua faamaonia e le Fono Aoa le Lipoti a le Komiti ma o le a sagai atu loam o le iloiloga auiliili o le Tulafono Tau Faaofi. E tusa ai ma Tulafono Tumau, e amata le iloiloga auiliili i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faaaogaina o lenei Tulafono.

Faamaonia.

FUAIUPU 4: Puipuia o aia tatau a tagatanuu.

Faamaonia.

FUAIUPU 5: O le tiute tauave ia galulue faatasi.

Faamaonia.

FUAIUPU 6: Faaoina atu o faasilasilaga.

Faamaonia.

FUAIUPU 7: Ulufale mai i Samoa.

Faamaonia.

FUAIUPU 8: Talosaga mo visa.

Faamaonia.

FUAIUPU 9: O le agavaa i se visa e le maua i lea lava taimi.

Faamaonia.

FUAIUPU 10: Ituaiga o visa.

Faamaonia.

FUAIUPU 11: O le Ofisa Sili o Pulega e faamatuuina atu visa.

Faamaonia.

FUAIUPU 12: Aiaiga i Tulaga o Faalavelave e Tutupu Faafuasei.

Faamaonia.

FUAIUPU 13: Vaitaimi e muta ai le aoga o le visa.

Faamaonia.

FUAIUPU 14: Visa po o tuusaunoaga ua faaleaogaina.

Faamaonia.

FUAIUPU 15: Ia tuuina mai o se tautinoga e le tagata.

FOFOGA FETALAI: O lo o i ai le teuteuga a le Komiti i le fuaiupu 15. Tulai mai le Taitaifono o le Komiti.

Tofa NAFOITOA TALAIMANU KETI: Lau Afioga i le Fofoga Fetalai:

“TEUTEUGA:

I le faafuaiupu (3) ia aveese le numera “5” ma suia i le numera “50” ma faitauina ai le (3) e faapea:

(3) “e le silia atu i le 50 iunite tau faasalaga.”

Faamaonia le Teuteuga.

Faamaonia le Fuaiupu 15 e pei ona Teuteuina.

FUAIUPU 16: E mafai e le Ofisa Sili o Pulega ona tapa nisi faamatalaga.

Faamaonia.

FUAIUPU 17: Manaoga mo suesuega faafomai.

Faamaonia.

FUAIUPU 18: Ulufale mai ma ulufafo atu i taulaga ua faatulagaina.

Faamaonia.

FUAIUPU 19: Sone e siakiina ai.

Faamaonia.

FUAIUPU 20: Poloaiga e faasaina ai ona tuua Samoa.

Faamaonia.

FUAIUPU 21: Poloaiga a le Faamasinoga e faasaina ai ona tuua le atunuu.

Faamaonia.

FUAIUPU 22: Poloaiga a le Loia Sili e faasaina ai le tuua o le atunuu.

FOFOGA FETALAI: O lo o i ai le faasaoga o le Lomiga faa-Samoa i le fuaiupu 22. Se i tulai mai le Taitaifono o le Komiti.

Tofa NAFOITOA TALAIMANU KETI: Lau Afioga i le Fofoga Fetalai:

“FAASAOGA:

Fuaiupu 22

Ina ia aveese le faaupuga “e manuia ai” ma suia i le faaupuga “o le soo lelei o;”

Faamaonia le Faasaoga.

Faamaonia le Fuaiupu 22 e pei ona Faasaoina.

FUAIUPU 23: Tagata ulufale mai faasaina.

Faamaonia.

FUAIUPU 24: Tusi resitala o tagata ulufale mai faasaina.

Faamaonia.

FUAIUPU 25: Mauaina o visa a o le i taunuu mai i Samoa.

Faamaonia.

FUAIUPU 26: Teena o visa ma tuusaunoaga.

Faamaonia.

FUAIUPU 27: Taiala manaomia.

FOFOGA FETALAI: O lo o i ai le faasaoga a le Komiti i le fuaiupu 27. Se i tulai mai le Taitaifono.

Tofa NAFOITOA TALAIMANU KETI: Lau Afioga i le Fofoga Fetalai ou te faatu le faasaoga i le fuaiupu 27 e faapea:

“FAASAOGA:

I le fuaiupu 27(l)(a):

- (i) aveese le upu “le manuia” ma suia i le upu “le solo lelei” ma
- (ii) aveese le upu “e manuia ai” ma suia i le upu “o le solo lelei o”;

Faamaonia le Faasaoga.

Faamaonia le Fuaiupu 27 e pei ona Faasaoina.

FUAIUPU 28: Folafolaga tau le lagolagoina.

Faamaonia.

FUAIUPU 29: Visa faigaluega.

FOFOGA FETALAI: Tulai mai le sui usufono mo Faleata.

Tofa LEALAILEPULE RIMONI AIAFI: Se i ou fesili atu lava i le Afioga i le Taitaifono i le vaega tonu lea o Visa faigaluega. Po o le a se silasila a le latou Komiti, o a ituaiga..ona o lea e pei e matau ua tele ituaiga galuega ia e mafai ona faatino e tatou tagata, o lea ua ave i isi tagata ia mai fafo. O le a la se tagai a lau Afioga ma le Komiti i lea vaega. Ma le faaaloalo lava.

FOFOGA FETALAI: Se i tulai mai le Taitaifono.

Tofa NAFOITOA TALAIMANU KETI: E momoli atu le faafetai i le faafesili, aua o le tasi lea mataupu sa lauliliu i ai le Komiti nei. Ona o le tele o aafiaga ia ae faapea foi le faasea a le atunuu i nisi o tagata e le o ni tagatanuu o le tatou atunuu. Ua silasila i ai ma ua maua, o lea sa ave i ai visa. Sa faaigoa muamua o le pemitā, o lea ua suia i le Tulafono lenei i le visa. E pei o Niu Sila ma Ausetalia e faataoto tutusa ai, feoaiga o tagata e malaga atu i lea atunuu ma lea atunuu.

O lea ua taoto ai i le fautuaga a le Komiti, e galulue faatasi ai le MCIL ma le tatou Matagaluega lea o lea Immigration, Ofisa o le Palemia. Ina ia silasila totoa i tulaga ia ma aua ne i toe tuuina atu ni visa faigaluega i tagata mai fafo, e le o ni tagatanuu. I ituaiga galuega foi ia, e mafai ona faatinoina e o tatou tagata.

O le vaega lea o lea ua silasila totoa i ai le Matagaluega, ua afua ai ona taua i le suesuega foi sa faatino e le Komiti, ina ia silasila totoa i ai Matagaluega ia e lua. Ona sa i ai le feteenaiga, ona e i ai aiaiga o nisi foi e manaomia e le tatou atunuu e tatau ona aumai i totonu e faatino nisi o galuega. E tatau i tagata mai fafo e le o oo i ai foi le tomā o tatou tagata, o lea sa talia ai le tulaga lea. Peitai ua i ai foi tulaga ua maua, ua ese le pemitā na malaga mai ai, ma ua latou faatinoa ai ma nisi foi o galuega, e mafai ona faatino e o tatou lava tagata. O le mea la lea, o lea ua aiaia ma ua faatulafonoina, ina ia aua ne i toe tulai mai, ia mataupu faapea. Ma le faaaloalo.

Faamaonia.

FUAIUPU 30: Manaoga ina ia faatino le faagasologa o le sone e siakiina ai.

Faamaonia.

FUAIUPU 31: Tiute o le tuua o Samoa.

Faamaonia.

FUAIUPU 32: O le le tuua ai o le atunuu.

Faamaonia.

**FUAIUPU 33: Tiute o le tagata o le tagata faafoe po o le kamupani
vaalele po o le vaa lau pasese.**

Faamaonia.

FUAIUPU 34: Siaki mo le ulufale mai o tagata.

Faamaonia.

FUAIUPU 35: Tulaga o faalavelave tutupu faafuasei.

Faamaonia.

**FUAIUPU 36: Matafaioi e aveesea ai se pasese o ia lea ua teena le
ulufale mai i totonu o Samoa.**

Faamaonia.

FUAIUPU 37: Taofia faamalosi o vaa.

Faamaonia.

FUAIUPU 38: Manaoga mo le tuua o le atunuu.

Faamaonia.

FUAIUPU 39: Matafaioi a tagata faafoe ma tagata e ona taulaga faatonuina.

Faamaonia.

FUAIUPU 40: E mafai e le Ofisa Sili o Pulega ona faaleaogaina se visa.

Faamaonia.

FUAIUPU 41: Poloaiga e aveese ai.

Faamaonia.

FUAIUPU 42: Poloaiga e toe faafoi atu ai se tagata mai le atunuu.

Faamaonia.

FUAIUPU 43: Faataunuina o se poloaiga e toe faafoi atu ai se tagata mai le atunuu.

Faamaonia.

FUAIUPU 44: E le aafia poloaiga o le toe faafoi atu o se tagata mai le atunuu.

Faamaonia.

FUAIUPU 45: Faafoeina o tagata e i lalo ifo o le 18 tausaga.

Faamaonia.

FUAIUPU 46: Atofaina o nofoaga ma fale e faanofoesea ai mo le aveesea po o le le toe faafoiina atu o le tagata mai le atunuu.

Faamaonia.

Tofa LEALAILEPULE RIMONI AIAFI: E matau atu ua le toe i ai se isi e toe fesili, mo le fesoasoani i lau galuega, e a pe a sau tai 5. Ma le faaaloalo lava.

FOFOGA FETALAI: Manaia le fesoasoani mai.

FUAIUPU 47: Feaveaiina o le tagata o le a aveesea po o le a toe faafoiina atu mai le atunuu.

Faamaonia.

FUAIUPU 48: Vaitaimi faasaina.

Faamaonia.

FUAIUPU 49: Tapulaa mo aia tatau.

Faamaonia.

FUAIUPU 50: E leai se puleaga faa-faamasinoga a le Faamasinoga.

Faamaonia.

FUAIUPU 51: Talosaga tetee e faatatau i visa nofomau.

Faamaonia.

FUAIUPU 52: Talosaga e faasaga i le aveesea po o le toe faafoiina atu mai le atunuu.

Faamaonia.

FOFOGA FETALAI: Se manaia le fesoasoani lea na sau nei. Se i taumafai atu le 5 ua sau foi le.... O lou popolega, te i foi ua fai atu ua tai 5, ae faatu mai e le Sao Faapito faapea tatou o pea i mea taitasi. Se ua le faigofie le faaiuga o lenei aso.

FUAIUPU 53: Toe faai i tua o se talosaga tetee.

Faamaonia.

FUAIUPU 54: Iloiloga tau pulega.

Faamaonia.

FUAIUPU 55: Tiute o e ona galuega ma faalapotopotoga o tuuina atu aoaoga.

Faamaonia.

FUAIUPU 56: Tulaga tau agatapuia o faamatalaga.

FOFOGA FETALAI: O lea la ua alu atu le 56, a o lea e i ai le teuteuga a le Komiti. Se i tulai mai le Taitaifono o lea e i ai le...

Tofa NAFOITOA TALAIMANU KETI: Lau Afioga i le Fofoga Fetalai, malo le onosai malo foi le faapalepale. E faapea lava taga o Fonotaga, malo foi fesoasoani.

Lau Afioga i le Fofoga Fetalai ou te faatu le faasaoga i le Fuaiupu e 56 e faapea; o mea lava o interpretation ma le liliuina i le Gagana Peretania i le Gagana Samoa.

“FAASAOGA:

I le Fuaiupu 56(2), ia aveese le upu “e manuia ai” ma suia i le upu “o le solo lelei o mea uma.”

Faamaonia le Faasaoga.

Faamaonia le Fuaiupu 56 e pei ona faasaoina.

FUAIUPU 57: Faavaeina, tausiga ma le puipuiga o faamatalaga.

FOFOGA FETALAI: O lo o i ai le teuteuga a le Komiti i le Fuaiupu 57.

Tofa NAFOITOA TALAIMANU KETI: Lau Afioga i le Fofoga Fetalai, e faatu le teuteuga i le fuaiupu 57 e faapea:

“TEUTEUGA:

I le faafuaiupu (2) ia aveese le faaupuga “ae vagana ai” ma suia i le faaupuga “aunoa ma se faatagana faale-tulafono.

Faamaonia le Teuteuga.

Faamaonia le Fuaiupu 57 e pei ona teuteuina.

FUAIUPU 58: Fetufaaiga o faamatalaga.

Faamaonia.

FUAIUPU 59: Malosiaga o le Minisita e faamatuu atu ai.

Faamaonia.

FUAIUPU 60: Malosiaga o tagata ofisa.

Faamaonia.

FUAIUPU 61: Faamatalaga molimau e ala i se tusi faamaonia.

Faamaonia.

FUAIUPU 62: Malosiaga e aoina ai o faamatalaga faakomepiuta o foliga vaaia.

Faamaonia.

FUAIUPU 63: Tiute ma matafaioi a le Ofisa Sili o Pulega i lalo o lenei Tulafono.

Faamaonia.

FUAIUPU 64: Tuuina atu o malosiaga o le Ofisa Sili o Pulega.

Faamaonia.

FUAIUPU 65: Fesoasoani mai leoleo.

Faamaonia

FUAIUPU 66: Soligatulafono ma faasalaga.

FOFOGA FETALAI: O lo o i ai teuteuga a le Komiti. Tulai mai le Taitaifono o le Komiti.

Tofa NAFOITOA TALAIMANU KETI: Lau Afioga i le Fofoga Fetalai, ou te faatu le teuteuga i le fuaiupu 66 e faapea:

“TEUTEUGA:

I le tuanai o le faafuaiupu (5), ia faaofi le faafuaiupu (6) fou e faapea:

“(6) O se tagata na solia le vaega (1), (2), (3) (4) ma le (5) o le a noatia i luga o se moliaga ua faamaonia e ala i se faasalaga e le sili atu ma le 200 iunite tau faasalaga po o le 12 masina po o faasalaga uma e lua.

Faamaonia le Teuteuga.

Faamaonia le fuaiupu 66 e pei ona teuteuina.

FUAIUPU 67: Malosiaga e tagofia ai o soligatulafono i se faiga otooto i lea lava taimi.

Faamaonia.

FUAIUPU 68: Tuusaunoaga mai noataga.

Faamaonia.

FUAIUPU 69: Tulafono Faatonutonu.

Faamaonia.

FUAIUPU 70: Soloia.

Faamaonia.

FUAIUPU 71: Aiaiga tau soloaiga.

Faamaonia.

FUAIUPU 72: Teuteuga faatupulaia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga

IGOA: Tulafono o le ulufale mai o tagata 2020.

Faamaonia.

Na faagasolo le Tulafono Tau Faaofi o le ulufale mai o tagata 2020, faatasi ma Teuteuga ma Faasaoga.

LAFO MO LE FAATAATIAESE O TULAFONO TUMAU

FOFOGA FETALAI: Tapa lau Afioga i le Palemia.

Susuga Hon TUILAEPA AUJUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ma le mamalu o le Maota, ou te faatulai atu e faatu le lafo, *Ina ia faataatiaese Tulafono Tumau 108(4), ina ia avanoa ai le faitauga faatolu o Tulafono Tau Faaofi e 4, sa iloilo ina auiliili, i le aso Fono leni.*

Faaluaina e le Minisita o Tina & Tamaitai Atinae o Nuu ma Afioaga ma Agafesootai ma le Minisita o Pisinisi ma Alamanuia ma Leipa.

Na faamaonia le lafo.

**TULAFONO TAU FAAOFI O TEUTEUGA O LE FAAVAE 2020
– faitauga faatolu.**

FOFOGA FETALAI: Tapa lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu ma le faaaloalo, *Ina ia faitauina nei le Tulafono Tau Faaofi o le Teuteuga o le Faavae 2020 i lona faitauga faatolu.*

Faaluaina e Minisita o le Kapeneta.

FOFOGA FETALAI: Ua maea faamalieina aiaiga o le Faavae, e tusa ai ma le vaitaimi o le va o le faitauga faalua ma le faitauga faatolu, o le Tulafono Tau Faaofi o le teuteuga o le Faavae 2020, o le aiaiga mulimuli. E tatau ona faamalieina lea, o le lagolagoina lea o le faitauga faatolu e ni palota e le itiiti ifo i le lua vae tolu o sui usufono o le Palemene.

O lea o le a faatinoina le fesili o le faitauga faatolu i se Palota Tauvalaau. Ma ou te faatonuina le Failautusi o le Fono, ina ia taina le logo mo le faatinoina o le tatou Palota Tauvalaau.

O le a faitauina nei le Tulafono Tau Faaofi o le Teuteuga o le Faavae 2020, i lona faitauga faatolu.

Fesili: O e finagalo e lagolago tutulai mai. Ia alaala i lalo sui usufono pe a maea ona valaau e le Failautusi ia suafa o sui usufono taitasi.

1. Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi.
2. Afioga Hon Tuitama Talalelei Tuitama.
3. Afioga Hon Lautafi Fio Selafi Purcell
4. Afioga Hon Sala Fata Pinati
5. Susuga Hon Papaliitele Niko Lee Hang
6. Afioga Hon Lopao Natanielu Mua
7. Afioga Hon Faimalotoa Kika Iemaima Stowers.
8. Afioga Hon Tialavea Fea Leniu Hunt
9. Afioga Hon Sili Epa Tuioti.
10. Afioga Hon Loau Sola Keneti Sio

11. Afioga Hon Faaolesa Katopau T. Ainuu.
12. Afioga Hon Afamasaga Lepuiai Rico Tupai.
13. Afioga Faaulusau Rosa Duffy Stowers
14. Afioga Afoa Amituanai Faleulu
15. Afioga Tapulesatele Mauteni Tamasone
16. Afioga Nonu Lose Niumata.
17. Afioga Hon Gatoloaifaana Amataga Alesana-Gidlow
18. Afioga Tafua Maluelue Tafua
19. Afioga Hon Lauofo Nuafesili Pierre Lauofo
20. Afioga Hon Faumuina Faaolatane Tiatia Liuga.
21. Afioga Peseta Vaifou
22. Afioga Taefu Lemi Taefu.
23. Afioga Tuifaasisina Misa
24. Afioga Salausa John Ah Ching
25. Afioga Amituanai Kenrich Samu
26. Afioga Seiuli Ueligitone Seiuli
27. Afioga Hon Faasootauloa Pati Taulapapa.
28. Afioga Lenatai Victor Tamapua
29. Afioga Mulipola Leiataua Laki
30. Afioga Alaiasa Muagututia Moefaaououo
31. Afioga Sooalo Umi Feo Mene
32. Tofa Lealailepule Rimoni Aiafi.
33. Afioga Namulauulu Sami Leota.
34. Afioga Ili Setefano Taateo
35. Afioga Faalogo Iosefa Sopi.,
36. Afioga Sulamanaia Fetaiai Tauilili
37. Afioga Fuimaono Teo Samuelu.
38. Afioga Leaana Ronnie Posini
39. Afioga Aumua Isaia Lameko
40. Afioga Toleafoa Ken Vaafusuaga Poutoa
41. Afioga Nafotoa Talaimanu Ketu.

O e e faatuiese, se i tutulai mai.

1. Afioga Hon Fiamē Naomi Mataafa
2. Afioga Olo Fiti Afoa Vaai
3. Susuga Hon Laauli Polataivao Leuatea
4. Afioga Faumuina Wayne Fong.

FOFOGA FETALAI: O le faaiuga lenē o le tatou Palota. O i latou e lagolagoina, lenē Tulafono i lona faitauga faatolu, e 41. O i latou e teena le lafo i le Tulafono e toa 4.

Na faaalua le agaga fiafia o le Maota i le patipati o latou aao ina ua pasia le Tulafono Tau Faaofi o le Faavae 2020.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

Susuga Hon Laauli Polataivao Leuatea: Lau Afioga i le Fofoga Fetalai, sina avanoa lava faamolemole, o si mea e fia faasao.

FOFOGA FETALAI: Malie le sui usufono, ou te le toe taliaina se.. o lea ua tatou see atu i le faaiuga o tatou galuega.

Susuga Hon Laauli Polataivao Leuatea: Si mea laititi lava lea o lo o i luga faamolemole.

FOFOGA FETALAI: E faasilasila atu, ua maea ona faagasolo le Tulafono Tau Faaofi, le Teuteuga o le Faavae i le Palemene ua potopoto, ma ua faapea ona pasia e le Maota.

TULAFONO TAU FAAOFI O LE FAAMASINOGA O SOLIGATULAFONO 2020 – faitauga faatolu

FOFOGA FETALAI: Ou te tapa lau Afioga i le Minisita o Faamasinoga.

Afioga Hon FAAOLASA KATOPAU T. AINUU: Ou te faatu le lafo, Ina ia faitauina nei le Tulafono Tau Faaofi o le Faamasinoga o Soligatulafono 2020 i lona faitauga faatolu.

Faaluaina e le Minisita o Aoga, Minisita o Tupe ma le Minisita o Tupe Maua.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

TULAFONO TAU FAAOFI O FANUA MA SUAFA 2020 – faitauga faatolu

FOFOGA FETALAI: Ou te tapa le Minisita mo Faamasinoga ma Pulega tau Faamasinoga.

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Fanua ma Suifafa 2020 i lona faitauga faatolu.*

Faaluaina mai e le Minisita mo Aoga, Taaloga ma Aganuu, Minisita o Tupe, Minisita mo Tupe Maua ma le Minisita mo Fesootaiga, Faamatalaga ma Fesootaiga Vavave Faaneionapo.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

TULAFONO TAU FAAOFI O LE ULUFALE MAI O TAGATA 2020– faitauga faatolu

FOFOGA FETALAI: Ou te tapa lau Afioga i le Palemia, le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Ulufale mai o Tagata 2020 i lona faitauga faatolu.*

Faaluaina e le Minisita mo Tina ma Tamaitai, Atinae o Nuu ma Agafesootai, ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoao Faitulafono.

FOFOGA FETALAI: Ia, malo faafetai, malo le onosai, malo le galulue. E leai lava se galuega e le maea pe a tatou le onosai e faatino lo tatou valaauina. Ia ma ua tatou taunuu ai i le siui o galuega sa faatulaga mo le tatou Aso Fono leni. E momoli atu ai le agaga faamalo ma le agaga faafetai. Ia, o le matou tala, e faamalulu atu i le paia o le Palemene, o le a foi se taumafaiga a le Nofoa e paopapa, soli tuaoi pe taugalemalie i le faafofoga a sui usufono mamalu, ia, o lea ua tatou taunuu toe lava o ni nai aga ona tatou sapaapaia lea o le pepe, o le pepe o le togiola ma e tatou maua ai le agaga o le fefaamagaloai. Ia alofagia e le Atua ia faamagalo le Nofoa e tusa ai o taualumaga o le tatou galuega. Ae ou te tapa ma le faaloalo lau Afioga i le Palemia mo sau saunoaga e faai ai le tatou Fonotaga.

SAUNOAGA A LE PALEMIA MA LE LAFO MO LE TOLOPOINA

**Susuga Hon TUILAEPA AUELUA FATIALOFA LUPESOLIAI
LOLOFIETELE NEIOTI AIONO GALUMALEMANA Dr. SAILELE
MALIELEGAOI:**

Lau Afioga i le Fofoga Fetalai ou te tulai atu ma le agaga faagaetia i lenei itula o le aso ona ua faaiuina ma le manuia a tatou Fonotaga aemaise Tulafono sa tatou lauiluina. E faapitoa lau faafetai i lau Afioga i le Fofoga Fetalai na o oe lava lou nofoa o lo o taumafai e faatonutonu le Fonotaga nei ae toatele matou. Faamalo foi i sui usufono uma o le tatou Maota sa sausaunoa ma taputapu foi i le faagasologa o le tatou galuega, o se aso umi, ua gasea a outou Afioga i le taumafaiga o a tatou galuega e faauma ae tatou te le i aulia le aso soifua o lo tatou Alii. E le faigofie nei mataupu sa tatou talanoaina. Faamalo foi i le faafogafoga mai a Samoa, aemaise le Ao Mamalu o le Malo faapea foi le Sui Tofia, le tapuaiga i alii ma tamaitai o le faamasinoga, faapea foi le paia i Aiga ma latou Tama, ae tainane le usoga a Tumua ma Pule, Ituai ma Alataua, Aiga i le Tai ma le Vaa o Fonoti. E faapea foi le tapuaiga i le aufaigaluega paia a le Atua ma le latou faanonogamanu.

O le taua o le Fonotaga lenei, ona ua loaloa o tatou soalaupule ma finau i Tulafono nei. Ou te faamalo foi ia i latou o le tatou atunuu na lagolagoina le Tulafono, aemaise foi le sautia i le ala o lau Afioga i le Tamaitai Taitaifono, Sui Taitaifono ma la outou Komiti. O se Tulafono uiga ese le Tulafono lenei. E pei lava ona ou talanoa ai pea, ua faalua ona soalaupule le mataupu lenei. E le gata ina tapa le finagalo o Samoa na faavae ai le Lipoti, na faavae ai le Tulafono, ae ua uma ona tapena le Tulafono Tau Faaofi lenei ona outou toe malaga foi lea toe tapa se finagalo o Samoa. O lea la ou te matau e faitau eseese, ua ese foi ona aumai isi lagona ae toe ese foi ona toe suia finagalo, ae le toatele, aemaise lava le mataupu i matai sao. Afai sa lagalaga finagalo, ua tatau. O lea foi ou te matau i le toatele o Samoa, e le gata i Samoa i totonu, a o Samoa i fafo, e aofia ai foi ma i latou taitoatasi e faapea foi ma Ekalesia. Faamalo i le toaitiiti o i latou foi o auauna a le Atua e le i atoatoa la latou lagolago i le Tulafono, a o lea foi ou te iloa le toatele sa latou lagolagoina le Tulafono, aemaise lava o le taunuuga o nei Tulafono, o le faamamaluina o le pulega mamalu a alii ma faipule i totonu o tatou nuu, aemaise le lagolago mai i polokalame a le tatou Malo, aemaise foi le faatoafilemuina o tatou nuu i le tele o le mau suiga ua falute mai totonu o le tatou atunuu pe a fua mai le soifuaga i fafo, le soifuaga o lea tatou te matauina pea, e le gata o i latou e asiasi mai i Samoa, ae faapena foi i ata tatou te vaavaai i ai, ua suia atoa ai talitonuga aemaise le saosaoa o fesootaiga televavave i nei ona aso.

Ou te faafetai ai ia i latou foi sa luita Tulafono na alu atu i totonu o le Maota lenei. Ua le faatasi pe faalua ona ou faamanatuina pea le tulaga lenei, o lea na saunoa le Minisita i le taeao nei e le fou, ma ia taua ai i le toe agai i

tua, a o tatou lauiliuina le tatou Faavae, le Fono Faavae. O le mataupu tonu lava lea sa tatou talanoaina, na talanoaina i le aso 4 ma le aso 5 o Oketopa i le tausaga e 1960 na tonu ai tatou tagofia. Ia, ma lauiliu ai puipuiga o tatou fanua, puipuiga o suafa matai, ae pupuu lava faaupuga, e le i upua ae pupuu lava ona o le agaga lea, e i ai le taimi mulimuli ane ai, o le a faapea lava ona pasia Tulafono e faalatele ai aiaiga lea e i totonu o le Faavae, le 100 ma le 102, le 102 vaega o le Tulafono. A o le 103 lea sa saunoa i ai le Minisita, ua oo mai loa i ina, goga loa i ina le felafolafoaiga. Aisea? Leaga e ogaoga le tulaga o tatou tu ma tatou agaifanua, e ono fetotoai ma aiatatau o lea ua agai i ai le Faavae, e ono fetotoai. Lea foi sa saunoa le Minisita, ona taunuu ai lea o tatou matua, 160 le aofai o tatou tama mai tatou itumalo faatasi ai ma Tama a Aiga, 160 le aofai sa faisao uma i le Faavae. E ala ona ou taua le mea lea, ona e i ai nisi manatu e faapea na o latou toaitiiti na faia le Faavae. E leai, na auai uma tatou tama mai o tatou itumalo. O lou lava itumalo, e toafa faatumutumuga o le matou itumalo sa auai, ae ua lolo uma taofi. Aisea? Ona e ono afaina le tatou talosaga leaga e ono felautoai puipuiga o le aiatatau a tagata taitoatasi ma a tatou tu ma agaifanua. O le a le mea na agai i ai? Tuu loa na o le malosi, e i ai se taimi o i luma ona tulai mai lea o le Palemene e fai le latou Tulafono, ona tuu atu loa lea o le malosi i le itutino e mafai loa ona fai mea uma ia. O le a le itutino lena? O le Faamasinoga o Fanua ma Suafa. O lea la ua pasia. Ma ou te manatu, o le aso lena, o le isi lea taeao faitauina i le talafaasolopito o le Palemene o Samoa. Aisea? Leaga ua leva, ua loaloa, 60 tausaga o faataoto mai le agaga maua e o tatou matua, fai le mea lea ina ia maua e o tatou nuu le puipuiga e auala i le pulega mamalu a alii ma faipule, o tatou eleele faapea ma suafa matai, lea la ua faatino i le aso.

Ma e momoli atu lau faafetai ma lau faamalo i le faatinoina o le fuafuaga ua taoto, ae manu lava e le oo i ai se manatu, ae o le feiloaiga lea sa fai i le amataga o le Paeaiga lena, le tatou feiloaiga, lea la sa toe faamanino ai i ina, e 2 lava mea ia e le o taoto i le agatonu. O a mea ia? O le tatou Faavae, e faavae i le Atua Samoa. Ma le lua, o tatou tu ma agaifanua. O le a le mea na tatou faia? Na tatou teuteuina le Faavae ae aumai i totonu upu ia, E Faavae i le Atua Samoa, sa i le faavaa, e le i i totonu o le fatu o le Faavae. O lona uiga, o nei lava tausaga e tele sa tatou tautau ai, o le Malo o Samoa o le Malo e faavae i le Atua ae silasila mai le Atua i nei upu e le sao. Tatou te le i tuua i totonu. Aisea? Ona o le agaga foi lea e ono lamatia ai le sao i faga o le pasia o le tatou tutoatasi, lea la na taatia uma ai faapena i fafo i le faavaa ma fai ai le tatou iuga, o mea tetele ia e 2 e uma le Paeaiga lena ua i totonu o le fatu o le Faavae. O a mea ia e 2? Lea na pasi, uma na tatou pasia, e leai lava se isi o le Palemene ma auese ai, ia tuu i totonu o le fatu o le Faavae upu ia, Faavae i le Atua Samoa. Na tatou pasia le tulaga lena i le 2 tausaga talu ai, ona totoo ai lea o le tasi lea, lea ua tatou pasia i le aso. Toeitiiti lava uma le tatou Paeaiga, toeitiiti lava misi le pasi, a o lea ua tau lau o le faamoemoe.

Aisea? E leaga o teuteuga e taua mo tatou uma, taua mo le lumanai o Samoa. O lea ua i ai le temokarasi, le temokarasi a Samoa, le temokarasi a Samoa lava ia, e na te faatauaina. Muamua o tatou talitonuga i le Atua e faavae ai Samoa. Ma le lua, o le faamamaluina o tatou tu ma a tatou agaifanua, lea ua tuu uma i totonu e ala i le Faamasinoga o Fanua ma Suafa, ia ma i ai ni nai mea laiti e toe faaleleia. E faapena uma lava Tulafono, e amatamata malie, e i ai nisi mea e ono toe teuteu. Aisea? Leaga o lea tatou te deal with the future, o lea tatou te agai i le lumanai. Na o le Atua na te silafia le lumanai. E leai lava se isi o tatou e silafia na mea, ma e lafo pea i le Atua lo tatou faatuatuaga na te aumaia lava le mamoe e osi ai le taulaga, na te aumaia lava manatu i totonu o le Palemene lenei e teuteu atili ai tatou Tulafono. Lea sa ou talanoa atu i le aso, e i ai lava manatu o nisi, a tatou faia loa se mea fai i le atoatoa. O le faigata ia o lena mea. Aisea? We are human beings, o tagata e le o tatou o ni agelu. O le ala lea i le agai atu i le lumanai, e ono i ai foi nisi teuteuga e atili atoatoa ma faaleleia atili ai le tatou galuega.

Ou te faamalo atu i le tatou galuega tele sa feagai ma i tatou. Ia, o lea ua tatou agai atu i le samiina o le pepe o le kerisimasi, ae ou te manatu foi, o se kerisimasi fiafia mo tatou uma. O lea ua tuanai atu le avega tele sa faafeagai ma i tatou.

E faapitoa lava sau upu i tatou sui o lo o agaia le Malo. E taua lava le tou galuega, aua ne i i ai se manatu e i ai se feteenaiga, leaga o la outou faatupu manatu ia i matou e atili ai ona tele mafaufauga lelei. A o le mea aupito sili ona taua, o tatou uma o uso ia keriso.

Lau Afioga i le Fofoga Fetalai, o la matou lauga lena, ia alofa le Atua faamanuia mai i lenei Palemene, tatou toe tauaofia i le toe ae mai o galuega ona faamaea ai lea o tatou galuega o totoe ae tatou te le i agai atu i le tatou faiga palota. Ia manuia tele le kerisimasi ma le tausaga fou.

Ou te faatuina le lafo lau Afioga, *Ina ia tolopo nei Taualumaga a le Fono Aoa seia aulia le aso 19 o Ianuari 2021 i le 9:00 i le taeao. Soifua ma ia manuia.*

FOFOGA FETALAI: Ia, ua ou manatu o lena ua faafofoga le paia o le Palemene. Ia, le paia o le Kapeneta, e faapea foi le paia o Minisita Lagolago, faapea foi Taitaifono o Komiti eseese o le Palemene, aemaise o sui usufono mamalu uma o le Palemene o le Fono Aoa Faitulafono, o lupe lava sa faia mai le fuifui na filifili mai e le atunuu tatou te afifio ma tatou omai e faataunuu le tatou valaauina e ala i upufai o Malo. Ia, e i ai le manatu o lea ua faafofoga mai foi Samoa i le latou tapuaiga i le Ao Mamalu e faapea foi le Fono a Sui Tofia, o le paia lava lea aua Tama ma Aiga, Aiga ma Tama, le usoga a Tumua ma Pule, Ituaui ma Alataua, faapea foi le Vaa o Fonoti, e faapea foi Faauluuluga o Ekalesia e fia o le atunuu, o le aufaigaluega totofi a le Atua o lo o faapena ona latou faanonomanu, tatalo i le ao ma le po, e a se manuia o Samoa e le gata i ana atinae ae faamanuia foi i ana tama fanau

ina ia lava lo latou tomai aoaoina e atiae ai si o tatou atunuu ae faapea foi le puipuiga o si o tatou atunuu e ala i faamai e pei ona tatou fememeai ai ona o le malosi o lo o faapena ona feagai ma i tatou i le suiga o le tau ma le tatou siosiomaga. Ia e faapea foi le faafofoga tapuai mai, o lo o tatou faatasi pea ma Ofisa Sili o Pulega o Matagaluega ma Faalapotopotoga a le Malo, o le latou foi faiva alofilima e tuu mai le latou tauau e tautua ma fesoasoani e lima ma vae, se i tulou le paia e atiae Samoa e ala i lo latou malosi ma le poto aoaoina.

O le mea la lea e momoli atu ai le agaga faamalo ma le agaga faafetai ua malie taliga e faalogo, ua malie foi mata e vaai i lenei aso, ua manino foi le tele o mea sa faapena ona fetogia i foi faa-solituaoi le tulaga o lafoga a le Palemene ina ia manino le tatou galuega, o lea ua e malele ma saunoa, malo faafetai. O le upu lava e fai i Atua, ua se togi le seu na lagatila ua faapulou le tualima, malo fai o le faiva i lau Afioga i le Taitai o le Malo faafetai foi galulue i le paia o le Palemene.

Ia, o lea ua faatu mai le lafo, o le a tatou tolopo seia aulia le Aso Lua, 19 o Ianuari 2021, o le aso foi lena e feagai ai tatou ma le tatou galuega o le Tala Faatatau Faaopoopo Muamua o le Tupe 2020/2021. Ia, ona i ai lea o le manatu, o se taimi o lo o muamua o le a sisi la ma tuuama le fua ma tatala le filialii i le paia o le Palemene, ia aemaise foi o Samoa ua potopoto i le matau atu i lea itu o le Maota, malo faafetai. E le popo outou paia i sa matou tala, aua o Samoa lava ia o le atunuu tofi, e le o se atunuu taliola. Ia ona faapea lea, ia, ae tatou te le i tolopo ou te tapa le Afioga i le sui usufono mamalu mai Anoamaa Sasae na te faaiuina le tatou Fonotaga i se tatalo, o ia foi o le faifeau o le Ekalesia Assembly.

Na tolopo Taulumaga a le Fono Aoao Faitulafono i le itula 6:25 i le afiafi seia aulia le itula e 9:00 i le taeao o le Aso Lua, 19 Ianuari 2021.